





Exe  
18






35.

35.  
Gussitz. B. 1. 1. 1.

3/205/R

y y y l.







3/20



GODOFREDI KLAUNIGII,  
MED. D. SAC. CÆS. MAJESTATIS PERSONÆ ET AULÆ  
MEDICI, ACADEMICI NAT. CURIOS. CÆSAREI



# NOSOCOMIUM CHARITATIS

SIVE

# HISTORIARUM MEDICARUM

IN

NOSOCOMIO S. S. TRINITATI SA-  
CRO OBSERVATARUM,  
SPECIMEN I.



VRATISLAVIÆ, apud Michaellem Hubertum  
M DCC XVIII.





THE  
HISTORICAL  
MEDICAL  
LIBRARY

THE  
HISTORICAL  
MEDICAL  
LIBRARY



THE  
HISTORICAL  
MEDICAL  
LIBRARY











VIRO  
*PERILLUSTRI ET EXCELLENTISSIMO*  
*DOMINO,*

DOMINO  
FRANC. FRIDERICO  
POSSINGER  
DE PECKENSTEIN,  
MEDICINÆ DOCT. CELEBERRIMO  
ACRÆ CÆSAREÆ ET CATHOLICÆ MAJE-  
STATIS CONSILIARIO AC ARCHIATRO  
GRAVISSIMO  
SALUTEM ET PERPETUAM FELICITATEM!





PER-ILLUSTRIS AC EXCELLENTISSIME  
DOMINE,



Nondum mihi memoriâ  
excidit, nec unquam  
excidet suave Collo-  
quium, quo ante de-  
cem, & quod excurrit,  
annos me ab itinere cum Serenis-  
simis moderni Potentissimi Electo-  
ris Palatini Coniuge & Filiâ suscepto  
re-



reducem *Per-Illustris Tua Magnificen-*  
*tia* Viennæ excipere fuit dignata.  
 Recolo sæpius hanc Favoris Tui me-  
 moriam, sed magis adhuc mecum  
 repeto merita Tua, quæ devotâ  
 mente admirari non desinam. Haud  
 vacat Encomiaſten agere, nec lice-  
 bit modestiæ Tuæ vim inferre; ex-  
 currerem alias in laudes, quas in ce-  
 leberrimâ Universitate Oenipontanâ  
 & tandem in Inviſtiſſimi Monarchæ  
 noſtri aula *Tibi* acquiſiſtiſti nunquam  
 interituras. Verſantur hæ in omni-  
 um ore & poſteritatis erit eas cedro  
 dignas commemorare ulterius. Mi-  
 hi itaque non vitio vertes, *Vir Ma-*  
*gnifice*, quod per-illuſtri Tuo ſplen-  
 dore captus *Te* eligere decreverim  
 Noſocomii Charitatis Patronum &  
 Judicem, à cujus arbitrio Primitia-  
 rum harum dependebit ſequutura  
 meſſis. Hoc Clypeo munitus ad



Vota me accingo ardentissima pro  
*Tua, Vir Per-Illustris*, salute, ut eam  
 diu integerrimè conservet Fons &  
 origo omnis Charitatis DEUS.

Vale! & Fave


*Per-Illustris & Amplissimi Nominis  
 Tui*

*Vratislavia*  
 die 29. Octob. A. C.  
 MDCCXVII.

Cultori addictissimo  
 D. GODOFREDO KLAUNIG.

*Bene-*





## *Benevole Lector,*



Nosocomium, quod cernis, loco speciminis rudi adhuc Minervâ compositum, fundamento tamen charitatis superstructum, sibi à Te pollicetur iudicium charitatis legibus conforme. Primo itaque limine Te salutare, & rationibus, quæ ad ædificii hujus structuram me commovent, Tibi obviam ire mearum statuo partium. Non de via me successurum confido, si absque ambagibus nonnulla de Medici spartâ à Reverendorû Fratrum Misericordiæ primo hujus loci Superiore, *Plurimum Reverendo Domino P. Clemente Mentzel* mihi ultrò oblatâ præmittam, utpote cujus historiâ, dum præconceptis opinionibus exutus nostrum intendis intrare nosocomium, & ne bivio Te exponas, indigebis. DEO sint grates! non dura me presit necessitas, ut obirem officium ex vulgi opinione periculo plenum & junioribus Medicis unice conveniens, nec in æternum obiissem, si vulgo ultra crepidam rarò sapienti assentire consultum duxissem. Verum  
quam



quam inanis sit illorum fastus, qui artem, ipso *Hippocrate* teste, longam vitâ brevi, etiamsi ultra centum duraret annos, didicisse gloriantur, cui-libet stolidâ philantiâ nondum occæcato apparet. Plus vice simplici observavi, veteranis medicæ Reipublicæ antistitibus aquam hærere, si ipsis prope lectum res sit cum ægro, quem in cathedra facili sanassent negotio. Adeò quidem inexhausta Praxeos clinicæ scientia est, ut omnem ætatem adhuc inventurum esse, in quo desudare poterit nullus dubitem. Cur non & mihi tenuitatis optimè conscio incumberet quacunque data occasione excolere & ulterius promovere artem, cui in academiis, itineribus & per tria lustra in Patriâ operam navare nihil antiquius fuit. Ne dicam de Viris calcar addentibus, quos Aula Cæsarea, Academia Viennensis atque Pragensis & ipsa Musa vetat mori, intellige *Illmeros, Stockhammeros, van der Heyden, Fabros &c. Kirchmayeros, Crusios &c.* quibus indecussit ejusmodi nosocomiiis diu medicinam facere, ut non videam, cur me pudere deberet, eorum vestigia legere ac defectus meos emendare, si modo scopum attingam præfixum, DEI scilicet gloriam & Proximi salutem. Huic innixus nihil me periculi moratur, & quando in

*ipsos sæva medentes*

*erum-*



*erumpit clades, absuntque autoribus artes: in-  
primis cum multifariæ experientiae sit, non so-  
lum in Nosocomiis, sed & alibi Medicos exponi  
& extingui contagiosis morbis, quod proh dolor!  
exemplo charissimi mei Parentis non incelebris  
apud Vratislavienses Medici edoctus testor. Qua-  
propter J. B. van Helmont tr. de Febb. c. 14. p. m.  
102. in opusculis medicis inauditis audire & sequi  
placuit, adhortantem: *Quærite & invenietis,  
modo medicina non in quæstum solum sit. Nam  
si vobis intentio est Misericordia ex charitate, ob-  
viabit vobis in itinere Veritas & Lux à Patre  
Luminum descendens, cui sit honoris retributio  
in æternum.**

Ut vero Tibi constet, quomodo Palæstra nostra  
in experimentorum certitudine aliis, quæ exerci-  
tiis medicis dicatæ sunt, palmam præripiat, scias,  
Lector, me duplici gaudere beneficio. Non pos-  
sum non, quin primo extollam Institutum RR. FF.  
Misericordiae sanctè colendum atque observan-  
dum, quod Iphis injungit ægris non solum justo  
tempore Victum ac medicamenta præbere, noctu  
diuque inservire & militum instar excubias agere,  
sed & Medici ordinationes ad amussim exequi, ut  
ob strictam ægrorum obedientiam, sollicitum-  
que adstantium ministerium certus esse possit de  
remediorum effectu Medicus. Præterea in ma-  
gna



gna felicitate pono facultatem indagandi morborum genium in demortuorum cadaveribus, cujus adminiculo sæpius quidem errores commissos detegere, sed, quod optimum, imposterum evitare & cautius mercari datur. Soli facem accenderem, si anatomiam practicam à *Bartholino, Wepfero, Boneto, Hartmanno* & aliis satis commendatam, quæ abditas morborum causas scrutatur & in apricum profert, ulteriori encomio mactare vellem, cum emolumentum in artem saluberriam exinde redundans sole meridiano clarius sit. Hæc perpendens, non miraberis, Lector, Te in Nosocomio charitatis plures invenire historias demortuorum, quam sanitati restitutorum. Horum catalogum texere, Tibi tædiosum & vix fore utilitatis, postquam observationes triviales lippis atque tonsoribus notæ ad nauseam prostant. Illorum autem viscera rimari, nec omnibus licet, nec libet, quibus laboris hujus incommoda obstant, ne artis certitudinem & hominem in homine quærant. Nec mihi opprobrio vertetur ingenua errorum confessio, quam præeunte Celeberrimo *Fonseca* ad declinandas imposterum syrtes candidè profiteri e re nostra esse judicavi. Ipsemet magnus *Hippocrates in libris epidemiorum* historias febre acuta laborantium recensens, non veretur proferre eos, qui artem suam illuserunt, etiam si



amfi ex numero 42. pauciores, ſcilicet 17. ſaltem  
ſervaverit. Et quis Medicorum eſt, qui ſe ab hu-  
manâ ſorte alienum jactare poſſit? Juvabit ita-  
que, ſpreto ſiniſtrorum judiciorum metu, veri-  
tatem ſedulo ſectari, & tam in ſanatis, quam  
mortuis ea eruere, quæ in Proximi commodum  
vergere videntur. Huic propoſito inſiſtens non  
excedam Noſocomii limites, ſi etiam ex ſepul-  
chreto, vitam atque ſalutem promovere inten-  
dam, id quod pluribus ſpeciminibus docere al-  
laborabo, ſi Tuus, quem opto, accedat Favor,  
*Benevole Lector.*






## Syllabus Historiarum.

- I. **H**istoria Vulneris ob copiosum lymphæ profluvium notabilis.
- II. - - Phthiſeos ſcrophuloſæ ſalivatione mercuriali curatæ.
- III. - - Et anatome ex cordis polypo demortui.
- IV. - - - ex polypo arteriæ pulmonalis demortui.
- V. - - Anaſarçæ per exanthemata criticè ſublata.
- VI. - - Febris quartanæ abdominis tumore & Diarrhæa ſublata.
- VII. - - Cataleptici curati.
- VIII. - - Et anatome ex ani fiſtula demortui.
- IX. - - Ulceris in Crure Cacoëthæi ultra ſedecim annos occulte ſerpentis.
- X. - - Et anatome Phthiſici.
- XI. - - Et anatome Pectoris hydrope & anaſarca extincti.
- XII. - - Et anatome Tympanitide, anaſarca & pectoris hydrope extincti.
- XIII. - - Et anatome Apoplectici.
- XIV. - - Iliaci.
- XV. Historia & Anatome Aſciti.
- XVI. Pericardii hydrope, ſtrumis ac inteſtini recti ulcere laborantis atque demortui
- XVII. - - Pleuritici.
- XVIII. - - Medicamentorum antiquartanorum.
- XIX. - - Calculo renum laborantis.
- XX. - - Rheumatismi.
- XXI. - - Et anatome Hepatis abſceſſu demortui.
- XXII. - - Fiſtuloſo polypo cor & aortam inhabitante demortui.
- XXIII. - - Et anatome Fluxu, ſic dicto, hepatico demortui.
- XXIV. - - Steatomatum Capitis verticem occupantium.
- XXV. - - Et anatome Febre hectica ſalvis viſceribus demortui.



*ad Hist. 1.*











F. F.

I.

## Historia Vulneris ob copiosum lymphæ profluvium notabilis.



Uale Diluvium Macrocosmo, disruptis impetu Aquarum aggeribus, tale Microcosmo evenit, si lymphæ laceratis vasis eorum alveis egrediatur; uterque enim Agoni proximus censebitur. Etiam si nobiliores Corporis partes ab extravasatâ lymphâ non imergantur, uti quidem in Hydrocephalo, Ascite, pectoris Hydrope observatur; nihilominus multum periculi imminet, quando ipsi liber & copiosus conceditur effluxus. Non vacat curiosè inquire, an lymphæ juxta Listerum de humoribus, fiat ex novo & quotidiano chylo, an vero ex sanguine veterascente; sufficiat, quod merito annumeretur laudabilibus succis, qui præter secundarios usus primariò nutritionem promovent. Quis itaque ambigeret majorem ac subitanæ virium prostrationem dispendio lymphæ tanquam humoris laudabilis, quam excretioni nimie sudoris in febre sudatoriâ Anglis epidemicâ, lotii in Diabete, alvinarum fœcumin Diarrhœa adjudicare? nisi exempla obstarent, quæ continuum hujus roris imbrem exhibent, haud diminuto naturæ robore, cum tamen modò memoratos morbos nunquam non comitetur summa debilitas.



Ad evincendam Afferti mei veritatem producam Juvenem *Ignatium Ludewig*, ætatis 20. circiter annorum, cui anno 1714. die 24. Febr. in tumultu inter studiosos & milites hîc exorto globus plumbeus bombardâ explosus superiorem dextri ossis femoris partem intraverat atque conquassaverat. DiffRACTI ossis festuæ & purulenta materia Cuniculorum instar hinc inde ductus sibi formaverant, ut vulnus â priori Chirurgo obiter tractatum tot sinibus ac Cavernis appareret, quot schema observationi annexum ob oculos sistit. Hoc miseriarum statu miser Misericordiæ Rev. Fratri D. Cosmæ Chirurgo dexterimo die 5. Septemb. traditur, qui nulli pepercit curæ & labori, ut injectionibus primum ex hb. fabin. scord. centaur. m. absynth. myrrh. aloë cistm aquâ præparatis constantibus, efflorescente verò senecionis herbâ unicè hujus spissiori ac saturatiori decocto (quod reliquis injectionibus vulnerariis palmam præripere multiplici experientia edoctus affirmo) ab ichore, festucis ulteriorique corruptione liberaretur vulnus altas jam agens radices. Nec voto suo frustratus protusas vidit die 8. Septemb. tres, Mense Novemb. quinque satis magnas & unam adhuc festucam ab osse femoris Mense Decembri; ichorosa verò colluvies coloris flavi satis abundanter per ostia a. b. exitum habebat. Invaserat in simul ægrum febris vulneraria & vulneratum pedem motus convulsivi, quibus per injectionem antea laudatum fonsque nervinos atque per pulveres resolventes, anti spasmodicos, cinnabarinos obexponebatur. Victis his hostib9 & vulnus & reliqua in melius vergere videbantur. Sed ecce! ex improvîso utrumque pedem circa malleolos occupat ædumatofus tumor mox diminutus, mox auctus; die autem 14. Aprilis anni 1715. tanta sumens incrementa, ut ad inguina usque ascenderet. Scrotum pariter in stupendam excrevit molem, quæ tamen evanescebat, postquam Mense Maj. acu apertum intra 24. horas ultra tres Mensuras lymphæ profuderat. Die 10.

Au-



Augusti per aliquot dies incipiebat laborare Diarrhœâ, quâ cessante de Inguinis sinistri & cruris dextri dolore conquerebatur, quem die 20. ejusdem Mensis excipiebat sensus dolorificus inflammatorius dextræ tibiæ cum Diarrhœæ recidivâ. Hypogastrii region non minus intensissimè doluit; & Urinæ suppressio irritò mingendi stimulo stipata, aderat. Appetitus permanfit satis integer, atquè noctes tranquillè peregit, si excipias ultimam morbi periodum, quâ dolor sæviit. Nec reticendum sanguinis stillicidum è naribus quotidie binis vel tribus vicibus ob sanguinis motum per disrupta vasa sanguifera turbatum recurrens: in primis verò notatu dignum censeo, quod flavescens ichor è vulnere profluens irruente pedum tumore limpidissimæ ac copiosissimæ lymphæ faciem induerit. Magis adhuc miranda est hujus lymphæ copia, quæ ultimis quatuor Mensibus ex furis tumescentibus transsudavit. Spatium huic evacuationi destinatum non excessit volæ manûs magnitudinem, ab epidermide denudatum & quasi excoriatum conspiciebatur, ejusq; pori instar spongiæ ampliores continuo inundabantur. Computus ratione quantitatis, lymphâ scilicet per aliquot dies sollicitè in vasculo collecta, factus comprobavit, unicè ex prædictis spatiis furarum promanasse octo amphoras, & quod excurrit, lymphatici roris, ut taceam illum, quem vix credibili abundantia bursis c. & e. toties expressit, quoties vulneris curam habuit Chirurgus. Hinc inde lacrymæ, & occasionata concludendi, officula acuta ab osse femoris discerpta, purulentæ materiæ acrimoniam lacerasse vasa lymphatica ubiquè, in primis ex conglobatis inguinalibus glandulis numerosè repentia, ut hâc ratione extra vasata lymphæ ex vulneris ostiis aut ex bursis c. & e. tanquam ex hydrophylacio protrudi ac furarum poros tanquam à scaturigine surgens permeare potuerit. Attamen vires conservavit sufficientes ad vitæ finem, qui, accedente aliquot horis ante analysin faciei intumescentiâ, sequebatur



d. 21. Augusti an. 1715. Si itaque calculum à *Sanctorio in Medicina statica* ductum huc trahamus, juxta quem quilibet homo adultus quolibet die naturali per halitum invisibilem sive per spirationem 50. uncias & ultra, per vesicam urinariam unius noctis spatio lotii uncias sedecim (quod vix per triduum in nostro defecit) excernit, ne dicam de ipso sudore & de alvi fecibus, quarum una sede uncias duodecim à viro robusto deponi, nimis curiosè J. *Homburgius* circa novum suum Phosphorum occupatus observavit in *Historia Acad. Scient. Paris. ad an. 1711.* atque illaudabilibus his laudabilem rorem, cujus jacturam quotidie vulneratus ad decem libras fecit, annumeremus, vereor, ne nobis Aqua hæreat in explicanda nutritione, quæ, non obstante tot evacuationum syndrome corpori ægro nunquam defuit. Interim ut in densa hac conjecturarum caligine aliquid dixisse videar, *Celeberrimi Pechlini* verba mea faciam, qui circa stupendum sanguinis & puris profluvium in *Thoracis vulnere*, cujus *Commentarium eruditissimis suis Observationibus* adjecit, suspicatur, quod, nisi quotidiano victu damnum fluentis sanguinis compensatum ex parte fuit, ut compensatum esse potu existimat, necesse sit ab acri materia seri repetatur, aut, hoc quoque fallente, longe major sanguinis copia venas perambulet, quam vulgò nostri credunt. Credit verò *Illustris Brunnerus in tractatu de glandulis duodeni* nec legibus naturæ, nec organi colatorii structuræ repugnare, si statuamus chylum etiam per venas mesaraicas ad massam sanguineam ferri & per hanc viam multò breviorē hactenus cognitā, pariter corpori nutrimentum accedere, quoniam prædictæ venæ ad extrema usum in intestinis villorum (quæ secretionis seu percolationis chyli organa sunt) cacumina exporriguntur majorique frequentia inservatur, quam ut succum alimentarium villi, ceu totidem orificia & infundibula innumera abliguriant. Sed hæc in parenthesis.

In Cadaveris non multum extenuati hypogastrio, ubi antea dolor sæviit, macula sublivida & in sinistri Cruris inguine



guine pari torturâ vexato vasa sanguifera tumida ac fusco colore quasi tincta occurrebant notanda.

II.

## Historia Phthisi Scrophulosâ laborantis & Salivatione feliciter curati.

**P**Hthiseos, quæ pulmonum ulcus præsupponit, historia lippis atque tonsoribus nota est; cura verò Medicis tantum negotii faceffit, ut dubiæ aleæ rem aggredi videatur, qui hoc morbo verè laboranti integram salutem promittit. Me quidem minime fugit proflare scriptis consignatas Observationes Phthiseos medelam jactantes, sed eas tanquam sublestæ fidei in dubium vocare suadet pulmonum in thorace latentium & parenchyma vasculosum sanguineque turgescens, & eorum continuus inter respirandum motus, utrumque ulceris consolidationi obicem ponens. Vanis itaque narratiunculis adjudicandum censeo, quod in *Bonetti Sepulchreto lib. 2. sect. 7. obs. 23. p. 562.* annotatum legi de succo Nasturtii aquatici pulmones restaurante & regenerante, cujus stupendâ efficaciam commotus Chirurgus Bruxellensis ad perscrutandam intimius Curæ suæ veritatem, sanati Phthistici pectus aperuisse, nec hujus audaciæ poenam luisse dicitur, ob artis præstantiam & utilem finem sibi propositum. Credat qui velit: mihi magis arridet sincerus candor *Experientissimi Timæi à Guldenkleee*, qui *lib. 2. Epist. 2.* ingenuè fatetur, se in totâ suâ Praxi, quam 37. annos exercuerat, neminem ex iis, qui ulcere pulmonum affecti fuere, integræ sanitati restituere potuisse, etiam si nihil intentatum reliquerit, quod ad curationem hujus mali ullo modo facere posset. Aliter planè se res habet cum Phthisi scrophulosâ, quæ sedem figit in glandulis juxta trachæam atque ejus ramulos sitis, cum illæ in statu naturali vix conspicuæ à coagulatis & spissis humoribus in tumores excrescunt



scrophulosos atque morbum producunt a nullo (quantum recordor) præter *Celeberrimum Anglum Richardum Morton in Phthysiologiâ* observatum, cujus notabilia phænomena ac felicem Curam in Puero 13. annorum *Johanne Frederico Beighart* admirari mihi contigit.

Hic 30. Septembris 1715. Nosodochium nostrum ingressus malorum suorum primordia deduxit â doloribus jam a. 1712. Artus invadentibus, qui tandem sinistri genu occupantes Mense Dec. in ulcus dicti Cruris proruperant. Sequentis anni Mense April. simile ulcus adhuc supra os tibiæ apparuit, protrusis autem 7. officulis & adhibitâ aquâ phagedænicâ utrumq; ulcus Mense Oct. fuit consolidatum, nec dolores sentiebantur nisi imminentibus tempestatum mutationibus. Has inducias in Mense Jun. a. 1715. excepit raucedo, tus sis ferina, difficilis ac dolorifica deglutitio, circa quam in primis notari meretur, quod liquida haurire requiverit, nisi præmiserit frustum panis vel solidioris cibi, mediante quo potui viam redderet patulam, quale quid in œsophagi ulcere ab *Illustri Brunnero in tractatu de glandulis Duodeni cap. 10. p. 137.* observatum vidi. Mense Septembris vocis sonus ob auctam raucedinem fermè penitus defecit, ejusque vices supplere videbatur tus sis nunquam cessans. Præterea in Nuchâ oritur Vesica magnitudine dimidium florenum adæquans, quæ aperta escharossæ excoriationis ichorem viscidum continuo plorantis faciem induebat. Non incongruè hanc excoriationem dixisses fonticulum â providâ naturâ ad sublevandam respirationem positum, cum effluente hinc tenaci mucosæ semper liberius respiraret, obstructis verò hujus scaturiginis poris, periculum suffocationis immineret: tantus quidem intercedebat memoratæ escharæ cum tumescentibus in asperâ arteriâ glandulis Consensus. Phlegma, quod magno conatu expuebat, colore albicans & Consistentiâ adeo spissum glutinosumque erat, ut illud sæpius manu-



manuum ope ex faucibus cogeretur protrahere. Hisce symptomatibus, malo scilicet à cruribus per metastasin ad organa respiratoria translato, stipatum, atque revellendi, incidendi, attenuandi &c. auxiliis indigentem ægrum inveni. Quapropter 3. Octobris die excoriatae nuchæ cucurbitulam seu ventosam apponere jussi, cujus adminiculo sanguis colore fuscus cum ægri levamine exfugebatur. Exinde mihi nata occasio applicandi ad latus naturalis fonticuli Vesicatorium, quod copiosam gelatinam sperma ranarum æmulantem, & de totius lymphæ spissitudine testantem prolicuit. Miranda hujus lymphæ consistentia memorem me fecit illius Phthifici, cujus urina ita congelata erat, ut instar spermatis ranarum, aut viscosæ aquæ in matula mota fluctuaret saltem, neque facile efflueret, & elevata ligno filium duceret, teste *Reiselio in Ephemerid. Dec. I. an. 8. obs. 30.* Die 14. prædicti Mensis in utroque pede fonticulus excitatus exhibuit multum fusci humoris. Cum collum intumesceret, & sinistro ejus lateri obveniret durus & dolorificus tumor, in salivationis curâ demum evanescens Cataplasma imposui, minime spe frustratus, exinde enim quodammodo melius se habuit. Decimo octavo die circa vesperam vomuit limpidissimæ ac insipidæ aquæ ultra libram uno impetu, ac si vas effunderet, cessante suffocationis, quæ imminabat, metu, huncque vomitum per aliquot dies statotempore repetiit. Internè varia pituitosam humorum dyscrasiam corrigentia fuere adhibita, quibus facile palmam præripit Decoctum ligni Corticisque Guajaci & ex gummi armoniaco parata. Nec polychrestam Vincetoxici radicem scrophulis seu obstructis glandulis specificè dicatam, quam hoc in passu *Excellentissimus D. J. G. Elsnerus in Ephem. N. C. Dec. 1. an. 1. p. 133.* multis encomiis mactat, intactam reliqui, parum autem emolumenti accesit, usque dum duro nodo durum opponerem cuneum & ductu prælaudati *Mortoni* Mercurio, summo viscidum attenuandi remedio, opu-



pugnarem hostem hætenus invincibilem. Suscepi itaque juxta consuetam methodum salivatoriam Curam, exhibendo primam Mercurii dulcis dosin die 31. & continuando salivæ profluvium ad 22. Novembris diem, quo puerum clarâ voce, liberâ respiratione ac deglutitione, consolidatis cum euporiâ fonticulis naturali & artefactis, verbo: perfectè sanum dimisi.

Non ita pridem Prætoris suburbanæ Uxor, phthisi scrophulosâ præcedenti quoad omnia simili laborans, Consilium efflagitabat, sed cum salivationi obstaret ætas provecta & mala per longam invaluerè moram, fatis erat relinquenda, quibus etiam cessit tabe ac suffocatione extincta.

### III.

## Historia & Anatome ex Cordis Polypo demortui.

**V**ix occurrit Morbus difficilius diagnosi & eventus magis deplorati, quam quidem ille, quem satis ingeniosè Polypi Cordi inhærentis nomine, alias pisci alicui proprio insignire Medicis placuit. Si enim Curam respicias, nunquam non oleum & operam perdes, cum polypus hic metaphoricus eadem atrociam interficiat, quâ piscis, crudele illud animal, homines enecare dicitur, si *Plinio lib. 9. c. 30.* fides habenda sit. Nec meliora fata tibi promittas in dijudicando ac cognoscendo morbo, utpote cujus signa maxime fallacia prædicti piscis instar nos illudunt, qui teste *Gesnero lib. 4. de Aquatilibus p. 871.* pellem in varios, plus quam chamæleon, colores commutare solet. Hos certè scopulos ipsissimis Artis Nostræ Antistitibus evitare haud licuit, & quod mirandum, maximi Nominis Medicus *Carolus Patin*, qui in proprio corpore Polypum Aortæ aiebat, semper incertus hæsit de Causâ mortem sibi inferente. Cur itaque non condonandum esset reliquis Viris celeberrimis in diversas & erroneas sententias abeuntibus?

Con-



Constat enim ex *Alex. Knipsmacoppe Epistola de hoc Aorta polypo Appendici Ephemerid. N. C. Dec. III. an. 1. inserta*, alios pectoris aut pulmonum hydropem, asthma humoros. alios asthma siccum, alios Vomicam in lobis pulmonū vel membranarum costis adnatam, vel crudis tuberculis obsitos lobos, arterias crassis humoribus vel tuberculis obstructas, alios arteriarū aneurisma vel auctum cordis substantiæ magnitudinem, aut ejusdem ventriculorum dilatationem, vel pericardium tumore affectum, vel nimia lymphâ aut sero Cor inundans, plures crassitiem sanguinis per pulmonis vasa cordisq; ventriculos lentè trajecti, alios flatus in corde, pericardio vel quâlibet aliâ spiritali parte conclusos coniecisse. Tot formas Proteus hic tunc temporis induebat, quibus & hodie adhuc limati iudicii Medicos fallit, ex nullâ aliâ, me iudice, causâ, quam quod diversissima polyporum natura, substantia, figura, situs &c. diversa exhibeat phænomena fallaci conjecturæ ansam præbentia. Sic polypum Cor occupantem observavit *Tulpius l. 1. c. 27.* ex alba & concretâ pituitâ membranaceo involucro inclusâ; *Smetig l. 10. Misc. p. 576.* medullæ ossium calefactæ similem in utroque Cordis sinu *Sereniss. Electoris Palatini Friderici III. Th. Zwingerus in Ephem. Dec. 2. a 6. Obs. 232.* ex sero viscido in Massâ tenacem congelatum; *Christ. de Helwich Collega noster & Amicorum optimus in Ephem. Cent. 3. & 4. Obs. 142.* membranaceum & durum arctè compressum; *Bonetus lib. 1. sepulchr. sect. 15. obs. 3.* pituitosum & *sect. 13. obs. 1.* in utroque Cordis Ventriculo Carnis coctæ æmulum. *J. J. Harderus in Ephem. Dec. 2. a. 9. obs. 91.* Gelatinæ similem & *Dec. 3. a 1. obs. 18.* carnosum, qualem etiam *A de Pozzis Dec. 1. a. 4. & 5. obs. 31.* producit. In primis annotari meretur polypus Cordis lapideus Parisiis apud aliquem inventus, cuius *Valentini in Ephem. Dec. 2. a. 5. obs. 83.* mentionem fecit, qui solus sufficeret ad refutandam *T. Kerckringii obs. anat. 73.* quæ genuinam polyporum existentiam in dubium vocat, nisi *Pechlinus obs. 1. libri 2.* solidiora adhuc opposuisset argumenta.



Præterea quoad magnitudinem, formam & numerum quam maxime inter se differunt; dantur enim, qui unum, quandoque etiam qui binos, uti ex antecedentibus apparet, cordis thalamos inhabitant; qui mediocris, vel etiam, qui stupendæ sunt magnitudinis, & per omnes Cordi vicinos ramos arteriosos pariter atque venosos serpunt, quales innotuerunt *Eduardo Tyson* in Cane Islandicâ, quorum unus ex dextro Cordis ventriculo per totius venosi generis systema, alter ex sinistro per singulas arterias surculos suos spargebat, ut exsiccatum postmodum inserviret prælaudato Tyson pro schematismo ad demonstrandas vasorum sanguiferorum propagines, prout referunt *Act. Medic. Hafniens. Vol. 5. obs. 29.* Quis itaque dubitaret, aliam planè tragœdiam ludi à polypo duro sanguini affluenti fortiter resistente, quam à molli, aliam à magno & in vasa usque diffuso, quam à parvo, aliam ab unico, quam à binis utrumque cordis ventriculum occupantibus atque distendentibus? cum secundum has differentias partes Cordi adjacentes nobiliores, organa intellige respirationi atque sanguinis motui dicata magis vel minus lædantur & symptomata producantur varii aspectûs ac sensus, quæ polyporû historiam reddunt confusam, eorûq; diagnosin dubiam. His in tenebris oberranti unicè reiterata Anatome filum offert ariadnæum, quo duce elucescere tandem poterit clarior hujus morbi notitia, quæ hætenus à priori, ut cum Philosophis loquar, defuit. Quapropter & ego operæ pretiû me facturû confido, si ea, quæ ante & post mortem alicujus polypo extincti observare contigit, rudi licet penicillo adûbrem, persuasus lucis fore ut intricato huic affectui aliquid, affulgeat.

Is, de quo jam incidit mentio, Vir fuit 32. Annorum *Christophorus Kayser*, qui durâ egestate pressus anxie ac miserrimè vixit. Febrem quartanam forsan ex curis & alimentis depravatis anno 1715. circa Mensis septembris finem contraxerat, sublatam iterum Mense Novemb. haustu mixturæ ex  
pro-



proprio lotio, pipere & vino cremato compositæ. Hâc methodo se sanatum credidit ad 26. usque memorati Mensis diem, quo illum invaserunt horror, æstus ac puncturæ in pectore versus dextrilateris regionem tanto cruciatu, ut d. 3. Decembris asylum in Nosocomio nostro quærere cogeretur. Verum mox ulterius progrediebantur symptomata, & superveniebat sitis, agripna, anorexia, difficilis respiratio, tussis, anxietas præcordiorum, Cordis palpitatio atque sudor instar illius, qui Anglis quondam teste Senner-to de Febb. l. 4. c. 15. & Willisio in Pharmaceutice rationali sect. 5. c. 1. fuit endemius, noctu diuque sine induciis profusissimus, cum lotio maximè turbido pulsuque debili & inæquali. Nono tandem hujus Mensis die accessit Diarrhœa in primis notabilis, quod excretus humor talis fuerit, qualis ille, quem in Corporis cavitatibus copiosissimè reperi-tum postmodum indicabo. Cessante die 14. hoc alvi fluxu prope umbilicum durities versus os pubis se extendens ta-ctu explorabatur, atque vomitus ægrum fatigabat, qui ta-men insimul cum modo dictâ abdominis duritie evanuit, applicato tumori cataplasmate & redeunte diarrhœâ. Die 20. per aliquot horas frigus sæviebat intensum, quod exce-pit æstus, tussis ferocior sine exspuitione & tabes indies aug-menta sumens usque dum die 24. Januarii a. 1616. irrueret diu exoptata Mors omnium Miseriarum Meta.

Mihi interim animo insedebat sollicita cura de verâ hujus mortis causâ, quæ etiam ut eodem die cultro anatomico per lustraretur, dedi operam. Obstupui verò cum aperto thorace atque abdomine omnia viscera quasi oceano im-mersa conspicerem, adeò quidem utraque cavitas lymphâ flavescente erat repleta, ut ejus quantitas viginti libras faci-lè excederet, & viscera apparerent, ac si setaceâ crustâ ab extravasata scilicet ac stagnante lymphâ essent obducta. In-terea omentum â colluvie illâ putridum & in thorace pul-monum lobi cernebantur pleuræ adnati, quorum dexter



quodammodo corruptus multo minor erat sinistro. Cor autem tanquam alter œdipus perpefforum malorum scaturiginem docuit, manifestando polypum tantum, quantum sinister ejus ventriculus capere poterat, cujus substantia ceram sive concretam gelatinam flavescentem simulabat, qualem quandoque pericardium jugulati bovis continet. Vasa sanguifera rore vitali penitus ferme destituta incruentæ sectionis olim à Bilsio celebratæ memoriam revocare videbantur. His perspectis non potui non, quin crederem, & labores bajulis familiares, qui vires exhauriunt, & prægressam febrem quartanam humores viscidos semper præsupponentem & mœrores curasque, quæ ut umbra lucem concomitantur pauperiem, subjecti nostri sanguinem effecisse scorbuticum & effœtum, ipsique induxisse lentorem, ut ex hac sanguinis dyscrasiâ & pigrius procedente circulo nasceretur stagnatio atque polypus. Aliarum polyposarum concretionum originem hic non attingam, etiamsi circa membranosas & carneas allegare possem sanguinem pleuriticis & membranosarum partium inflammatione laborantibus venâ sectâ missum, cujus certè viscida ac tenax pellicula ejusmodi polyporum naturæ multum accedit. Huc etiam optimè quadraret *Bonetti obs. 100. in sepulchreti lib. 2. sect. 1.* qui 1668. vidit sanguinem per phlebotomiam emissum in Typographi Genevensis uxore carneam substantiam acquisivisse seroque innatantem, quæ aquæ calidæ immersa indissolubilis permanfit musculosæ carni omninò similis. Sed lubet potius nostri polypi genesi inhærere, quam omnium optimè me explicaturum spero, si sequentia *Loweri* verba in tractatu de Corde cap. 2. p. 92. seq. mea faciam: *Si Cordis systole, quâ liquor sanguinis conquassatur usque & ad ventriculorum latera & vasorum parietes alliditur, diutius elanguescat, succusque ejus nutritius in partes secedere, grumescere & gelatinæ in modum incrasari tandemque intra fibras Cordis hinc inde pendentes implicari*



Et ipsis ventriculorum parietibus accrescere Et à Cordis aestu indurari incipit, eaque quantitatis mole sæpe numero augetur, ut utramque Cordis cavitatem ferè impleat, motumque ejus multum diminuat.

Restat adhuc, ut sudoris, nimborum instar totum corpus ad ultimum vitæ articulum inundantis, lymphæ in thorace ac abdomine effusæ, diarrhœæ ejusdem indolis lympham ejicientis & duritiei in abdomine notatæ rationem reddam, sepositis reliquis phænomenis, quæ præsentē Cordis polypo nunquam non obvia ulteriori scrutinio vix indigent. Medicis itaque principiis maximè consentaneum statuo, quod, remorâ motui sanguinis venosi per polypum injectâ, arteriæ se in venas sanguine stagnante nimium turgescerent liberè exonerare amplius nequeant, ut hâc ratione totius corporis glandulæ sanguiferis vasis interjacentes à sanguine arterioso, quam à venoso in progressu multum impedito infarciantur. Quapropter aliter fieri non potest, quam ut lymphatica hæc secretoria à violento sanguinis appulsu meatus acquirant excernendo humori apertiores, & in eis tanquam in filtris omne serum seu succus nutritius solito abundantius à sanguine fecernatur. Cum verò hæ cisternæ tantam lymphæ copiam capere non possint, quid mirum? si per dilatatos poros glandularum, quæ abdomen ac thoracem spectant sub specie hydropis pectoris atque ascitis, quæ in intestinis disseminatæ tanq. in diarrhœa, & quæ miliares corporis peripheriam occupant, uti in sudore Anglico succus nutritius largissimè effundatur, atque venis & arteriis serosâ sanguinis parte tandem spoliatis nil nisi fibrosa remaneat. Illustrat hanc hypothésin experimento sole clariori *Lowerus de Corde c. 2. p. 82.* scilicet, ligavit canem venam cavam & cane mortuo ac dissecto invenit in abdomine magnam feri quantitatem, non aliter, quam si Ascite diu laborasset; ligatis verò jugularibus saliva &



lacrymæ copiosè fluebant, & post mortem tumefactæ partes non sanguine extravasato turgebant, sed omnes musculi & glandulæ sero limpido maximè distentæ & admodum pellucidæ apparebant. Quod duritiem antea memoratam concernit, eam à spasmodicâ musculorum abdominis atque peritonæi contractione ac crispaturâ originem duxisse mihi videtur probabile, nihil enim ejusd. commatis post mortem se conspectui obtulit præter lympham in abdomine extravasatam, quæ distendendo & quocunque modo peritonæum irritando dolorificæ sensationi & spasmis occasionem præbere potuit.

IV.

## Historia & Anatome defuncti ex Polypo arteriæ pulmonali inhærente.

**A**D abstrusissimas Polyporum technas magis magisque manifestandas è re erit annectere historiam extra Nosocomium à me observatam, quæ quoad Causam morbificam antecedenti similis, quoad reliquas verò circumstantias diversa est.

Concernit hæc Tragædia Virum à teneris annis Castra & Cæsaris & Polon. Regis Augusti sequutum, ætatis 33. ann. temperamenti plethorici, cujus vitæ genus vel me tacente præsupponit varia Bellonæ incommoda sanitati & vitæ insidias struentia, quibus accedebat ultimis annis cum in Poloniâ militiam faceret, vini adusti abusus, endemii instar morbi huic Regioni familiaris. Cum Posnaniâ Vratislaviam aëre vernali pluvioso venire raucâ voce Catarrhum indicabat, de quo tamen parum sollicitus, quoniam absente febre satis benè adhuc se habuit. Verum d. 24. Martii anni 1716. in platea obambulantem ex improvviso invasit Asthma convulsivum, quod fauces vehementer constringendo viam præcludebat aëri, faciei colorem in-



inducebat lividum ac obscurè nigrescentem instar fune suffocati, oculos horridè protrudebat, pulsus intercipiebat, sudores profusissimè fundebat, sensus atque loquelam auferebat, præcordiorum palpitationem provocabat, pedes vicissim motibus convulsivis infestabat, verbo: plenaria subsequuta fuisset suffocatio, nisi venæ sectione largiter institutâ circulum sanguinis revocassemus. Sublato hoc paroxysmo restabat virium debilitas, difficilior respiratio, frequens lymphæ spumescentis exspuitio, fitis intensior, dolor in pectore sub dextrâ papillâ & in dorso circa humeros constanter perseverans, uti etiam durities, quæ propè Cordis scrobiculum tactu explorari poterat. Appetitus non multum fuit immutatus, nec alvus officio suo destituta, lotium autem mox naturaliter tinctum, mox verò, inprimis post paroxysmum, maximè turbidum. Adhibui itaque varia spasmodicis affectibus dicata unâ cum Potionibus demulcentibus, & cum binis sequentibus septimanis iterum hæc scena luderetur, consultum duxi in auxilium vocare applicationem hirudinum ad hæmorrhoidalia vasa, vesicatoriorum ad suras & Cataplasmatibus emollientibus ad pectus, quod omnium optimè prodesse videbatur. Nihilominus tamen stupendi hi Paroxysmi, qui hæctenus hebdomadatim sævierant, postmodum datâ levissimâ causâ vel commovendo corpus, vel fortius tussiendo, vel deglutiendo incautius, quâlibet die & tandem singulis tribus horis recurrebant multò vehementius, ut & Venæ sectio, ad quam tanquam ad sacram anchoram confugiebamus, nos deferret, nec duabus diebus ante obitum sanguinem daret. In induciis etiam si brevissimis non satis mirari potui ægri animum fortissimum milite dignum ac spe plenum de sanitate recuperandâ, pariterque vires, quæ præsentē paroxysmo quasi sepultæ, mox iterum eo cessante regenerabantur usque dum d. 24. Aprilis suffocatio portam vitæ occluderet.

Cum



Cum circa diagnosin hujus morbi nonnulli varias fovissent opiniones, mox pectoris hydropem, mox vomicam pulmonis accusantes, non potui non, quin cultro anatomico inquirerem, annon polypus, quem semper præsupposui, tanquam anguis sub herbâ lateat, & ecce! nihil præternaturalis constitutionis in hoc cadavere apparuit, nisi pulmones nigricantibus punctis â sanguine stagnante notati, pauca feri in pectoris cavitate & pericardio extravasati quantitas, atque polypus membranaceo-fibrosus arteriam pulmonalem prope dextram Cordis auriculam inhabitans.

Firmo itaque stat talo, polypum modò memoratū causam fuisse omnium symptomatum & ipsius mortis, impediendo penitus sanguinis progressum ex dextro Cordis thalamo, â quo difficiliore, ne dicam penitus sublato sanguinis cursu & nervorum, asperæ arteriæ membranarumque spastica contractio & feri per glandulas violenta expressio in pericardium atque pectus, quale quid nunquam non in asthmate suffocatis se observasse asserit *Celeberr. F. Hoffmannus in Diss. de generatione mortis in morbis*, ibique sibi associat testes *Pisonium & Baglivium*. Præterea nullus dubito, hujus Polypi natales in dextro cordis ventriculo vel potius intra ejus valvulas quærere, quibus adhuc inhærens non multum molestiarum causa fuit, protrusus verò in angustius habitaculum, intellige arteriam pulmonalem, primordia dedit lethalibus symptomatibus, cujus hypotheseos analysin invenies in *J. D. Gohlen tr. germanico de Polypo Cordis ex neglectis hæmorrhoidibus sub schemate Asthmatis convulsi p. m. 22.*

Duritiem circa cordis scrobiculum annotatam ejusdem originis credo cum illâ, quam in antecedente observatione allegare lubuit.

Hæc scribenti communicatur de Morte *Potentissimi & Serenissimi Electoris Palatini* Relatio, quam hîc inferere audeo,



deo, cum Historiæ polyporum & studio medico possit esse emolumento, eoque nihil antiquius habere sciam per-illustrem Relationis Autorem *Brunnerum*, cujus veniam publicandi vel hoc nomine mihi polliceor. Conscripta est germanico idiomate, quæ Latio donata sequenti modo se habet.

„Serenissimus Elector gloriosæ Memoræ ab aliquot an-  
 „nis obnoxius fuit variis iisque periculosis morbis, inpri-  
 „mis an. 1711. prodromis apoplecticis, quos excepit febris  
 „continua alternis diebus paroxysmo ceu hemitritæosti-  
 „pata; accedebat postmodum inflammatio ac tumor to-  
 „tius faciei ad œsophagum & superius ventriculi orifici-  
 „um usque pertingens, singultusque per biduum sævi-  
 „ens. Sequutus fuit tumor dextræ maxillæ durus, reni-  
 „tens cum summo dolore instar Parotidis, qui ad matu-  
 „rationem perductus aperiebatur tandem motus invo-  
 „luntarii seu convulsivi utriusque pedis, quæ sympto-  
 „mata, licet summum vitæ periculum involverent, adeo  
 „feliciter vicit, ut & DEO benedicente ex ardenti Zelo  
 „erga Sac. Cæs. Majestatem iter Francofurtum Coronati-  
 „onis actui interfuturus suscepit, quod ob continuam  
 „Corporis debilitatem ægrè absolvit. Altero anno Sere-  
 „niss. Elector Bensbergi veram patiebatur apoplexiam, ab  
 „ea tamen assistente Divino Numine quomodocunque  
 „fuit liberatus, excepto sensu aliquo molestissimo instar  
 „fortissimi fumi ab igne producti nares feriente, quem sæ-  
 „pius etiam fauces, imo & pectus occupantem extirpare  
 „non dabatur.

„Præterea per plures annos Serenissimo multum negotii  
 „fecerunt Pectoris morbi, utpote difficilis respiratio, ca-  
 „tarrhi pertinacissimi, quibus sæpius sputum cruoris ac  
 „phlegmatis spissioris coagulati fuit conjunctum, post  
 „animi aut corporis motus vehementiores, palpitatio cor-  
 „dis, asthma convulsivum, exspuitio lymphæ spume-  
 „C  
 „scen-



„scentis sanguinis tinctæ cum sono stridulo, id quod post  
 „ea sæpius accessit, quando Serenissimus venando cer-  
 „vum è longinquo animadvertens interficere intendebat.  
 „Alias Serenissimus sæpissimè & fermè quotidie sputum  
 „coagulatum tempore nocturno collectum cum striis  
 „sanguinis excrevit, quandoque conquestus fuit de respi-  
 „ratione difficili in ascensu acclivium, atque catarr-  
 „his.

„Nunquam Serenissimus Elector ratione Pectoris se me-  
 „lius habere videbatur, quam præter lapsis Mensibus Mar-  
 „tio & Aprili, cum respiratio ipsi esset liberrima etiam af-  
 „cendendo scalas, & sputum penitus cessaret.

„Præsentis anni primo Maji die cum gravissimi pectoris  
 „affectus grassarentur, accersor unâ cum sacerdote, qui  
 „Serenitati erat à Confessionibus R. D. P. Urban horâ pri-  
 „mâ nocturnâ ad Sereniss. Electorem. Quem inveni  
 „prope lectum in sella sedentem pectore constricto & qua-  
 „si sine omni respiratione cum sono stridulo, ac expui-  
 „tione lymphæ spumescentis sanguine leviter tinctæ &  
 „pulsu vix notabili, extrema erant frigida cum suffocati-  
 „onis periculo. Sectâ venâ & imperatâ summâ animi ac  
 „corporis quiete &c. Serenissimus videbatur revivisce-  
 „re. Prædictâ horâ sequentis ac tertiæ noctis redibat pa-  
 „roxysmus asthmaticus, & quidem remissiori gradu, ve-  
 „hementius verò alterâ nocte. Adhibitis ex communi  
 „consilio nonnullis pilulis, & applicatis vesicatoriis hi  
 „paroxysmi fuere propulsi, ut Serenissimus iterum com-  
 „medere, bibere, dormire, mensæ interesse, in porticu,  
 „observato debitè regimine, obambulare valeret.

„Die 20. Maji & subsequente nocte hostis, novis quasi  
 „recollectis viribus, multò majori vehementiâ invasit;  
 „aderat pulsus celer, frequens, exilis, urina pauca, in-  
 „tensè rubra, inflammata, nec ullus cibi potusve appeti-  
 „tus. Cum metueretur inflammatio in pectore, & in  
 „pri-



„ primo insultu vix 3. Unciæ sanguinis ob summam viri-  
 „ um prostrationem mitterentur, hâc vice ê re esse judi-  
 „ cabatur 6. vel 7. sanguinis uncias detrahere, ex quo quî-  
 „ dem hic paroxysmus mitior factus, sequenti verò nocte  
 „ ac postea tres vehementissimi supervenerunt.

„ Equidem in usum vocabantur pristina eaque quondam  
 „ salutaria remedia, sed non cû eodemo pto effectû, siqui-  
 „ dem asthma hætenus periodicum degeneravit in continu-  
 „ um tanto cum cruciatu, ut Serenissimus noctu diuque ob  
 „ suffocationis metum lectum relinquere, continuo in sel-  
 „ lâ permanere cogeretur & difficillimè spiritum trahe-  
 „ ret. In his rerum circumstantiis tumor, qui ante ali-  
 „ quot annos in pedibus occurrerat, denuò emerfit ad  
 „ abdomen usque se extendens, inprimis in dextro pede;  
 „ pulsus observabatur in horas, quin in momenta debilior  
 „ urina flammea diminuebatur; aderat singultus cum fe-  
 „ bre continuâ, ut exinde decrefcentibus viribus præcor-  
 „ diorum ac pectoris angustia evidenter augmenta sume-  
 „ ret, donec supremum Numen Serenissimum Electo-  
 „ rem die 8. Junii manè ante septimam horam sensibus  
 „ integerrimis ex statu hoc miserrimo & adstantibus lu-  
 „ ctuosissimo per beatam mortem ad sempiterna gaudia  
 „ transferret.

„ Jussu superiorum d. 9. Junii Pollincturæ manus admo-  
 „ vebantur. Apparuit facies hippocratica & pallida, re-  
 „ liquum corpus satis naturaliter constitutum, pedes maxi-  
 „ me tumentes ad abdomen usque, eorumque cuticula  
 „ hinc inde separata ibi sero madebant, quod copiosè pro-  
 „ manans magnâ quantitate substrata linteamina imbibe-  
 „ rat; in spina dorsi notabatur sugillatio moribundis nun-  
 „ quam non familiaris.

„ Aperto à Profectore Pectore in simul atque abdomine,  
 „ in illius latere dextro novem, & in sinistro septem un-  
 „ ciæ feri turbidi extravasati fuere inventæ; pulmones co-



„loris erant fusco-nigricantis non citra inflammationis  
 „signa. His lustratis superius versus claviculam finistram  
 „pariter atque dextram in conspectum veniebat notabi-  
 „lis inflammatio. Pleura forsan ex magnâ respirandi  
 „contentione â costis, inprimis supra musculos interco-  
 „stales quasi avulsa & hinc inde flatibus distenta erat.  
 „Stomachus circa inferius & superius orificium valdè ob-  
 „servabatur inflammatus, hepar autem, lien & renes  
 „absque omni labe. Vesicula felle continebat calculum  
 „oblongum, asperum ponderis 3iß. In intestinis nullum  
 „occurrit vitium, nec in abdomine serum extravasatum,  
 „in corde verò *duo* fuere *Polypi* unâ cum sanguine nigro  
 „coagulato. Remoto cranio apparuere in corpore fal-  
 „ciformi nonnulla osficula oblonga cuspidata & in utro-  
 „que cerebri ventriculo lymphâ copiosâ limpidissima, re-  
 „liqua cerebri substantia erat firma, nitida. De cætero  
 „in corpore pinguedo ubique observabatur. Dusseldor-  
 „pi d. 10. Jun. 1716.

*Brunnerus.*

V.

## Historia Anasarcæ per exanthemata criticè sublata.

**Q**uem morborum genealogiam perscrutari non piget, ille haud rarò inveniet natales eorum ab aliis diversi generis morbis repetendos. Quotidiana enim experientia confirmat, paralyfin quandoque succedere epilepsiæ & colicæ passioni, melancholiam manicæ, phthisin aut empyema hæmoptysi, pleuritidi ac peripnevmonia, hydropem pectoris asthmatis, passionem hypochondriacam ac hystericam febribus intermittentibus, diarrhœæ atque dysenteria, ischuriam, stranguriam & ipsissimam luem veneream gonorrhœæ, pedum œdemata, cachexiam, anasar-



farcam ac ascitem Hæmorrhagiis, febribus in primis quartanis, omnibusque gravioribus morbis, quorum autem & similibus successuum Catalogum conscribere hujus loci non est. Incumbit tamen quam maximè prudenti Medico, ut in indolem hujus mutationis, dum morbus in alium morbum convertitur, sollicitè inquireat, & ex Artis fundamentis judicet, an sub tali metamorphosi crisis, quæ Galeno in *Comment. de Vict. acut. 11. 15.* perfecta liberatio dicitur, lateat. Liberatur certè æger ab antecedentibus malis, dum *natura*, ut cum Baglivio *l. 1. Prax. Medice p. m. 67.* loquar, *sui conscia, crises moliendo magis proficit, quam Medicus suis remediis.* Expellit hostem oportuno tempore & per loca morbi genio accommodata, suisque ministris viam digito quasi monstrat, quam sequi debent. Quis enim Medicorum nescit morbos sublatos per spontaneam & criticam diarrhœam, alios per diuresin, multos per largam diaphoresin ac diversa exanthemata, & nemini, juxta *J. A. van der Linden in select. Medic. Exerc. 15. p. 693.* crisin obtingere, nisi ejectâ materiâ, quæ fomes erat morbi. Sic hoc anno quartanas febres, quæ Medicis multum negotii fecerunt, sæpius spontè superveniens scabies, in spectatore, delevit, & dum hæc scribo, Zythopolæ M.S. Medicinam facio, quem â catarrho suffocativo Podagra, ab hac squamosa exanthemata cum summo pruritu totum corpus occupantia liberarunt & integræ sanitati restituerunt. Nec desunt, fateor, nonnulla exempla, quæ varios motus criticos enumerant, quibus ejectus fuit, qui crescit indulgens sibi dirus Hydrops. Exhibent nostræ *Ephemerides Dec. 1. an. 8. obs. 73.* Adolescentem Anasarcâ correptum per 5. magnos abscessus spontè prorumpentes sanatum, *Dec. 2. an. 8. obs. 70.* Asciticum & œdemate laborantem ex abscessu in scroto restitutum, *Dec. 1. a. 3. obs. 339.* Hydropicum, cui ulcera in cruribus orta, ex quibus magna aquæ copia effluxit, salutem attulerunt, & celeberrimus



*Bartholinus in Hist. Anat. Cent. 3. Hist. 23.* mentionem iniecit famuli 20. ann. cui sudore spontaneo hydrops detumuit.

Operæ tamen pretium erit ex Nosocomii nostricivibus Juvenem *Heinricum Blusga* 19. ann. in scenam producere, qui perfecte sanus d. 10. Mart. a. 1716. latrantem stomachum pane recenter pisto & adhuc calente obruendo ac frigidam aquam superbibendo sensit, sequenti nocte faciem ventremque tumidum. Urgenti huic symptomati venæ sectione occurrere satagens, quam etiam d. 11. ejusd. Mens. in brachio instituit, incurrebat anasarcam seu leucophlegmatiam. Accessit difficilis respiratio, quæ suffocationem minabatur, nausea ciborum & lymphæ fluxus ex pedum horridè tumentium peripheria; urina verò non multum à naturali consistentiâ ac colore deflectebat. Sub hac larvâ intrabat charitatis hospitium d. 14. Martii, exceptus à me medicamentis anticachecticis, aperitivis, diureticis ac corroborantibus. Ex his inprimis maximarum virtutum expertus fui pilulas polychrestas Beccheri quo- & libet mane ad 9j. salia digestiva horis pomeridianis ac vespertinis in decocto trifolii fibr. exhibita, quorum energix merito adscribo, quod die 20. prædicti mensis vix vestigia amplius prostant de hydrope, cessantibus in simul reliquis morbi symptomatibus. Sed ecce, aliam induerat faciem hostis ab antiscorbuticis profligatus, nondum verò penitus victus. Decrescente tumore hydropico efflorescebant exanthemata sub specie pustularum, seu ulcusculorum cutem, inprimis manuum, defœdantia, quæ unicè pruritu molesta d. 30. exsiccabantur & sexto Aprilis decidebant. His observatis pustulis, quæ discretas infantum variolas adæquabant, naturæ in crisi adjumento esse intendi cum expellentibus antiscorbuticis, qualia censentur Ess. anticachect. cum R ʒij. ꝑss. & ex pulveribus fl. Aris, ʒ diaphor. pul. viperar. ʒ nat. haud seposito trifol-



*ad Hist. 6.*









trifolii fibrini decocto. Nec spe fui frustratus, integerimè enim sanum dimisi d. 7. Apr. qui antea censebatur morti proximus ob gravem morbum, quem secundum *Divi Coi* effatum de *inter. affect. sect. 27.* pauci effugiunt.

Verum culpabilis arrogantiae reus essem, si meis viribus felicem hunc eventum unicè adscriberem, cum, uti superius ingenuè monui, crisis talis ut plurimum Naturæ opus sit, quod medicum cautè promovere, & nunquam perturbare decet. Itaque potius persuasus sum, quod notabilis diætæ error, & præposterè administrata venæ sectio humoribus irregularem ac vitiatum motum ac cacochymiam impreslerint, hincque ansa data fuerit extravasationi lymphæ intra musculos stagnantis, quæ tandem à vigore & robore naturæ ad glandulas subcutaneas delata, tanquam spissior formavit pustulas suppurantes. Nec ullus facile mirabitur, quod intra tam breve temporis spatium tanta in corpore alias sano producere potuerit mala panis recens pistus ac frigidaë haustus, qui sibi in animum revocat quotidiana exempla puellarum ab esu ejusmodi panis menstrui fluxus obstructione & chlorosi affectarum. Innumescit certè in ventriculo hæc ad digestionem ineptæ moles instar spongiæ, adeò, ut distendendo, obstruendo, condensando humorum secretioni obicem ponat, & promoveat violentam feri expressionem ad partes fibrosas. Accessit incongrua venæ sectio, quæ in quolibet hydrope non potest non accelerare progressum.

## VI.

### Historia febris quartanæ abdominis tumore & diarrhœâ sublataë.

**C**Riseos studio, quod cuilibet medico curæ cordique esse debet, intentus, febrem quartanam rarâ crisi sublata adhuc in medium proferre lubet. Superius quidem



dem innui, me in scabie felicem quartanarū finem aliquoties observasse, qualem etiam *T. Bartholinus* ex propriâ Praxi, & ex *Platero*, *Ballonio*, *Sylvatico* in *Hist. anat. Cent. IV. hist. 35.* annotavit. Haut tamen recordor tumoris cum Diarrhœâ, qui modò dicto affectui pertinacissimo medelam attulit, cum notatu eò dignior, quò periculosiores alias tumores quartanæ feбри supervenientes censentur, & in *Boneti Sepulchreto lib. 1. de ventris tumoribus* infausto comprobantur exemplo. Contigerunt benigniora fata Juveni Coactiliario *Johanni Christophoro Heinrich*, qui a. 1715. d. 14. Septemb. febre quartanâ correptus d. 28. ejusd. Mensis Nosodochium petiit. Febris mox relinquebat ægrum, ut ab eâ ad sextum usque octobris penitus liber esset, quo die redibat more consueto. Datis evacuantibus & salinis corrigentibus chinata tandem superaddidi, quæ verò virtute suâ adstrictoriâ non impediverunt, quo minus d. 14. ejusd. mensis se associaret Diarrhœa intra biduum ultra 90. alvi dejectiones causans. Eodem tempore, quod mireris, abdomen ad sinistram lineæ candidæ latus tumorem farciminis instar portentosum, duritie ac intensissimo dolore notabilem conspectui dedit, qui, prout schema monstrat, juxta muscoli recti ejusdem lateris ductum protendebatur. Aderat insimul æstus ac fitis maxima, vigiliæ, tantaque virium postratio, ut se in lecto erigere non valeret. Hæc symptomata me induxerunt ad celebrandam venæ sectionem, ex qua sanguinem collegi purulentum, qui coagulatus tegebatur cuticulâ diversi coloris tenacissima, ut cultri aciem eluderet, qualis pleuriticoꝝ ac membranosoꝝ tendinosoꝝque partium inflammatione laborantium esse solet. Interno usui destinabatur decoctum ex herbis & radicibus resolventibus, quas inter primas tenebat radix rubiæ tinctorum pro hoc scopo nunquam satis laudanda. Hoc interdiu calidè propinato haud neglexi circa vesperam pulverem contra casum Aug. & diaphoretico



tico mixtum in aqua herb. chærefolii exhibere. Externe voto correspondebat cataplasma ex resolv. emollient. & carminativis speciebus tumori sæpius applicatum. His armis cedebat & tumor, & Diarrhœa, quam ut symptomaticam considerari, & reliqua mala, ut die 17. Octobris nullum alicujus morbi indicium superesset, nisi præternaturale lotium, albicans scilicet & crassum. Paulò post de visu obscuro sinistri oculi, quasi nube obducti conquerebatur, cui vesicatorium nuchæ impositum auxilio fuit. Reliquit tandem Lares nostros d. 28. Octob. perfectè sanus atque incolumis.

Si hîc suspicioni locus esset, statuerem, causam febris quartanæ materialem, quæ in lymphæ lentore consistit, ad Pancreas, omentum ac intestinorum glandulas translata, ibidem excitasse quasi aposthemata, quæ exterius tumorem repræsentarunt, & per intestinalem fistulam, non minus quam per urinarias vias exitum invenerunt, ut hâc ratione sublatâ per corporis excretoria causâ tolleretur effectus; scilicet Febris quartana. Nemini hoc mirum videbitur, quem mirandæ corporis metastases â capite sæpius ad calcem factæ, quarum viam vix sensu concipere possumus, non latent.

## VII.

### Historia Cataleptici sanati.

**C**Um celeberrimus Medicæ Praxeos Antecessor *H. ab Heer* non mille Catalepticos, ex quo morborum cohors terris incubuit, in *observ. rarior. lib. 1. obs. 3.* statuatur; Ipseque *Ogerus* sexaginta annorum Practicus ingenuè fateatur, se nullum præter unicum vidisse, non morabor meam de rarissimo hoc affectu experientiam publici juris facere. Invenies quidem ab *Illustri Franco à Franckenau* in *Ejus notis ad P. Zacchia Quæst. medico legales lib. 2. tit. 1. quæst.*



15. p.m. 187. consignatum satis prolixum Catalogum autorum, qui in describendâ hujus morbi historiâ defudarunt; sed ex judicio prælaudati magni nostræ Reipublicæ syderis eum forte viderunt nunquam, sed aliorum fide nituntur, alii etiam tam temerarii sunt, ut fingant.

Hujus suspicionis culpam certè non incurram, quoniam am mecum plures admirati fuère mira catalepticos symptomata, quæ in nosocomio nostro conspicienda obtulit A. P. ætat. circiter 40. an. ære alieno obrutus Halberstadio Vratislaviam veniens. Tenebris libenter involverem hæc sinistrae fortunæ fata, nisi in enucleandâ causâ occasionali utramque facerent paginam, & in animi pathematibus, quæ inter primas tenet ira, mœrorque, ut plurimum fons ac origo totius mali consistat. Salutavit lares nostros d. 29. Julii a. 1715. febre tertianâ correptus, quæ trium horarum frigore quemlibet paroxysmum inchoans mox per septimanam plenarias concedebat inducias, octavo verò Augusti die Febris continuæ atque malignæ sævitiam in continuo ac intensissimo æstu, deliriis, omnimoda virium prostratione, linguâ ficcissimâ ac asperâ &c. repræsentabat. Eo tempore, scilicet per 10. dies ne micam quidem ciborum assumsit, vixque persuaderi potuit ad bibendas aliquot ptisanæ guttas, nec mucilaginem ad humectandas fauces admisit, nisi violento modo aperiretur os. Cum fermè omnia censerentur deplorata, longè crudelior adhuc hostis d. 18. ejusd. mensis ægrum aggressus fuit, quem hoc 17. Præxeos meæ clinicæ anno primâ vice subsequenti forma cognoscere contigit. Expansis brachiis curibusq; quasi fulmine tactum aut gelu rigidum sine omni motu ac sensu situ supino jacentem in lecto vidi, cujus os firmiter erat clausum, oculi aperti pariterque immoti. Jurasses hunc hominem transmutatum fuisse in statuam ex marpesiâ caute attonito vultu sculptam, facilius enim commovisses hujus partes, quam nostri catocho prehensi caput aut reliqua



liqua membra. Non diffiteor hunc aspectum sæpius mihi in mentem revocasse Lothi uxorem in salinam statuam conversam, cujus metamorphosin *Bartholinus de morb. bibl. c. 3. p. 5.* adscribit sali ex corpore in superficie ejus se coagulanti, eodem modo ac bilis in iëtericorum corporum superficie restagnare solet, & sulphureo fumo ab eâ ore facieque ad urbem conversâ ex Sodomâ ardente excepto, qualis fumus ad enecandum sufficit. Si in Theologorum campis exspatiari licitum esset, vix dubitarem asserere aliquid cataleptici hîc latuisse, cum & metus, terror ac vehementes animi commotiones ut causæ occasionales procul dubio præcesserunt. Nec desunt observationes fide dignissimorum virorum, ex quibus multum lucis miracuoso huic casui affulget: Sic *P. Zacchias in Quæst. medico-leg. ex Cardano* allegat octo messorum in Insulâ Lemno sub quercu cœnantes, qui sub eâ specie, quâ discubuerant, rigidi permanserunt, ita ut unus comedere, alter ori poculum manu admoveere, alius bibere videretur, cumque omnes nigri essent, imaginem totidem statuarum repræsentarunt. *Buchananus lib. 6. de rebus scotic.* aliquem producit, qui in mediis scalis, quas ascendebat, subito stupore correptus, ita gradibus adhæsit, ut nec ullâ ratione divelli potuerit, & viam sequentibus præcluserit. Inprimis huc quadrare censeo catalepsin statariam, cujus Magnificus *J. M. Fehr in Ephem. Dec. 2. a. 1. obs. 1.* meminit. Vidit scilicet puellam 15. annorum, quæ sæpius de die inter eundum in mediâ viâ instar mercurialis statuæ consistebat, oculis apertis non videbat, non audiebat in clamata, nec se loco movebat, nec unquam cadebat etiam graviter onerata, nec onus deposuit aut projecit. Sed ne extra oleas vagari videar, de meo cataleptico adhuc mihi annotandum restat, similem paroxysmum primâ septimanâ per duas durasse horas & intra 24. horarum spatium vel septies recurrisse. Postquam verò capitis vertici applica-



re jussi bufones in pulverem redactos & mediante bombyce sacculo interpassato inclusos, nec tam diu persistebat, nec tam sæpè recurrebat paroxysmus, quem tandem post 14. dies (non neglectis antispasmodicis, liquore Cc. succinato, castor. &c.) penitus suffocavi vesicatoriis fortissimis nuchæ, furis, brachiisque impositis, in quibus DEO assistente totius curæ cardo videbatur consistere. Quoties finiebatur congelationis hujus insultus, toties cum pulsu debili tanta aderat virium debilitas, ut vix loqui potuerit, quam adhuc augebat profusissimus sudor, nunquam non succedaneus nervorum structuris. Præterea perpefforum non recordabatur, alvus semper provocanda fuit clysmatibus, quæ tamen ne per momentum quidem retinere poterat, lotium verò involuntariè minxit, excepto paroxysmi tempore, quo & hujus profluvium plenarie interceptiebatur.

Si itaque hanc observationem cum aliis catalepsi concernentibus conferamus, eam juxta *Galenii in prorrh. c. 10.* distinctionem non mitioribus, in quibus immobiles quidem manent, vident tamen, audiunt & recordantur, quæ acta sunt, sed vehementibus, ubi nec sentiunt, nec moventur, & totum corpus habent distentum ac instar ligni rigidum & rectrices etiam actiones habent læsas, illæ solum respiratione, annumerandam esse, quis dubitaret? Non minus extra dubium positum est, in systemate nervoso ejusque contentis, quæ vel sub succi, vel spirituum, vel archæi idæâ Tibiingas, quærendam hujus morbi causam, quam, si altius adhuc repetere lubet, etiam in ipso cerebro siccissimo, duro &c. cum *H. ab Heer* cataleptici cerebrum investigante invenies. Quapropter etiam cura eò directæ, ut principium movens per revellentia, excitantia &c. admoneatur sui officii, ipsique reddantur viæ patulæ, successu non caruit, & exceptionem concessit *J. Schenckii Prognosticum lib. 1. obs. med. p. m. 71.* statutum:



*Neminem certè liberatum novimus, cui secundò catochus super-  
venit.*

VIII.

# Historia & Anatome demortui ex ani fistulâ.

**F**istula ani nunquam credo magis exercuit Medicorum  
pariter atque Chirurgorum ingenium, quam quidem  
anno præterlapsi seculi 86. cum Galliarum Rex Ludovi-  
cus XIV. eâ corriperetur. Discimus enim ex Dionis  
Cours d'Operations de Chirurgie 4. demonstr. f. 288. seq.  
Regis mandato multos tali fistulâ laborantes fuisse con-  
vocatos, ut diversa experimenta fierent, permansisse  
autem verissimum *Divi Coi de fistulis c. 1. t. 24. dictærium:*  
*Sanus non fit, si non secetur.* Hinc etiam commotus Rex  
operationem cum cultro, qui incurvatus antè globu-  
lo munitus est, hodieque adhuc l'instrument royal au-  
dit, die 21. Novemb. sequentis anni heroico planè animo  
sustinuit & ex voto sanitati fuit restitutus. Hæc cura eò  
gloriosior est, quò splendidiora largiebatur socræ Rex re-  
giâ liberalitate celebratissimus, dando nimirum chirur-  
gis Felix & Bessieres illi 50000. Imperiales, huic 40000. gal-  
cos florenos, Medicis Daquin 100000. & Fagon 80000.  
cuilibet Pharmacopœorum, quorum quatuor erant præ-  
sentes, 12000. florenos gallicos & chirurgi Felix discipulo  
400. aureos nummos gallicos (Louis d'or.) Sed hæc in pa-  
renthesi dicta sunt, cum hûc non spectent, nec ad alios  
spectare videantur, nisi ad Ludovicos, de quibus hujus  
nominis XI. simile liberalitatis regiæ specimen exhibuisse  
in Sorberianis p. 94. legimus, utpote qui Medicum Cortier  
54000. Imperialibus & Episcopatu muneravit, postquam  
ipsi per quinque menses medicinam fecerat in morbo,  
quo moriebatur. Dantur verò ani fistulæ, quæ illudunt  
manualis operationis auxilium, & *dum pus intro effundunt,*



ut cum *Hippocrate* *sect. 2. Coac. c. 11. §. 8.* loquar, *tabe ene-*  
*cant*, quarum classi sequentem annumero.

Johannes Castner 56. annor. Vir Serenissimo supremo ordinis Teutonici Magistro à Satellitio sub initium Augusti a. 1715. se fluxui hæmorrhoidali obnoxium sentiebat, qui quotidie recurrens ob debilitatem indies ingravescentem mense octob. ægrum lecto affixit. Notaverat eo tempore corporis contabescentiam ac in testino recto dolorem urentem, nec alvus erat aperta, nisi foliis sennæ dolorificè provocarentur fæces induratae sanguineque tinctæ. Appetebat interim cibum magis quam potum. Cessante demum in Januario sequentis anni fluxu hæmorrhoidali, de dolore circa regionem ossis sacri conquestus fuit maximo, quo commotus d. 1. Februarii nostrum imploravit Patrocinium. Cum perlustraretur exterius pars affectatæ in conspectum venerunt tubercula sphincterem ani occupantia, quorum maximum nucis moschatae magnitudinem adæquabat, nullique deerat cruciatus, ac si inhærerent carbones candentes. Melior verò affulsit spes sublato dolore circa sphincterem per mucilaginem ex sem. cydon. psyll. saccharoque saturni, & circa lumbos per hirudines hæmorrhoidalibus vasis ad sugendum applicatos, quibus forsan adjumento fuere medicamenta ex millefolio propinata. Reliquerat lectum usque ad 21. Februarii; accedens verò sudor nocturnus nimium debilitans, obstipata alvus, quæ tandem clysmate aperta primum scybala, postmodum mucum sanguine interspersum dabat, circa umbilicum murmura ac sonitus ac si aqua ebulliret, cum dolore ibidem furente iterum eum prosternebant. Cum igitur è re esse judicarem, ut de scaturigine mali indagandâ magis solliciti essemus, speculi animationem injeci, ægrique animum sæpius spe, quam in exploratoriam hanc machinam ponere deberet, erexi. Sed ecce! speculum sibi imaginatus visui non tactui accom-

moda-



modatum lepidè erroris nos arguit, dum pseudo-speculi ferrei usum experiebatur, quod nostris oculis obtulit intestinum rectum prædicto muco adhuc oblinitum, nullo apparente fistulæ vestigio. Protractâ hâc mucilagine dolor & ebullitionis murmura cessabant, seque melius habebat tam diu, quam diu ab hoc phlegmate liberatum erat intestinum; hoc enim successivè ibidem collecto iterum pristina cantilena ac querulæ voces audiebantur. Interim de ulcere ibidem latente non dubitans injectiones more clysmatum fieri curavi mox ex mucilaginibus sem. psyll. cydon. cum melle rosato & unguento digestivo, mox ex decocto hordei cum terebinth. & melle rosato, hisque nihil proficientibus ano suppositorium ex vitello ovorum & balsamo peruviano intrudebatur, sacculique ex speciebus carminativis vino decocti imponebantur abdomini, sed pariter frustra. Nec majus emolumentum emergebat ex curâ ranarum jusculis instituta, quam ut summam humorum dyscrasiam corrigens mihi multis encomiis deprædicavit Excellentissimus Cracoviensium Practicus D. Bonfigli, tabeque achæmoptysi consumptæ conjugii suæ præter omnium spem unice conduxisse asseruit, cujus etiam therapia in Phthisi, Tabe, catarrhis falsis &c. me iudice non è longinquo petenda est, quoniam constat, ranas insigni dulcificandi, demulcendi, humectandi virtute pollere. Forsan non ingratum erit Artis Tyronibus, si utilissimæ hujus curæ illi, quæ cum viperis nimis carò venientibus instituitur, succedaneæ methodum obiter delineam. Sumuntur scilicet quindecim vel plures ranæ, quæ detractâ pelle & sepositis anterioribus partibus aquæ fontanæ sæpius recenter affundendæ immerguntur, usque dum albissimum acquirunt colorem. Hæ postmodum hoc modo omnibus sordibus mundatæ cum aquæ destillatæ morbo appropriatæ librâ unâ in Mariæ balneo coquuntur, jusculumque inde emergens



gens calidè ebibitur, quale per integros 40. dies quotidie matutinis horis repetendum est. Lubet nonnullis flores v. g. violarum, bellidis &c. addere, ut simul decoquantur, id quod cujuslibet arbitrio relictum manet. Sed ad ægrum meum revertar, de quo notandum habeo, quod d. 3. Martii vices dejecerit alvum, excernendo mucum sanguine intermixtum, quo tempore ardor ac murmura cessabant, debilitas autem incrementa sumsit. D. 6. invadebat horror diu continuans, quem excepit febrilis æstus intensissimus, rediens d. 14. cum fluxu alvi quasi purulento & tantâ virium prostratione, ut in deliquio constitutus miserimus vix pulsûs indicia exhiberet. Die 15. de maximo pruritu in intestino recto & d. 16. de respiratione difficilimâ conquerebatur. Cum in evacuatione muci illius purulenti, qui in intestinis colligebatur, multum levaminis consisteret, ad eam facilitandam die 17. ano intrusa fuit fistula plumbea, quæ & penicillum admisit, cujus ope commodius partes hæ inungebantur. Concesso itaque materiæ exitu liberiori liberior erat respiratio, quotidie tamen observabatur calor hæcticis proprius. Die 20. apparuerunt in orificio intestini recti septem tubercula, quæ d. 5. Aprilis spontè rumpentia steatomatosam materiam instar milii cum summo foetore effuderunt. Tunc temporis cessabat dolor, respirabat melius & cibum appetebat, aberat verò somnus & post pastum insolitus æstus regionem umbilicalem occupabat, cui dolor die 25. iterum junctus omnia mutavit in pejus. Sudor nocturnus subinde molestans d. 11. Maji copiosissimus erat, & murmura dolorifica circa umbilicum, ac si aqua vehementer commoveretur, aucta, pariterque diarrhœa, quæ intra 24. horas 50. vicibus ejecit phlegma fusci coloris maximè foetens. Respiratio satis libera suppresso alvi fluxu mox fuit facta difficilis stipata præcordiorum angustiiis, quibus die 29. vomendi conatus, die 7. Junii schuria & tandem 26. ipsa mors



Mors supervenit. Aliquot ante obitum dies notatu dignum censui pulsum dextri carpi instar granorum ex plumbo procedentem, procul dubio ob spasmodicas arteriæ constrictiones, accessit etiam ædomatosus in dextro pedo & sinistrâ manu tumor, motus oris convulsivi, oculi dextri illachrymatio, cum sinistrum claudere nequiret.

De ulceris latentis præsentia quidem certus & memor definitionis, quâ *T. Paracels. in Chirurg. min. lib. 1. c. 17.* fistulam exprimit, videlicet, ubi vulnus concluditur superius excepto foramine parvo, sed inferius omnino prae-  
 existit, nihilominus mihi minimè potui temporare, quin in demortuo cadavere quærerem fistulosi ulceris ostium, quod in vivente nullibi invenire licuit. Cultrum itaque anatomicum primum direxi ad intestinum rectum, quod exterius præter vasa sanguifera quodammodo intumescencia nihil monstrabat insoliti, & lynceis opus erat oculis, si intra canalem quærere velles fistulæ introitum, adeò angustum apparebat foraminulum post sphincterem vix notabile. Sed si unquam, certè hîc parva fuerunt magnorum morborum initia; duxerunt enim me ad ulcus aspectu horridum & adeò vastum, ut versus inferiora omnes dextri clunis musculos glutæos, versus superiora verò eos, qui os coccygis & sacrum attingunt, penitus consumserit, ac in pus converterit, quod, remotis intestinis cum vesicâ urinariâ, totam cavitatem, quam ossa innominata constituunt, implebat. Ossa in pure quasi nutantia carie erant infecta, unde & hîc locum habuit *J. Vigierii lib. 3. cap. 56.* Prognosticum: *Si vertebra carie obsessæ sint, curatio prorsus impossibilis erit, ægerque tabidus & marasmodus morietur.* Reliqua abdominis viscera nihil præternaturalis alebant, exceptis renibus sebaceam materiam in utroque pelvi continentibus. In thorace pulmones steatomata ac calciformia tubercula exhibuerunt, to-  
 E tum



tum verò cadaver adeò erat emaciatum , ut sceletum cute obteſtum repræſentaret.

Qui plura fiſtularum à ſuppreſſo hæmorrhoidum fluxu (quale quid hîc meritò auguror ) originem ducentium exempla noſcere cupit , illum non poenitere poterit , ſi evolvat Magnifici noſtri Præſidis *Schræckii ſcholium ad obſ. 42. a. 1. Dec. 2. Ephem. Nat. Curioſ.* nec mihi deeſſent , quæ clinica Praxis obtulit, ſi temporis & loci ratio eorum enarrationem permetteret. Verbo ſaltem unius mentionem colophonis loco facere liceat, qui non infimæ fortis vir aulicus ex fluentibus hæmorrhoidibus cœcas, ex cœcis fiſtulam naſtus eum per decennium & ad præſens uſque tempus , quantum ſcio, pus plorantem habet. Quinquennium eſt, & quod excurrit, cum dolores capitis ſentiret atroces, horumque de cauſâ meum poſtularet conſilium , quærens: an cura ſalivatoria ipſi in Cephalalgîâ hâc ſit profuturâ? Diu ſuſpendi meam ſententiam , tandem verò mecum reputans, ancipitem caſum anceps concedere remedium , & in attennandâ purificandaque lymphâ hîc pure infectâ ac ex fiſtulâ per circulationem ſucceſſivè ad cerebrum delatâ, non inveniri efficacius remedium mercurio, conſenſum præbui; & ecce, legitimè adminiſtratâ per mercurium dulcem ſalivationis curâ, dolenti capiti medelam ex voto præſtitit, fiſtula interim in eodem ſtatu permanente. Hanc ab antecedenti obſervatione haud alienam eſſe, exinde mihi perſuadeo, cum fiſtulæ ſymptoma concernat, cujus cura eò notabilior, quò rarius occurrit in obſervatorum ſcriptis.

## IX.

Hiſtoria ulcere cruris cacoethео ultra 16. annos occultè ſerpente demortui.

**U**Lcera aperta ſæpius fonticulorum vices ſupplent, cum per ea tanquam per cloacam multa corporis excrementa



menta excernantur, & ubique prostant historiæ eorum, qui, tametsi ulcera etiam ani fistulosa, qualia *Schenckius* ex *H. Fabricii Pentateuchi Chirurg. l. 3. c. 11.* citat, per multos annos gestaverint, saluberimè vixerunt. Aliter verò se res habet cum occultis, utpote quorum sanies longè lateque in sibi obvias partes fibrosas, tendinosas, vasa & ipsa ossa sævit, eas penitus destruendo, ac in cadaverosam putredinem convertendo. Nec remotissimæ corporis partes à tali ulcere immunes permanent, quoniam hæc corruptionis semina cum sanguine & fero ulcus alluente per universam corporis machinam citò disperguntur, suâque virulentiâ ipsa viscera inficiunt, ut tandem Tabes necessario subsequatur.

Cum itaque hæc sole meridiano clariora sint, non possum non, quin inter rariora ulcus *Johannis Georgii Alexandri* sartoris, per sedecim annos in dextro femore occultè serpens, numerem. Hic adhuc puer sentiebat ibidem dolorem, & paulò post nonnullæ ossis particulæ cum sanie sibi exterius viam fecerunt patulam, ex quo simplex homo veneficium fuit suspicatus. Mox verò consolidatum non amplius attendebatur, quoniam omnis dolor, si levem aliquem tempestatum mutatione utcunque notabilem excipias, insimul evanuit. Verum cum fœnore ulceris phagedæni symptomata a. 1714. se manifestarunt, etenim præter dolorem nocturno inprimis tempore lancinantem atque atrociter pungentem, gravativus circa hepatis regionem maximè erat molestus. Nihilominus durâ paupertate coactus labores suos continuabat miserimus usque ad 15. Junii a. 1715. quo die se lecto addixit, cum ambulare amplius non valeret. Hactenus nullum ulceris indicium apparuerat exterius, die autem 19. prædicti mensis in parte affectâ notabatur tumor indies cum dolore & corporis atrophîâ augmenta sumens. Cruciatuum impatiens d. 7. Julii vetulæ cuidam facultatem concessit



cessit perforandi cum acu tumorem, sed ob viæ angustiam vix puris aliquid profluere potuerat, adminiculo autem fuit naturæ, ut spontè amplificando ostium se post aliquot dies exoneraret abundantius. Translatus in Nosocomium die 25. Julii Domino Chirurgo Rev. F. Cosmæ in examen tradebatur, qui explorandi sinus, invenit versus poplitem saccum materiâ purulentâ onustum & tantæ amplitudinis, ut integram manum capere posset, nec minores cavernas, quas superior femoris pars fovebat. Infra modò memoratum saccum durities satis magnum spatium occupans observabatur, quæ fotuum emollientium ope evanuit. Die 26. laudatus Chirurgus per utrumque majorem sinum superiorem atque inferiorem incisiones fecit, quibus detegebatur ossis femoris caries tanta, ut fermè nullibi musculus ipsi adhæreret, repleto intra os & musculos sinibus undiquaque excavatos, spatio ichorosâ sanie foetoris inexplicabilis. Superiorum sinuum unus ad os sacrum usque pertingebat, ibique exitum molitus denudatum ac cariosum illud os spatio floreni solidi monstravit. Cogitandum itaque in primis erat de removendâ carie, cujus extirpationem Rev. D. Frater Chirurgus effecit partim specillo ferreo (einem Meißel) quod malleo, ne resileret, plumbeo percussum separabat cariosas ossis laminae, asperso postmodum pulvere radicis aristolochiæ rotundæ; partim, ubi instrumentum applicari haud potuit, solâ aspersione pulveris ex rad. aristoloch. rot. virid. flor. angel. euphob. olibano, aloë, myrrhâ compositi. Hic operandi modus non quidem destituebatur exoptato successu, vidimus enim jam accrescere ossi carnem; Verum tormenti atrocitas (si de saluberrimis chirurgiæ auxiliis ita loqui licet) tot expressit misero ejulatus, ut omnes adstantes ad commiserationem commoverentur, exceptâ uxore Xantippe, quæ ex more ejusmodi furiarum, quibus, credas, non datur gravius onus, hilari fronte mariti lamen-



*ad Hist. 10.*

*Vera Magnitudo.*

*ad Hist. 23.*









lamentationes sustinuit. Sanè quoties huic supplicio intereram, toties recordabar judiciosæ querelæ, quam de Chirurgis Indi ducunt, & his verbis conceptam legi *dans les Memoires de Monsr. le Comte p. 306. On Vous traite en Europe avec le fer, icy on nous martirise avec le feu; la mode apparemment n'en changera pas, parceque les Medecins ne sentent pas le mal, qu'ils nous font, & qu'ils ne sont pas moins bien pagés pour nous tourmenter, que pour nous guerir.* Cum verò in nostro Noscomio omnia gratis fiunt, & misericordia, quantum per saluberrimam artem licet, hîc nunquam exulat, ad illos chirurgos hæc joco-seria spectare videntur, qui supplicium sumunt de ægrorum suorum corpore ac crumenâ. Noster ex morbi diuturnitate omnibus viribus exhaustus non amplius par erat curæ hîc requisitæ, inprimis cum febris vulneraria illum nunquam relinqueret, & postquam d. 6. Augusti uterque pes sinister circa taleolum ac dexter usque ad genu intumuerat, die 26. omnimoda lotii suppressio ex vicino sphincteri vesicæ ulcere superveniret cum dolore inflammatorio in abdomine, quæ atrocissima symptomata vitæ finem die sequenti fecerunt.

Audacius post mortem ferro perscrutabamur hoc pessimi moris ulcus, sinuum numero & capacitate feracissimum, inveniebamus omnes atque singulos musculos ossa dextri lateris, scilicet femoris, ilii, coxendicis, coxygis & sacrum investientes adeò destructas, ossaque innominata ubique cariosa, ut magis mirum, quod tam diu potuerit vivere, quam quod demum anno 1716. sit mortuus.

## X.

### Historia & Anatome Phthifici.

**E**Nse cadunt multi, perimit sed crapula plures. Perimit etiam hæc Pestis G. J. B. Virum 30. annor. facetiis deditum & ludicro hoc vitæ genere favorem Magnatum



captantem. Ultimis vitæ suæ annis morionem egerat apud Ducem bellicum, quem ad Castra comitatus & comedendo & bibendo sanitatem semper nauci penderat. Ipsemet fatebatur se halecibus & caseo vesci diu in deliciis habuisse, crematum verò & cerevisiam ingurgitasse noctu diuque heluonum more. Ne de veneris illecebris dicam, quibus irretitus dignum hoc labore brabeum, veneriam scilicet Luem lucratus fuit, ut tandem mulctæ reus se subjiceret salivatoriæ curæ, quam verò patientiâ destitutus juxta methodum non absolvit. His præmissis erroribus anno 1715. Mens. Aug. sequebatur tussis cum dispnoeâ & Mens. Septemb. rauco cum phlegmatis albicantis exspuitione pariterque virium jacturâ ac contabescentiâ. Cum die 12 Decembris intraret Nosocomium præter dictas querelas dolorem punctorium sub dextri lateris claviculâ accusavit, cedebat verò & hic dolor adhibitis externè linimentis ac vesicatoriis ad suras, internè infusis, decoctisque ex pectoralibus, solventibus &c. & appetitus comedendi mox erat melior, vocisque sonus clarior. Verum d. 29. Decembris omnia mutabantur in pejus, invadente ægrum tussi graviori, respiratione difficillimâ, pedum tumore atque antecedenti pectoris dolore, quæ symptomata mitiora erant, si desistebat â motu. Die 31. profluxit lotium copiâ & pituitoso muco matulæ fundum occupante, notabile. Die 4. Januarii a. 1716. circa noctem observabatur febrilis æstus quotidie statò tempore reversus cum deliriis, quæ tamen primum vix attendebantur, cum æger noster nunquam non ageret stultum & ipsam mortem die 10. Januarii joco exciperet, dicendo in ultimo vitæ suæ articulo ad Rev. Fratrem excubias nocturnas habentem, & monstrando insimul linguam: ecce, ecce mortem linguæ meæ infidentem. His verbis exspiravit à tussi ultimis diebus penitus liber, confirmans dictærium medicum à *Christiano Langio in*



*Miscell. curios. medic. obs. 9. p. m. 20. seq. examinatum: Phthi-*  
*sicum pectus sine tussi vitæ terminum annuntiat.* Non tamen  
 omnimodè conscientiae remorsum abfuisse exinde colli-  
 gere licet, quod, remotâ â lecto candelâ tantas perpeffus  
 fuerit anxietates, quas exprimere non satis potuit, quapro-  
 pter eam toto morbi cursu accensum prope lectum habuit.

Causa hujus mortis me quidem non reddidit sollicitum,  
 ut verò satisfaceret desiderio quorundam Procerum, qui  
 ægrè perferebant jacturam hominis ad provocandum ri-  
 sum nati, præsentē *celeberrimo Sprottaviensis Districtūs Phy-*  
*sico Rethelio Amico integerrimo*, perlustravi cadaver. Aperto  
 pectore lymphæ extravasatæ libra una in cavitate fluctu-  
 ans & dexter pulmonum lobus firmissimè Pleuræ usque  
 ad claviculæ regionem adhærens conspiciebatur. Manet  
 itaque experientiæ *Christ. Bennetti in Theatri tabidorum Exerc.*  
*16.* annotatæ sua laus, quod Phthisis plerumque sit lethalis  
 ubi pulmones pleuræ accreverint, cui & ratio adstipu-  
 latur, cum exinde gravior respiratio inducta, & difficilior  
 pulmonum transpiratio huic visceri magnam vim infe-  
 rant. Ulterius progressum faciens in superiori dextri lo-  
 bi parte ulcus quod manum caperet, & sub illo loco, quem  
 vivus dolentem digito monstrabat, erat, nec multò mi-  
 nus pariter pure refertum in altero lobo inveni; reliqua ve-  
 rò pulmonum substantia tota tota scirrhis ac steatomati-  
 bus scatuit. Quapropter hæc Phthisis non ejusdem moræ  
 fuit, uti apud illos accidit, quibus ut cum *Willisio de Phthisi*  
 „ *pulmon. sect. 1. c. 6.* loquar, unica aut fortè binæ foveæ  
 „ in pulmones efformantur, parietibus callosis circum  
 „ circa obductæ, ita ut materies ibi collecta in massam  
 „ sanguineam minime transferatur, sed quotidie tota, co-  
 „ piâ licet ingenti, expectoretur. Taliter affecti quasi  
 „ tantummodo fontanellam in pulmone haberent, spu-  
 „ tum & si multum & crassum, imò flavum & quasi pu-  
 „ rulentum omni mane, aliquantulum in totâ die rejiciunt,  
 „ tamen



„ tamen alias satis sani degunt, bene respirant, comedunt  
 „ & dormiunt, *ευσταθεῖς* aut saltem in modico corporis ha-  
 „ bitu perstant, & non raro per senescunt: hinc nonnulli di-  
 „ cuntur Phthisin per 30. aut 40. annos habuisse, & mor-  
 „ bum eum usque ad vitæ terminum (haud proinde ab-  
 „ breviatum) protraxisse: atque interim alii (exempli lo-  
 „ co sit meus Phthisicus) cum minus tussiant aut exspu-  
 „ ant, intra paucos menses in febrem hecticam incidunt  
 „ ac brevi in sepulchrum præcipitantur. Hæc ille. Ab-  
 domen mihi revelabat jecur hinc inde putrefactum &  
 folliculum felli destinatum, qui limpidissimam aquam fla-  
 vedine obiter tinctam continuit, certo indicio, spirituo-  
 forum excessum depauperasse sanguinem particulis suis sul-  
 phureis atque balsamo. Renum quilibet magnitudine  
 superabat lienem ut plurimum rotundum, naturaliter ali-  
 as constitutum, sed adeo exilem, ut altitudine & latitudi-  
 ne vix attingeret dimidiam palmam. Curiositatis esset  
 hic inquirere, an hæc lienis conformatio fons & origo fue-  
 rit animi ad hilaritatem semper prorictis, cum magnus  
 Lien ex communi sententiâ pro certo Melancholiæ indi-  
 cio habeatur. Verum litem hanc optime dirimere po-  
 terit *T. Boneti sepulchretum*, utpote quod *lib. 1. sect. 9.* melan-  
 cholicus in apricum producit & magno, & parvo, &  
 nullo liene præditos, ut hæc ratione nullius penitus mo-  
 menti videatur, in hoc viscere sedem vel hilaritatis vel  
 tristitiæ certò statuere velle. Per accidens quidem me-  
 lancholiam morbofo Lieni connexam esse quis dubitaret?  
 sic firmiter persuasus sum, illum, qui lienem durum pon-  
 deris quatuor librarum teste *Boneto I. c. obs. 23.* gestavit, &  
 sexagenarium ex lapsu mortuum liene penitus putrefacto  
 instructum, cuius celeberr. *Parisiensium Anatomicus Littre*,  
*Præceptor olim & Hospes meus devenerandus in Histor. Academ.*  
*scient. a. 1699. p. 50.* meminit, non minus quam omnes no-  
 tabili alicujus visceris vitio laborantes plus melancholiæ  
 quam



quam gaudio esse addictos. Omnem verò culpam lieni sine discrimine adjudicare non auderem, adhærens potius opinionioni *Riolani*, quam in lienis defensionem in *Anthropogr. l. 2.* foret. Si itaque in liene præternaturaliter constituto non habitat melancholia, nec gaudii domicilium in eo erit. Sane si in hac re aliquid pronuntiare mihi incumberet, assentirem potius *Lancisio*, qui in Illustrissimi ac Reverendissimi Præsulis Horatii Albani cerebroglandulam pinealem viscidulo sero ita infarctam, ut quasi sepulta & vaginata videretur, inveniens, huic melancholiam Albano familiarem attribuit, uti ex *Appendice Cent. III. & IV. Ephemerid. nostrarum p. 11.* constat. Cur non eodem jure animi serenitatem potius in hac corporis metropoli, quam apud Phthisicum meum facetum intrare temporis penuria prohibuit, quam in Liene quærere deberemus?

## XI.

### Historia & Anatome Pectoris hydrope Ascite & Anasarca extincti.

**N**ON cuivis Medicorum contingit ire Corinthum & eo felicitatis pervenire, ut cum *J. B. van Helmont in tract. de ignoto Hydrope §. 11. Operum p. m. 314.* gloriari possit, se supra bis mille hydropicos, etiam quorum lotiū jam ē cruento nigricaret, & totā nocte vix cochlear unum minxerant, in pristinam sanitatem restituisse, aut illud adi pisci ellogium, quod ob victas sine exceptione hydropises Philosophus per ignem *Theophrastus Paracelsus* in Epitaphio Salisburgi erecto, sibi vindicavit. Sit fides hujus arrogantiae penes Autores; ego certè ipsis calculum addere hæreo, cum experientia me quotidie doceat, plerosque hydropicos illudere artis nostræ subsidia, etiam si ea ex maximè absconditis vel antim. vel mercurii qualitatibus eruerentur spagyricè.



ricè. Prostant quidem exempla nonnullorum, qui vel naturâ medicatrice, prout in antecedenti Historia videre est, vel medicamentorum auxilio atrocissimum hunc hostem feliciter profligarunt. Ipsemet enim recordor, me aliquoties hydropem exstirpasse salibus digestivis v.g. arcano dupl. M. Tart. Vitriolato, sale absynthii &c. subductâ sub inde alvo vel cum Electuario hydragogo Sylvii, vel alio ex roob ebuli, resinâ jalappæ, sale genistæ & syr. domestico constante, & finiendâ curam vino, quod ex chalybe, radicibus aperitivis, stomachicis ac amaricantibus herbis corroborandi virtute pollebat. Alios cum *Foresto lib. 19. c. 27.* scio, unicè allio, diurefin vix credibilem excitante, contra mentem *Tulpii lib. 2. obs. cap. 35.* qui exinde lienem tumefactum, jecur retorridum, intestina syderata, renes putridos factos fuisse false scribit, & raphano curatos. Aliis, me teste, lotium vaccinum sive la Cure de mille fleurs, de quâ in *Historia morborum Vratisl. a. 1702. p. 112. seq.* sanitatem attulit, & novi juvenem, qui non ita pridem ab Anasarcâ stupendi aspectus liberabatur medullâ ramorum sambuci, cujus tantum, quantum vola manûs tegit, cum aquæ fontanæ unciiis quatuor decoquebat, hujusque decocti dimidiam partem mane, alteram vesperi calidè ebibebat, quæ methodus per novem dies continuata suaviter purgando ex voto conduxit. Verum ut plurimum oleum & operam perdimus, si Ascites se associat, qui curam nobis difficillimam, ne dicam penitus impossibilem reddere solet. Horum optimè gnarus *Perillustis Brunnerus in scholio ad observ. 100. Dec. 2. a. 8. Ephem. Nat. Curios.* solidè explicavit diversum in Hydrope eventum, cujus verba, cum antecedentia illustrare possint, hîc apponere juvabit. *Cura, inquit, facilius succedit in iis, qui integris vasis lymphaticis fluidum corporis perversa Diatâ contaminarunt, aut lympham viscidam, acidum ad stagnandum in suis colatoriis aptum reddiderunt, unde febrium leges, quas diuturnas Hydrops non raro excipit; quem ingentem resolvendo potenter & attenuando*



do lympham, oborto quasicataclysmate & largâ diuresi plus vice simplici persanavi, & persanantur quotidie Anasarcâ laborantes, in quibus manifesta lymphæ resorbitio observatur; difficilius autem illa succedit in iis, quibus glandulæ aut induratae, aut vasa lymphatica rupta, erosa, aut alias vitium ceperunt organa hæc hydraulica. H. J.

Ad hanc classẽ, cui symbolum addit Hippocrates de inter. affect. t. 27. dicendo: Morbus gravis est Hydrops & pauci hunc effugiunt, refero Balthasarem Bloch Operarium, qui 75. annorum senex circa finem Julii anni 1715. horrore non intermittente vexabatur usque ad 15. Augusti, quo pedes & successivè abdomen intumescere inceperunt. Præterea ad erattusis, dispnoea ac copiosa salivalis lymphæ exspuitio, die 7. Decemb. aliquales inducias concedens, tumor autem indies auctus tantam habuit duritiem, ut à digitorum impressione nulla restaret fovea. Hæc abdominis moles cum scroto pariter tumefacto alternare videbatur, hoc enim crescente illud decrefcebat, & vice versâ, talesque vicissitudines in reliquo corporis habitu tumor leucophlegmaticus exercuit. Sic d. 20. Decemb. caput intumuit, quod per sacculos arenâ calidâ repletos & applicatos ad naturalem statum perveniebat, cum interim die scilicet primo anni 1716. nasum occuparet erysipelas, ab asperso pulvere contra erysipelas Mins. disparens. Die 16. Febr. & scrotum & dextrum pedem omni sensu carentem fundere lympham nobis innotuit. Situm in lecto supinum tandem mutare coactus fuit tribus septimanis antequam moriebatur. Pulsus lento gradu serpentem, urinam verò tenuem copiosè profluentem per totum morbi cursum, si tres ante obitum dies excipias, observabam. Hisce demum ultimis diebus de siti, æstu interno & aliis febrilibus symptomatibus conquerebatur, ut & de dolore, quem gangræna, furas, scrotum ac inguine infestans, excitavit. Extremo die, qui erat 22. Feb. evomuit nigri coloris phlegma, & paulo post Creatori suo animam reddidit.



Morbum antecedentia me penitus latent, nisi quod audiverim, eum ante ingressum in Nosocomium sæpius stillicido sanguinis fuisse obnoxium, & de ejus egestate certus, nullus dubito, victum primordia morbo supeditasse, inprimis in ætate adeò provecta. Interim haud neglexi debellare cachexiam anteâ laudatis salibus, pilulis, lixivio diuretico Mins. balsamo, ut dicitur, perpetuo, cujus basis rad. hellebori nigri est, & vino magnarum alias virtutum sub Tincturæ sacræ nomine mihi officinali, ex Hiera Pachii & Cochin. parato, quod cochleatim haurit. La callio decoctum etiam in auxilium, per aliquot tempus non sine auxilio, vocabatur, dolendum saltem, quod, uti reliqua diuretica, ulteriori successu caruerit. Purgantibus locus fuisset, si senectus non obstitisset, siquidem non video, cur *Perillus* Brunnerus in loco superius allegato illis denegare velit omnem efficaciam educendi hydropicorum aqua. Pace tanti viri non solum purgantibus cum *Magno Wedelio de medicam. Facultat. l. 2. sect. 2. c. 7.* adjudicarem vim diureticam eximiam tam propter eorū salinum stimulum, qui sanguinem fundit quam ob consensū intestini recti & vesicæ, altero enim sphinctere soluto & alter portā pandit & lotium certò certissime pellendi hinc efficacia sequitur, id quod, si jocosa seriis interponere licet, *Christ. Langius in Miscell. curios. medic. obs. 6.* sub titulo: *in lotio suppresso mira purgantium efficacia*, confirmat læpidissima historia ex *Olearii Itinerario Persico* hisce verbis conceptâ: *Persarum Rex mulierculis quibusdam Cinadicis demandaverat, ut ad Procerum suorum Primatem, quem in oculis habebat, citò se conferrent, & coram ipso in conclavi singula alvum dejicerent. Quid illa? parent nempe & Magnatem adeunt: jam jam verò se accincturis ad exhauriendum mandatum, dicit Dynastes: Benè est, agite & peragite, quod vobis à Domino meo impositum, sed ita, ut ne latum unguem à præcepto deflectatis, verum strictissime illud expediatis; quacunque enim vestrum juxta latices fundet & cum alvi fœcibus vesicam unâ solvet, illa in-*  
*juxta*



*dubitato jugulabitur. Persentiscentes Turpicula ista impossibilitatem servanda conditionis, ventrem scilicet haud reddi posse, nisi insimul vesicæ libertas accedat, statim discesserunt, & Regi callidam Intimi sui instantiam non celarunt, qui huic etiam clementissimum dedit applausum. Verum etiam suafore Sydenhamio tract. d. hydrope operum p. 618. & experientiâ confirmatus mihi maximè probabile videtur, adesse ejusmodi cœcos meatus, per quos aquæ ex abdominis cavitate ad intestina transferuntur; cum quotidie observamus tantum aquarum in abdomine inclusarum vim per secessum educi, perinde ac si primitus in ipsis intestinis containerentur. Producit l. c. plura ad stabiliendam hanc hypothesein argumenta, quæ ibidem merentur legi. Sufficit, quod quotidie in nostris corporibus mirandæ humorum metastases occurrant, ad quas perscrutandas filo ariadnæ opus esset. Ne dicam de naturalibus phænomenis ad humorum secretiones spectantibus & earum viis oculis nostris adhuc incognitis, per quas v. g. chylus ex intestinis ad vasa chylifera, sanguis ex arteriis ad venas, urina potius ad vesicam &c. vehitur: hos meatus vix ullus in dubium vocat, etiam si nec lynceis oculis se manifestent. Itaque purgantia ex anthydropicorum catalogo minimè delenda sunt, si cardo curæ adhuc versetur circa aquarum educationem, quâ tamen pariter operam ludimus, disruptis jam viscerum vasis lymphaticis, prout in nostro apparet.*

Sectionem enim adornans in hoc cadavere, cujus habitus erat excarnis, ex abdomine instar torrentis cum impetu vidi profluentem maximam aquarum limpidissimarum fontanæ haud dissimilium copiam, eaque effusa inveni omentum flaccidum atque putridum, lienem superficietenus, ubi lymphatica repunt, quasi saccharo conditum & grandinibus albis, tanquam margaritis confitum; Hepar exterius, quæ latus dextrum respicit, ac si ex gypso esset fabricatum,



catum, & interius adeò scirrhum & lapide durius, ut cultri aciem eluderet. Fellis folliculus bilem tenuem & aliquot lapillos nigricantes continuit. Mesenterium setaceo adipellinitum naturaliter constitutum erat, uti etiam renes & pancreas, nisi quod illorum sinister parum scirrhus, & hæc glandula parvum lapillum pisco minorem monstraret. Thorax aquis pariter fuit repletus, unde mihi iterum nascatur suspicio de polypo hujus Diluvii Autore, quem etiam gelatinosum flaccidi cordis dextra auricula, & aliam spithamam longitudine excedentem arteria pulmonalis conspectui dabat. Pulmones nihil monstri aluerunt. Testiculi par non excessit naturalem magnitudinem, panniculus verò carnosus eorum, non minus quam penis & præputii, sub quo glans profundè latebat abscondita, instar spongiæ aquâ maximè tumidæ, ad tantam pervenit crassitiem, quæ duorum digitorum latitudinem superabat. Discisso crurum tegumento non minus denso ac tumido innumeras scaturigines, & curiosiori spectaculo tot rivulos, quot muscutorum interstitia Te animadvertere credidisses, adeò quidem nitidè illi à lymphâ, quæ ex ruptis suis ductibus muscutorum tunicas occupantibus, secesserat, separati erant, ut myologia sine cultri vel alterius instrumenti adminiculo in hoc cadavere demonstrari potuisset.

## XII.

### Historia & Anatome Tympanite, Pectoris hydrope, Ascite & Anasarcæ demortui.

**H**Ydropem humidum inverso licet ordine excipiat sciscus, qui eò notabilior, quò periculosior, & eò majori jure hunc sibi vendicat locum, quo nunquam non conjunctior ipsi comes sive pedissequa est reliqua Hydropis Cohors in *Historia antecedenti* producta.

Con-



Confirmabit intimum hoc quod Tympaniti cum hydrope intercedit, commercium Historia, quam in Nosocomio suppeditavit *Gottfried Caspar Barth.* decem annorum puer. Hic jam ante dimidiū annum herniā scrotali onustus nostrum imploraverat auxilium, cujus etiam ex voto particeps factus fuit absolutā, me suafore, famosissimā curā *Prioris Cabriares à Dionis dans le Cours des Operations de Chirurgie 4. demonstr. p. 223.* satis clarè descriptā, quam & adultis satis fecisse certò mihi innotuit. Tunc temporis difficilior subinde trahebat spiritum, accedente mitiori tussi, verum, ut vera fatear, non multum sollicitus fui de his querelis, cum ipsemet æger has qualescunque molestias vilipenderet, & curatā herniā Lares nostros lætus relinqueret. Præterea mihi referunt, quod satis benè se habuerit usque ad 21. Augusti a. 1716. quo die primum dolorem tensivum à pectore versus hypogastrium præcedentem, pariterque in hypochondriis ac si inflata essent, cum tussi sensit, quæ inflatio notabilior erat commesto largius cibo. Attamen dolor non tantus erat, ut servitiis obicem posuisset; potuit enim adhuc obambulare, ac naturali appetitu cibum capere. Postquam verò die 9. Septembris matutinis horis stomacho jejuno panem similagineum, prout ex furno protrahitur, recentem, cucumeres aceto conditos, cerasa, ribes, hisque præmissis frigidam aquam ingurgitasset, circa vesperam horrorem cum subsequente æstu experiebatur. Altero mox die artus, facies atque abdomen maximè intumuerunt, deerat appetitus, respirabat difficillimè & per vomitus ejecit phlegma acido-austerum. Cum die II. iterum ad nos confugeret, observavi totum corpus, ne capite quidem excepto, tumidum, abdomen verò tympani instar, quod pulsatum sonitus edit, maximè distentum, & nullibi ab impressis digitis foveas, quæ Leucophlegmatix indicium sunt. Respirationi anhelosæ & anxietatibus suppetias ferre videbantur porracei vomitus ac ructus, quibus cessan-



fantibus præcordiorum angustia ac sibilus in bronhiis suffocationem minabatur, in primis vespertino tempore, quo per dimidiam horam sensu ac motu privatus largum sudorem fudit. Hunc lypothymiae paroxysmum excepit summa virium jactura, sitis, puncturae dextri hypochondrii, dolor circa umbilicum, borborygmi, major adhuc corporis totius inflatio, quæ & oculis visum & manuum carpis pulsus tactum intercipiebat, atque in abdomine tanta erat, ut de assumpto veneno suspicionem alerent adstantes. Cum verò hæc symptomata sequenti mane à vehementia multum recessissent, non dubitavi exhibere laxans, cui nihil efficienti superaddidi clyisma ex chamomill. rutâ bacc. lauri, sambuco, croco metall. &c. cum lotio decoctum pariter irriiio conatu, quoniam vix injectum subito effluxit. Emplastrum carminativum abdomini impositum minimè potuit perferre, ipsi imputans violentas abdominis constrictiones atque Ischuriam. Melius prodesse videbatur fots ex spec. carminat. cum vino paratus, quem unâ cū antecedenti clysmate d. 13. adhibitum sequebantur liquidæ alvi dejectiones lumbricis refertæ & lotium colore fuscum, maxime turbidum alvinisque excrementis haud dissimile. In lectione *Amœnitatum exoticarum* lectu dignissimarum *Engelberti Kæmpferi* occupatus incidi *fasciculo 3. p. 543.* in historiam civis Disgunensis, qui laudato Kæmpfero retulit, se tympanite tumidū omni mane per sex hebdomades devorasse asæfœtidæ bolum seu pilulam majusculam, donec convalesceret; ex eo subinde sibi flatus sursum & deorsum secesnisse adeo fætentes, ut ab hominum consortio jussus fuerit toto tempore exulare. Quapropter & mihi, aliis carminativis, tonicis, laxantibus &c. haud sufficientibus cum asæ periculum facere lubuit, dando mane & vesperi hujus pilulam piso majorem, nec voto fui frustratus, purgando enim corpus insimul protrudebat hoc euporistum potenter flatus assæfætidiores & quandoque lumbricos, abdomen multum dimi-



diminuebatur, somnus erat tranquillior, & forsan hinc san-  
nitatem, uti memoratus civis, recuperasset, nisi pectus oc-  
cultasset majus malum, quod sequentia in apricum profe-  
rent. Scrotum sæpius flatu turgidum: ab eo tamen facile  
liberari potuit, manu saltem illud comprimendo, ut flatus  
in abdominis cavum retrocedere cogerentur. Præter vo-  
mitus quotidie fermè recurrentes die 16. prima vice audie-  
batur dentium stridor, qui sequentibus diebus tantâ rediit  
vehementiâ, ut exinde duorum dentium jacturam patere-  
tur. Die 18. gravis auditus, die 19. circa vesperam horror  
& post eum æstus cum siti vexabat, insimulque exspueba-  
tur multum phlegmatis purulenti atque cruenti. Die 20.  
incrementa iterum sumsit abdominis moles, modò dolori-  
fica & pressa foveas monstrans. Die 22. circa vesperam re-  
vertitur horror cum subsequente æstu, die 23. æstus sine  
horrore, & quoties febrilis insultus notatur, toties etiam plus  
sanguinis scretu prodit. D. 26. 27. 28. aliquoties floridus san-  
guis per os effluxit, & omni cibo abstinuit, unicè postulans,  
ut aliquis caput teneat, ne ipsi decidat. Somno carebatus-  
que ad 28. Septembris diem, quo sempiternus somnus irru-  
ebat apud nostrum, hisce verbis valedicentem: Morior,  
date mihi candelam.

Occulta in lucem producturus sequenti die cadaver, cu-  
jus abdomen valdè extensum, dexter testiculus ac pedes tu-  
mentes, præsentibus *Exc. Domino Collega D. G. B. Preus & Do-  
mino D. Steiner*, aperui. Cum sternū removerem tota pecto-  
ris cavitas aquis inundata erat, quib9 effusis apparebat dex-  
ter pulmonū lobus flaccidus & muco quasi sebaceo, inspif-  
satâ vel condensata nimirū lymphâ, illinitus; sinistrum verò  
latus alteri pulmonum lobo destinatum instar bursæ â peri-  
cardio (quod etiam multum seri extravasati continebat) di-  
aphragmate & pleurâ compositæ cernebatur, hujusque  
modò memoratæ bursæ parietes interiores obducti fuerunt  
materiâ pariter flavâ ac viscosâ instar sebi, qualem etiam ul-



timis diebus per nares excrevit æger noster. Credidisses penitus abesse hujus lateris lobum; sed ecce! ulterius indagando eum invenimus profundè sub ita dictâ bursâ latentem, diaphragma versus abdomen prementem pariterque labefactatum. Pectoris hydrops nunquam non polyporum progenies, prout in antecedentibus historiis videre est, de simili Parente mihi suspicionem dabat, quem etiam substantiæ membranacæ revelavit dexter cordis thalamus. Dissecto abdomine magnâ in copiâ promanarunt aquæ limpidissimæ, quarum scaturigines omentum quodammodo putridum, atque mesenterium judico, cum hepares stupendæ magnitudinis, lien, renes omni labe expertes essent, nec facerè observaverim rorem adeò clarum in corporis cavitate stillantem, qui aliunde originem duxit. Magnum hepar, quod præter dextrum, etiam sinistrum occupando hypochondrium sub mole suâ lienem abscondebat, fatis amplâ gaudebat vesiculâ felle naturaliter constituto repletâ; urinaria autem vesica â lotio vacua atque corrugata erat. De cætero satis mirari nequeo, me in tympanitico hoc subjecto abdomen aperiendo, ac perlustrando intestina, nec flatus, aut gas Helmontii sylvestre, nec glutinosam pituitam bullis aut vesiculis contextam, qualem *Sylvius, Riverius &c.* præsupponunt & *J. P. Albrecht in Ephem. Nat. Curios. Dec. 2. an. 1. obs. 80.* à Tympaniticis clysmatum ope excretam afferit, invenisse. Artus etiam vivo puero maxime tumentes præter parum feri extravasiti nihil, ne quidem indicium flatuum cognoscere dederunt, tametsi tumores flatulentos universam corporis peripheriam pervadentes, olim aduisse non dubitandum sit. Hinc commotus in intricatâ flatuum doctrinâ *Willisii* hypothese *Part. 2. Pharmacop. rational. sect. 2. c. 4.* stabilitæ nullus hæreo assensum præbere, utpote quæ phænomenis in puero meo vivente & mortuo observatis proprius accedit. Persuasus nimium est celeberrimus Artis nostræ Antistes Tympanitem natales



les ducere â partium & viscerum membranaceorum inflatione propter spiritus animales in fibras istas copiâ nimîâ adactos, ibidemque succi nervei obstruentis vitio â recessu impeditos, cui affectioni consequenter flatuum in locis vacuis aggestio, velut complementum sequitur. Ut clariora hæc fiant, docet, truncum nervorum octavi paris per cervicem utrinque descendentem filo ligare, & illicò totus ventriculus tanquam â vento inflatus, intumescet. Huc etiam ipsi quadrat *Smetii* observatio, qui juvenem vidit juxta vulnere subter axillâ punctim facto, & in pectoris cavitate penetrante post unicam noctem universalem, scilicet totius corporis tympanitem accipere, procul dubio propter læsionem plexuum nervorum prope axillas, per quos nervi totius corporis inter se communicant; læso hoc plexu spiritus ibidem hospitantes irritati ἀταξίας ineunt, hinc inflatione per fibras nerveas, uti judiciosè differit Ingeniosissimus Willisius. Hâc ratione totum systema nervosum afficiebatur in Virgine tertianâ febris laborante, â febrili calore, qui quoties accedebat, toties etiam universi habitûs tumorem efficiebat teste *Pechlino lib. 1. obs. 57.* Correspondet non minus quotidiana experientia, dum epota toxica, telorû aut ferarum ictus, vel morsus venenosi partium plurium aut totius corporis intumescentiam inducunt, postquam nimirum fibræ his de causis crispatae & exsiccatae protentum acquirunt elaterem, ut cum *Baglivio lib. 1. oper. p. 81.* loquar, & spirituum influxus perturbatur.

Quis itaq; negaret errores circa diætâ commissos cacochymicâ humorû dispositionem, lumbricos &c. in nostro suffecisse, ut irritando nervosû genus modo antea delineato producere potuer. inflationes? quæ distendendo violenter partes solidas liquidorû circulû impediverunt & hydropi sicco associarunt successive humidum. Non multò absimilem Tympanitis & ascitis causam occasionalem leges in *Chr. Job. Langii Præceptoris quondam mei fidelissimi Praxi med. c. 5. p. 33. &*



*Collegio Casuali Cas. 35. p. 296.* ibi enim aurigæ alicujus mentionem facit, qui Halis assumptis largiori in copiâ ovis in acetofrixis incurrebat hunc morbum, & licet post 20. dies ope clysmatum ejicerentur ova adhuc integra, fatis cedebat, quia molestissima irritatio crispaturæ fibrarum membranacearum, hæc inflationi, & tandem distenta intestina rupturæ lymphaticorum & lacteorum vasorum ansam procul dubio dederunt. His præsuppositis, quod â violentâ nervosarum fibrarum crispatura & tumultuario spirituum influxu dependeat Tympanitis, nemini non constabit, quomodo subito irruere possit hostis hic periculosissimus, ut & *G. A. Mercklinus* ex suppresso alvi crepitu (sit venia verbo) fartori alicui ætat. 36. Tympanitem & ipsam mortem obortam fuisse *in Ephem. Dec. 3. a. 3. obs. 142.* annotaverit; & quæ causa, cur remitterent post mortem fibrarum elatere, flatus disparuerint. Si igitur flatibus ipsisissima sit necandi potentia, risum sanè tenebunt, qui apud *Suetonium in vita Tib. Claudii c. 32.* legend, quod ille Cæsar meditatus fuerit Edictum, quo veniam daret flatum crepitumque ventris in convivio emittendi: nec tam grandi vitio vertent *Lucæ Holsteinio*, qui Mensæ Cardinalis *Francisci Barbarini* accumbens & acriter disputans similem spiritum foetentem ac clamantem emisit, in primis cum eum judicioso joco condiret Cardinali ex *Virgilio* acclamans:

- - *Tu das Epulis accumbere divûm:*

Minimè tamen hûc quadrat:

*Ventorumque facis tempestatumque potentem.*

*V. Menagian. T. 3. p. 170. f.* sed hæc in parenthesi. De usu, quem superius laudata hypothesis in Praxi medicis rationi innitentibus præstare valet, hâc vice dicere nolo, cum mihi animo sedeat, prius experientiam datâ occasione consulere, quam meris ratiunculis Lectoris patientiâ abuti.



XIII.

## Historia & Anatome Apoplectici.

**M**Orbus attonitus attonito sanè aspectu adeò formidabilis existit, ut nostrates ad exprimendum germanico idiomate ejusgenium satis nervosè DEI manu tactum dicant, qui gravissimo hoc affectu laborat. Quis enim non obstupesceret, videndo hominem sanum uno ictu quasi fulmine percussum omni sensu motuque & brevi ipsâ vitâ orbatum? & quis non crederet adesse DEI digitum subitaneo tali casu indicantem lubrica vitæ humanæ fata? Illud fit hætenus & impofterum illudet vera & fortis apoplexia omnem Medicinæ opem tametsi efficacissimam, nullumque est dubium, quin nunquam non ex tripode dictus censeatur *Hippocratis aphorismus 42. sect. 2. apoplexiam fortem solvere, est impossibile, levem verò non facile.* Fortis verò ex Medicorum sententiâ judicatur, quæ omnimodam infert sensus ac motus privationem cum maximâ respirationis læsione, & juxta *Dolai Encyclop. lib. 1. c. 10. definitionem non absimilis est somno profundissimo cum omnium sensuum ablatione, ex obstructione principii nervorum oborto.* In hoc enim principio, intellige cerebrum tanq. primarium sensuum fontem, totius rei cardo versatur, utpote quod diverso modo læsum diversi eventus prognosticum *Hippocrati* suppeditavit statuenti: *Quibus cerebrum sideratum est, intra 3. dies intereunt si autem has superaverint, sani fiunt.* Absit! ut oppugnem Magni Hippocratis auctoritatem; pace tamen tanti Viri apoplexiam fortem ad 14. usque diem protrahi posse, exemplo monstrabo.

Introducebatur in Nosocomium die 22. Septemb. an. 1716. Figulus nundinas nostras frequentans *Job. Heinr. Herschel* ætat. 50. annorum, temperamenti sanguinei, qui ante duos dies præter hæmiplegiam dextri lateris loquelâ & omni sensu destitutus apoplexiam manifestabat. Antecedenti-



um ignarus statim de largâ venæ sectione in paralytico brachio instituenda consilium inivi, non neglecto vesicatorio nuchæ imposito, apophlegmatismis ori inditis, frictio- nibus satis rigidis volæ manus ac pedis affecti adjudicatis at- que clystere croco metall. acuato. Interne prospiciebatur liquore Cc. succinato, subinde interpositâ potione ex aqu. ceras. nig. fl. thil. paralyf. meliss. citr. cinam. cordial. citr. a- popl. pulv. antispasnov. antim. diaph. specif. ceph. syr. stœ- chad. arab. fl. tunic. & Tinct. corallorum volatili, quæ ut summè antapoplectica, cum L. B. de Strahlenheim Suecici Plenipotentiarîi munus gereret, Vratislaviæ primum in- notuit, mihi verò ab Illustrissimâ quâdam Domina gratiosè fuit communicata. His juxta mandatum ritè factis die 24. manum commovere, verba nonnulla proferre & die 25. ipsemet cibum capere potens erat, mente interim alienissi- mus, hujus enim quod non compos fuerit edocebat & ser- monibus & actionibus stolidis, dum sellam perforatam le- cto adstantem non noscebat, sed in pavementum conclavis alvum deponebat. &c. Itaque parum spei concepi memor Canonis à Celso lib. 3. c. ult. promulgati: *Si post sanguinis mis- sionem non redeat motus & mens, nihil spei superest*: quam pro- gnosis post quatuor dies corroboravit status in pejus ruens, cessante iterum omni loquelâ, comedendi appetitu, & in- cipiente lethargo inexpugnabili. Quicquid enim excitandi ergo tentaram, nullius fuit frugis, sive consideres vesi- catoria, quorum in quolibet pede & brachio & in nuchâ u- num gestabat, sive enemata fortissima, sive spiritus vola- tiles externè pariter atque internè adhibitos, æthiopem ci- tius lavare, quam veterum excutere successisset. Die 3. Octob. pulsus & respiratio, quæ hætenus vix observari po- terant, penitus ægrum deseruisse videbantur, usque dum stertor superveniebat, prodromus instantis mortis, quæ al- tera die fuit secuta. Horâ unâ ante obitum notarunt ad- stantes jectigationes corporis vehementes, faciem mox pal-



pallidam, mox fusco-nigricantem, ut horrorem injiceret adspicientibus, & toto morbi decursu in faucibus ac ore semper hiantē tenacissimum mucum digitis extrahendum.

Cum quinto octobris die cadaver lustrationi exponeretur, oculis nostris se primum obtulit ecchymosis sinistrum colli latus cum axillâ deformans. Ad supremi ventris examen manum accingens & decussatim incidens membranam carnosam, prope os occipitis & frontis flatus cum sibilo ac strepitu per aliquot tempus perseverant. protrudebantur. Remoto cranio jucundissimum aderat spectaculum, cerebrum scilicet turgescens, vasis sanguiferis abundē & formosē superbiens, quod â meningibus denudatū elegantissimi vel in Hetruriâ prognati marmoris pulchritudinem illufisset, & certe ansam dedisset phantasiâ abundanti ex gyris venarum sub cœruleo colore apparentium mire contortis misteriosos caracteres enucleare, prout quondam ex locustarum alis ab aliquo hebraicē docto hîc factum fuisse recordor. Recordabar infimul ob excessivam cerebri copiam *observationis de Leonis cerebro in Bibliotheca Regia Parisiis anno 1667. demonstrato*, quam in *actis anglicanis editore Oldenburgio Mens. Octob. 1667. p. 435.* legerelicet. Leo iste exiguum cerebrum respectu vitulini exhibuit, ut ex comparatione judicatum fuerit, paucitatem cerebri potius causam esse naturæ ferocis atque crudelis quam defectus ingenii, conjecturæ adhuc confirmationem cui conciliavit *observatio in vulpi marina* habita, in quâ nihil fermē cerebri inventum, utut sagacitas ejus & habilitas hoc ipsi nomen videatur indidisse. Nostri quidem ingenium melatuit, de crudelitate verò atque ferociâ eum absolvere nullus dubitarem. Intimius cerebri & corticalem & medullarem substantiâ investigando, nihil præternaturalis invenire potui, nisi omnium vasorum summam intumescens, & in ventriculis lateralibus pariter atque postico ultra unciam  
femis



femis lymphæ limpidissimæ. Hæc etiam, me iudice, sufficiunt, pro demonstrandâ præfatæ apoplexiæ causa.

Me quidem minimè fugit post mortem verâ apoplexiâ extinctorum ut plurimum extravasatum sanguinem vel sub durâ meninge, vel in ventriculis, vel prope subtiliora plexus choroidæi vascula, vel in aliis cerebri partibus fuisse inventam, uti ex *Wepfferi*, *Bartholini* & aliorum observatis constat. Attamen præter multos *Realdum Columbum anat. lib. 15. Horstium obs. anat. 3. Tulpium lib. 1. c. 3.* allegare liceat, qui unice lympham terminos suos egressam, tanquam apoplexiæ & mortis indicium viderunt. Salva interim maneat hypothesis *Perillustri Brunneri*, qui *Ephemerid. Dec. 3. a. 1. obs. 152.* persuasus in cerebri ventriculis naturaliter adesse lympham seu spiritum phlegma, illudque probabiliter partim per venas remeare, partim verò ad interiora penetralia postquam pervenit venarumque superavit regionem, ubi remeare non datur, ulterius progredi, & in ipsos cerebri ventriculos, tanquam in cisternam confluere. Hujus vel difficilioris secretionem vel abundantiam varia producere symptomata non semper lethalia me convincit coctiliarius quidam nosocomii curæ concreditus. Vir ille, ut obiter dicam, summè plethoricus ætat. 30. circiter annorum nos anno 1716. accedebat tantâ vertigine vexatus, ut instar ebrii in quævis sibi obvia impingeret, & nunquam non temulentus accusaret sensum ponderosum in arteriori capitis parte. Pauca certè restant, quæ in ejus solatium non impendissem, Venæ sect. laxantia, sanguinis orgasmum compescentia, cephalica, nervina, masticatoria, vesicatoria, pediluvia, cucuphas, fots pro capite, fonticulos & tantum setaceum quomdamodo proficuum. Post festum, ut ajunt, scilicet postquam utcunque restitutus nos reliquit, incidi in *Lentilii* casum meo non dissimilem *Miscell. part. 2. p. 314.* notatum, ubi commendatur Emplastrum vesicatorium toti parti capillatæ capitis applicatum, quod secundum en-

chi-



chireses ibi communicatas in usum vocatum cum euphoria copiosissimam lympham educere capax fuit. Doleo experimenti hujus dispendium, & magis dolerem, nisi primâ oblatâ occasione me aliquid exinde lucraturum sperarem. Meum jam non est, inquirere in vias in corpore vivente ubique patulas, quas lymphæ abundans, craniū transcendendo, sibi quærit; sufficit quod natura quotidie hoc respectu captum nostrum miraculosè superet. Sed ut in viam redeam: nihil occurrit, quod me impedire queat, quo minus crederem, apoplecticum meum debere mortem & sanguini stagnanti & lymphæ in ventriculis cerebri extravasatæ, id quod eodem modo accidit, quo superius hydropem à polypo juxta *Loweri* mentem demonstravi. Ut paucis repetam: sanguis arteriosus remoram patiens glandulosam cerebri partem ad exprimendum violenter serum adegit, unde ejus extravasatio, & principia nervorum preffit, unde spirituum seu principii vitalis denegatus influxus. Cum verò præternaturalis hæc secretio non uno impetu, sed successive provenit, non mirum, quod ad decimum quartum diem morbus hic gravissimus fuerit productus. Quoad causâ occasionalem *Consummatisimi Practici Wepfferi* sententiam amplector, qui tract. *de Apoplexiâ* p. 261. Apoplexiæ obnoxios profitetur, quibus medullosa substantia cerebri vel obvitæ errores, (quorum vini abusus p. 257. referendus) vel hæreditariam infirmitatem promptius & largius serum â massâ sanguineâ mediante quâdam fermentatione segregatum recipit, ac sibi obstructionem inferri non renititur. Quæ restant, docebit sæpius laudatus *Wepfferi* tractatus *de Apoplexiâ & Historia Morborum Vratisl. an. 1702. pag. 7. sequent.* Collegii nostri nomine ab Excellentiss. *D. de Helwich* conscripta.



XIV.

# Historia & Anatome Iliaci.

**Q**Uantum momenti in eruendis morborum causis situm sit, neminem, qui vel primo limine sacra saluberrimæ artis salutavit, fugere potest. Earum certè cognitio Medicis practicis ea præstat, quæ nautis Pharus vel acus magnetica: hac enim duce navis secure in portum pervenit, & diagnosi viam monstrante æger scyllamatque charybdim effugiens feliciter periculoso morborum pelago egreditur. Hæret tamen, ut sincerè dicam, sæpius aqua, & cum navigantibus sub æquinoctiali lineâ idem nos angit fatum, cum illos acus efficacia, nos signorum evidentia nonnunquam deferat, & tam diu incerti oberremus, usque dum mors nobis mysteria pandit. Pandebat nobis talia, quæ ne quidem œdipus enodasset, in cadavere Iliaci, cujus historiam hîc recensere operæ pretium duco.

Auriga *Johannes Faulhaber* ætat. 58. annorum athletici habitus Vir die 10. Novemb. 1716. insolita sensit tormina cum alvi obstructione, quæ cum continuarent, d. 14. præfati mensis se ad nos recepit. Eum accedens notavi præter dicta symptomata virium defectum, frequentiam ructuum, nauseam cum propensione ad vomitum, æstum febrilem, sitim, noctes insomnes & dejectum appetitum. Leniter laxantibus curam aggrediebar, exhibendo pilulas polychrestas D. Becheri, cum cephalicis nobis familiaribus ex Extract. colocynth. res. jalap. an. ʒß. ꝯ dul. ʒij. helleb. nig. ʒiiij. constantibus acuatus, salacidular. Egrenf. ad ʒj. aquam laxativ. Viennens. cum speciebus dia tartari Mins. & transeundo ad fortiora, item ad topica emolliendi ac sopiendi scopo abdomini dicata. Clysmatibus pariter contra morbum rebellem fortiter pugnabatur; verum mox iterum solitariè effluerunt, nec alta petierunt, etiamsi tam sublimia non intendissem, qualia *Johannes Matthæus de Grandibus* de puellâ



ellâ iliaca 12. annor. refert, quæ clysteres & suppositoria oblonga quatuor filis femori alligata vomitu rejecit, cui non multo abfimilem casum *Diemerbrœck anat. lib. 1. c. 8.* se Noviomagi vidisse testatur. Observationibus hisce fidem fermè superantibus patrocinari videtur. *Ad Spigelius de humani Corporis fabricâ lib. 8. p. 250.* probans in statu præter naturali valvulum Bauhini colo adstantem quandoque ruptam, vel laxiorem, vel muco pituidoque crassâ ita oblitam esse, ut cæco ac colo quasi agglutinata haud quaquam possit aperiri, nec iis, quæ inverso violentoque motu peristaltico sursum tendunt, remoram injicere. Sed redeamus in circum. Insequenti die lingua aspera atque ficcata certissimum internæ inflammationis indicium præbens ad nitrosa â *Celeberr. Frid. Hoffmanno in Dissertatione de Passione Iliaca Hale nuper habita* maximò pere etiam commendata interponenda me commovebat, â quorum crebriori usu lingua videbatur in melius mutari. Potum, quantum poterat, evitavit, quoniam ab ingurgitatis liquidis majores in abdomine molestias & vomitus quævis ingesta educentes experiebatur. Interim abdomen magnæ molis & ipso saxo durius apparuit, nullaque arte excrementis viam sternere datum erat. Nec vomitus miserrimo halcyonia concesserunt, sed & die 21. in stercoreos mutati, confirmando *Galen 6. de loc. c. 2.* sententiam: *Si cui accedit vomitus materia purulenta, ex his nullus salvatur:* circa vesperam 22. Novembris vitæ plenæ miseriarum atque ipsi Misere mei finem fecerunt.

Diversæ ab observatoribus annotatæ affectus Iliaci causæ me tenebant sollicitum, ut scirem, qualis in nostro subiecto sub herbâ, uti ajunt, lateat anguis. Innotuit enim *Th. Bartholino Cent. 6. obs 38.* Ileum ab Ileii intestini coalitu; *Hippolito Bosco, citante Bonetto in sepulchr. Tom. 2. p. 233.* â vesicâ pinguedine, ossibus & capillorum grandi cirro impleta & adnatâ intestino recto, quod adeò comprimebat, ut nihil excrementorum effluere sineret; *Eidem juxta laudatum*



*Bonettum l.c.* ab affato stercore, quod colon in suis anfractibus replebat, ut lapidescere videretur; *Fontano*, quem pariter allegat *Bonettus l.c. lib. 3. sect. 14. obs. 24.* â materiâ induratâ lapidosâ intestina extendente; *Fernelio Puthol. lib. 6. c. 9.* ex pituitâ colo infarctâ; *Joh. Frid. Khernio* â deglutitis 48. aureis nummis, *Ephem. Cent. 2. obs. 154. Riolano Method. medend. sect. 3. tr. 1.* ex mesenterii scirrho intestina premente; *Barbetta Prax. lib. 4. c. 7.* ex intestino colo sphacelato, non procul â recto; *Sam. Reiffelio Ephem. Dec. 2. a. 7. obs. 11.* ab omento parumper intestino ileo adnato, atque aliquo modo sphacelato; *J. Lanzonio Eph. Dec. 3. a. 1. obs. 20.* ab ictu scorpionis circa ultimas intestini recti plicas; *Riverio obs. Cent. 3. obs. 26.* ex ileo, tribus complicationibus convoluto. Et quem latere potest multifariæ Experientiæ Passio iliaca ab Herniis producta? cum intestini portio intra processus peritonæi impellitur atque in viris scrotum occupando, in fœminis ligamenta rotunda penetrando excrementis naturalem viam intercipere solet. Intestinorum etiam mutuos ingressus, seu intus susceptiones pro causis morbi sæpius nominati cognoscere non dubitarunt scriptores fide dignissimi, nec ipsi modus, quo ejusmodi intestinorum susceptiones fiunt, conceptu amplius difficilis est, postquam illum *Peyerus in tract. de glandulis intestinorum* experimento cum ranis instituto, evidenter satis demonstravit. Lacessitis scilicet in vivente amphibio intestinis, accidit, ut eorum quædam partes alicubi plus debito ampliarentur, quæ ampliatæ, ac in sacci morem dilatatæ intra se receperunt constrietas ejusdem intestini alias portiones vicinas, easque sinu suo absconditas aliquandiu detinuerunt, intestini pars una è latibulo alterius, velut è domuncula limax, in propatulam pristinamque sedem rediret. Verum similis ingressus non tam facilè, ne quidem globulorum, nec mercurii (cujus ad libram integram *Zacutum Lusitanum* exhibuisse in obs. ejus 35. legimus) adminiculo in homine succedet, in primis, cum



cum ut plurimum pars intestini inferior intrudatur in superiorem, & violentas illas contorsiones, quæ adiacens mesenterium in consensum trahunt, procul dubio concomitetur inflammatio, compressis ita & constrictis vasis sanguiferis. Quam vana etiam reponendi spes ab *Hippocrate lib. 3. de morb. num. 14.* in follem fabrilem ponatur solidissimis argumentis evincit *Dolaus in Encycop. med. lib. 3. c. 6.* Ex modo recensitis valvuli causis unam in nostro locum habere persuasus, sectioni die 23. Novemb. me accingo.

Compresso parum abdomine è naribus fæces liquidæ crocei coloris maxime foetentes profluebant, eoque aperto tota cavitas simili scatebat materiâ foeculentâ, quâ remotâ in apicem venit morbi & mortis causa rarioribus annumeranda. Curioso, credas, spectaculo animadverti omentum versus dextrum hypochondrium intestini jejuni portionibus circumvolutum, & forti amplexu intestinum constringens, ut laboris esset, illud explicare. In altero hypochondrio idem intestinum valdè turgescens sphacelo quasi consumptum, & ex unâ parte laceratum fæcibus, quæ non ultra progredi poterant, exitum concesserat. Sequentia intestina verè jejuna & adeò vacua deprehendebantur, ut ne mucum quidem cōtinerent & hâc ratione inverso ordine tenuia præ crassis molesta naribus, accuratius scrutiniū interdixerant.

Occasionalis causæ inhærens â vitæ genere, omnibus tempestatum injuriis exposito, eam deducendam esse reor; siquidem tale mancipium & laboriosis onerum elevationibus & frigore, ut alias taceam molestias, abdominis visceribus vim inferre, ac excitatis ob acutissimos dolores vel tormina, spasms, ansam similibus circumplicationibus forsitan suppeditare potest. Liquidiora enim excrementa nostrum ab adstringentium aut exsiccantium excessu absolvent, etiam si alias, prout ex antecedentibus patet, symbolum ad generandum valvulum conferant, & cujus notabile ante 10. circiter annos in nobili Livono me observas-



se memini. Hic Gonorrhœa infectus cum Judæo Medico pactum iniverat, mediante quo ille huic decem nummos aureos, & Judæus ægro sanitatem intra breve tempus spondebat. Hebræus lucro inhians saccharo saturni inter-  
nè quotidie propinato curam abbreviare volebat, infelici  
verò successu, mutando nimirum gonorrhœam in Ileum.  
In his angustiis meum auxilium multis precibus implora-  
vit, postquam autem cum sanitate in gratiam rediisset, ex-  
cessit, evasit, erupit ingrati cuculi memoriam post se re-  
linquens. Colophonis loco non possum non, quin adhuc  
meritis elogiis, extollam fumum ex peto ope fistulæ huic  
usui adaptatæ ano immissum, cum experientiâ certus sim  
in atrocissimis doloribus colicis, pertinacissimis alvi obstru-  
ctionibus & ipsa Passione iliaca, nisi causa penitus singula-  
ris lateat, vix esse huic simile euporiston.

## XV.

### Historia & Anatome Ascitici.

**M**irari defines, Lector, quod tertiâ vice Ascitici analy-  
sin exhibere audeam, postquam Tibi varia occur-  
rent, quæ in antecedentibus frustra quæsitæ non omni ca-  
rebunt utilitate.

Concernit hæc historia *Davidem Staros* ætat. 28. ann. qui  
a. 1716. circa finem Junii incalescente exitinere corpore  
frigidam largiter bibens per totam noctem horrore satis  
molesto vexatus fuit. Horrorem excepit æstus 14. dies  
perdurans cum deliriis, dolore lancinante circa regionem  
umbilicalem, & gravativo versus sinistrum hypochondri-  
um, vomitu quæcunque assumpta mox ejiciente atque siti  
intensissima, quam sero lactis extinguere annitebatur. Ces-  
santibus modò memoratis symptomatibus murmura in ab-  
domine exaudiebantur, notabatur ejusdem intumescen-  
tia, vomitus quotidie vel alternis diebus redibat, excremen-  
ta



ad Hist. 15.



dimidia pars pedis.







ta maximè indurata, albicantia & sanguineis striis intermixta parcissimè lotiumque guttatim prodibat. Paulo post sonitus ille ebullientis aquæ instar cum sensu dolorifico à sinistro ad dextrum hypochondrium vergente sæpius intra diem & noctem fuit reversus, aucta insimul abdominis mole. Hoc rerum statu die 7. Septemb. in nosocomium advectus accepit quolibet mane pilularum polychrest. D. Beccheri ℞j. meridiano verò & vespertino tempore Lixivium diureticum D. Minf. tantâ quidem energiâ, ut post quatuordecim dies venter torminum expers multo detumuerit, urina liberè fluxerit, & respiratio esset liberior. Præterlapsis octo diebus lotium iterum supprimebatur, ex quo abdomini durities, augmentum, dolor & ululatus totum conclave replens accessit. Cum præterito anno in Ischuriâ effectum haud contemnendum ab infusò cantharidum ex commendatione *Tb. Bartholini in Hist. anat. Cent. V. Histor. 82.* observassem, & hîc consilium *Perillustri Brunneri in scholio ad obs. 100. Dec. 2. an. 9. Ephem.* firmo pede sequi vellem, his verbis conceptum: *Per vias urinarias tendere potissimum quicquid seri è ventribus hydropicorum fluit, ego quidem persuasus sum; citra diuresin enim restitutum vidi hydropicorum neminem; catharsi autem dejectos plures, quæ causa fuit, ut, suadente & si Practicorum turba, sedulò sibi ab usu purgantium in hydrope temperarint prudentiores, quos longa fecit experientia canos:* idem diureticum potentissimum adhibui, verum non solum subsequuta fuit pertinacior alvi constipatio, sed & æstus, lotium paucum coloris futuratissimi & turbidum, vomitus quotidie horâ meridianâ 12. & pomeridianâ 2. recurrentes, atque in dextro hypochondrio dolor adeò exquisitus, ut latus crederet per terebrari. Attamen non inficias eo, purgantia hic nequaquam profuisse, quæ quidem eduxerant scybala argillacea, auxerant tamen, prout & lactis alliati usus, abdominis tumorem, dolores in primis sinistri hypochondrici & murmura. Ex succo raphani aliquid levâminis habuit,

mini-



minime autem illud, quod exoptabamus. Quapropter ulterius nunquam satis imitandi *Brunneri* vestigiis inhæsurus, qui loco citato putat, vires si constant, sintque fractiones vegetæ, ad *Paracenthesin*, ceu sacram anchoram confugiendum esse, cum ambigua spes certa desperatione sit potior: sperare enim licet exhausta aquarum mole, qua tantum non pessundantur & obruuntur viscera, citius ea ad officia redditam & valetudinem esse recuperatura: Nostro paracenthesin suadere haud dubitavi, cum ipse huic operationi se parem crederet, viresque non adeò dejectæ essent, ut non potuisset ambulare, & reliquæ corporis partes ab omni tumore apparerent adhuc immunes. Tantâ autoritate munitus, non patiebar deterreri per infelicem operationis hujus successum, notatum in *Ephem. N. C. à Simone Scholzio Dec. 1. an. 6. & 7. obs. 165. à J. J. Waldschmidio Dec. 2. an. 6. obs. 152. à J. Wolffio Dec. 2. an. 7. obs. 187. & 188. & a libi*, credens potius fausta naturæ conamina arti sæpius exemplo fuisse, quale instar omnium illud esse potest, quod *Zacutus Lusianus Hist. lib. 2. obs. 24.* de *Ascitica* quadragenaria refert, cui perforato naturæ vi umbilico sensim egressa est aqua, ut 30. dierum spatio sanata hinc evaserit, vixitque 22. annos. Nec exciderat memoria temeraria *Rustici Cimbri* paracenthesis, quam novaculæ acie susceptam felici eventu haud caruisse recenset *Pechlinus lib. 1. obs. 62.* Accessi itaque die 16. unâ cum chirurgo nostrate *Krischio* & loci ordinario ad perficiendum hoc opus juxta methodum à *Dionis* præscriptam; sed ecce! cum æger denudaret ventrem, tumor adeò disparuerat, ut præmeditatũ supplicium non amplius haberet locum. Quis verò insperatam hanc mutationem aliunde provenisse sibi imaginaretur quam à notabili lymphæ excretionem, qualem etiam die 14. per alvum & urinarios ductus copiosissimè contigisse audivimus? Revertebar iterum ad interna subsidia, non potui tamen impedire, quin abdominis inflatio rediret, & quidem tactu dura, cum tumore pedum œdematoso, respiratione diffi-



difficili, hypochondriorum dolore, ut semper supinus cubare cogeretur, atque die 25. aquosâ scroti hernia. Hâc ratione indies pejora adverti, quibus die 8. Novemb. se affociabat horror, exæstuante nihilominus facie, extrema macies in reliquo corporis habitu, ferina sitis, omnimoda appetitus prostratio, paucissima alvi ac lotii ejectio, & de sonitu rugiente altum jam erat silentium. In strepitus hujus locum successit die 12. singultus, & tandem prægressâ dextri oculi inflammatione ac paralyfi palpebræ die 14. vespertino tempore mors ultima linea rerum.

Sectionis operi die 16. cum chirurgus R. F. Cosmâ, quem nunquam non indefessum comitem habeo, me accingens, abdominis repagula perfringere prima fuit cura. His ruptis obstupui videndo seri flami, cucosi atque foetentis plus quam amphoram impetuose torrentis instar profilientem. Alveus hujus oceani, Peritonæum intelligo, ob labem â stagnante ibidem aquâ ipsi illatam viridescente colore jam putredinem indicabat. Intestininis turgescantibus inerant liquidiora excrementa. Hepar, lien & renes, si substantiam consideres, nihil heterogenii alebant, si verò de illorum formâ sermo sit, planè præternaturaliter eam constitutam fuisse, fateor. Viderunt alii, quibus cadaverû inspectio curæ fuit, insolitæ magnitudinis Jecora, uti Barth. C. 5. obs. 7. *J. Harderus in apiario obs 58. Bonetto passim in sepulchreto, Dolaus Eph Dec. 1. a. 9. & 10. obs. 139. Spigelius in hum. corp. fabr. l. 8. c. 12.* qui prægrandi hepate præditos voraces pronunciat, quoniam eorum ventriculus plurimo colore circumdatur: nulli tamen magnitudine facile cedet deforme illud cingulum, quod ex nostro eruere licuit, utpote utraque hypochondria adimplendo diaphragma, cui in sinistro latere adnatum erat multum attollens & lienem parvisimum pariter annexum vehementor deprimens. An verò monstrpsa hæc conformatio voracitatem induxerit, expiscari non fuit datum, cum ægro vivente occulta nos laterent &



gravissimus postmodum morbus omnem de heluone suspi-  
cionem deleteret. Reliqua viscera pariter salva cernebantur  
excepto unicè omento, quod putredine consumtum vix sui  
vestigium reliquerat. Thoracis contenta optimè se habu-  
erunt, & nihil præternaturalis observavi, nisi polypum in  
cordis sinistra auricula & dextro thalamo, valvulis involu-  
tum gelatinosæ substantiæ, qui ob exiguitatem parum ad-  
huc molestiarum creaverant.

Cadet itaque tota culpa in omentum, quod solum in no-  
stro ascitem produxisse non immeritò in reatu erit. Nec de-  
fensionem locus datur, si consideremus lymphæ copiam, quâ  
omentum multis lymphaticorum ductibus instructum, ex  
ventriculo & liene oneratur, multò minus si *Doleanae hypo-*  
*thesi* adstipulemur, qui *lib. 3. Encyclop. c. 9.* potulenta ex  
ventriculo per omentum ad renes venire suspicatur. Hæc  
statuendi ansam ipsi dederunt experimenta, dum in ani-  
malibus, quibus ante sectionem magnam limpidæ aquæ  
copiam infundi curavit, ventriculo aquâ adhuc distento  
manu pressa vasa illa omenti ad ventriculum protensa vidit  
turgida; & observationes in avibus, piscibus &c. omento  
destitutis, qui nullam mingunt urinam. Maximum argu-  
mentandi pondus superaddebat herniâ scrotuli laborans,  
cui post excissum ab Herniotomo magnam omenti partem  
remanfit urinæ difficultas, & si nimium potulenti assume-  
bat, magnus circa ventriculum dolor, alvusque ferè sem-  
per laxa. Si talia cum iis, quæ à nobis fuerunt observata,  
conferamus, ubi post frigidam largiter haustam in omento  
ductuum aquosorum obstructio, eorum dilaceratio & ab-  
dominis hydrops enascebatur, quis non facile assentiret  
celeberr. Dolæo, etiamsi vasa urinaria ab omento ad emul-  
gentes vehentia visum nostrum ad hunc usque diem effu-  
giant? Calculum suum nostræ opinioni addere videtur  
*Magnificus Volckamerus*, cujus verba ex *scholio ad obs. 18. Dec. 1.*  
*a. 9. Ephem.* cum genesin præfati morbi illustrent, epipho-  
nema-



nematis loco annectere lubet: *Nil impedire videtur, quo minus verum hydropis originem omento assignemus; id enim quia potentiam ex stomacho absorbet humiditatem, ruptâ saltē vel tenui quadam ejus fibra, vel subtili canaliculo, guttatim in cavitatem ventris stillare, & augeri indies hanc posse aquositatem satis erit. Suggunt hirudinum more omenti fibræ ex ventriculo, quicquid humidi in fundo illius inveniunt: deficiente verò in illo potulento liquore, sc̃tim, usque dum potus suffecerit, excitant: ablata hirudinibus cauda sugere illæ non desistunt: simili ferè ratione omenti fibrarum una aut altera dilacerata suctionem non omittet, nec siti ponetur terminus.*

## XVI.

# Historia & Anatome Pericardii Hydrope, Strumis ac intestini recti ulcere laborantis atque demortui.

**I**N morborum concursu, qui morbus complicatus audit, prudentis medici est, morbo maximè urgenti primum prospicere, omnemque curam eò dirigere, ut vita facta ac tecta conservetur. Hâc in vado constitutâ reliquorum medelæ invigilare atque sanitati, quantum possibile, velificari oportunum erit. Si verò, quod sæpius accidit, primarius morbus feralis sit genii, Medicus certè culpâ vacat, quando in tali morborum concursu, non aliter ac in foro apud ære alieno obrutum, causâ cadit, & scopum sibi præfixum nullatenus attingit.

Similem jacturam passus habendo curam *Jacobi Schneider*, Fabri lignarii, post mortem ejus tandem lucratus fui spectaculum notatu haud indignum, quod Tibi, benevole Lector, una cum morborum præcedentiũ historia exhibeo. Invadit illum vino cremato valdè additum Mens. Jun. a. 1716. ætatis suæ an. 24. fluxus alvi sanguine quodammodo tinctus, qui post octo septimanas in phlegma album & mucosum degenerans intra nychthemeron plus quam duodecies ad excernendum sollicitabat



cum continuo tenefmo, torminibus circa umbilicum manē magis quam à meridie sævientibus. Præterlapsâ quartâ hebdomade etiam hujus mucī dejectio cessavit ac præfactorum symptomatum vices supplevit laboriosior respiratio atque tussis sicca, quæ verò post quindecim dies ægro valēdixerunt, recurrente iterum antea memorato alvi fluxu cum tantâ virium jacturâ, ut labores suos consuetos seponere cogeretur. Hoc stipatus satellitio die 25. Septembr. in nosocomium receptus me fatigavit in divinandâ morbi causâ. Fluxui alvino jungebatur tussicula cum raucedine, & à 30. Septemb. usque ad octavum octobris quotidie horâ quartâ pomeridianâ febrilis horror integris tribus horis ac hunc excipiens æstus sex horæ quadrantibus perdurans observabatur. Cum & febris hæc & alvi fluxus die dicto Octobris inducias darent, sudore nocturno quasi difflebat & furentium hæmorrhoidum dolor aderat, nihilominus viribus magis confusus subinde lectum deseruit. Die 12. rediit molestissima tussis cum stupendâ faucium siccitate & 18. alvi fluxus cū difficiliore respiratione, quæ tamen impediit, quo minus supino semper capite jaceret, aut stertorem inferret. Pulsus tactu advertebatur languidus ac rarior, nulla verò cordis palpitatio, id quod etiam à *Diemerbrock anat. lib. 2. c. 5.* in Pericardii hydrope observatum lego. Fauces interim permanferunt summè exsiccatae & vox ob raucedinem vix notabilis. Tandem die 23. Octob. anima molestiarum pertæsa à corporis ergastulo emigravit placidè.

Illo tempore, quo ipsi medicinam feci & intestini recti ulcus suspicatus fui abstergentiū pilularum ex balsamicis extractis usū experiebar, applicatis in simul loco affecto mundificantibus ac vulnerariis clysmatibus, & dum inflammatorius dolor sæviebat, injectionibus ex sem. psyll. ac cydon. mucilagine saturnique saccharo compositis. Pectori omnium maximè solatium urgenti adjudicabantur resolventia, demulcentia, humectantia, quorum in censum

vene-



venerunt Elixir pectorale assam dulcem, styrac. calam. crocum, radices herbasque pectorales continens, Infusa anticatarrhalia, potiones ex aquis & syrupis pectoralibus cum spiritu salis armoniaci anisati, atque Decoctum sub mucilaginosi nomine nobis veniens in primarum viarum exulcerationibus ac catarrhis falsis singulariter commendandum, cujus compositionem legas in *Lentilii Miscell. part. 2. p. 598*. His auxiliis se multum dicebat sublevatum usque dum irrueret febrilis calor sub salivæ defectu, quibus, inflammatoriam febrem præsupponens, obviam ivi mixturâ simplici, nitrosis largoque potu. Verum voto, uti superius innui, frustratus, cadaveris sectionem die 24. Octobris adornare operæ pretium duxi.

Primus itaque labor impendebatur Thoraci, quo aperto nil nisi uter ab aquâ intus fluctuante se mirifice commovens, nostris oculis apparuit. Credidisses vesicam urinarum mutasse locum, & prout de matrice narrant aniculæ, per œsophagi portam quæsiuisse exitum, adeo quidem ille sacculus similis erat amplæ vesicæ aqua turgidæ. Dissecto demum hoc marsupio quatuor ferè libræ limpidissimi seri effluerunt, & cor flaccidum, quod in sinistro thalamo parvum fibrosum polypum custodiebat, in conspectum venit. Quis hic Pericardii hydropem in dubium vocaret, nisi talpâ cæcior? & quis, etiamsi Lynceo perspicacior eum in vivo corpore prævidisset? tam fallacia sunt signa, quæ morbos pericardii spectant, ut ipse sagacissimus *Zacutus Lusitanus in Praxi med. admirandâ lib. 1. obs. 138*. haud erubescat fateri, se ejus inflammationem à pleuritide verâ post mortem demum potuisse distinguere, qualem ignorantiam circa pericardii tabem à tumore duriusculo ibi invento *obs. 187*. pariter videtur innuere. Cum non minus incerta, ne dicam, impossibilis est. Non quidem amplius in tenebris versamur circa scaturiginem lymphæ, quæ ad fibras cordis extimas blandâ suâ alluvie flexiles servandas & adversus rigi-



ditatem â resiccatione alioquin metuendam defendendas naturaliter, præter naturam autem in antea recensito hydrope particulari invenitur, postquam accuratè examinatâ internâ pericardii superficie *Lowero* teste innotuit, eam ad instar foliorum hyperici innumeris foraminulis perviam esse, ut conceptu non difficile sit, quomodo ex horum, uti cæterorum corporis nostri lymphaticorum vitio hydrops enasci possit. Prostant etiam in *Diemerbroeckii lib. 2. Anat. c. 6. Harderi Apiario obs 5. Bartholini act. med. obs. 89. an. 71. & 72. Christiani Hein. Erndl Archiatri Regis Polon. amici longo usu probatissimi obs. 141. Cent. 2. & 3. Ephem.* & alibi exempla ejusmodi hydropis, sed nullibi methodus, quæ lympham ibi abundantem educere nos doceat. Redeamus itaque ê diverticulo obscuro in viam magis patulam, scilicet ad reliqua in thorace nobis detecta. A tergo portentosi hujus pericardii latuerunt ab ipso retrorsum pressi pulmones, quorum sinister lobus steatomatibus deformis, & superius, ubi claviculam respicit, ulcerosus non aliter ac si â canis morfu fuisset dilaceratus, dexter verò passim putredinis stigmate notatus. Tandem curiosissimis phænomenis annumerandam censeo magnarum strumarum seriem, quæ â parotide dextrâ incipiens per idem latus asperæ arteriæ continuo nexu serpsit usque ad principium ramificationum, ubi finiit cum durissimâ glandulâ globi instar rotundâ. Tota illa scrophularum catêna cultro examinata ubique fermè sebaceam continebat materiam, exceptis paucioribus phlegmate coloris nigri gravidis & aëris fistulam tam arctè obsidebat, ut fortiter comprimendo nervum recurrentem raucedini causam suppeditasse probabile sit. Hoc ut credam me commovet interna asperæ arteriæ & laryngis tunica, quæ sine omni labe nihil ad raucam vocem contribuit, nec plethora in emaciato nostro corpore locum habuit, cujus tanquam rarioris raucedinis causæ *Excellentissimus noster de Helwich in Ephem. Cent. 1. & 2. obs. 162.*



meminit. Omnium verò maxime in opinione meâ confirmor â *J. Diemerbroeck*, qui *obs. 9.* in Rustico ob nervum recurrentem transversim præcisum annotat raucedinem incurabilem, & in primis *ab Hildano Cent. 3. obs. 35.* cui innotuit puella, quæ ex dextrâ colli parte laborabat strumâ asperæ arteriæ & nervo recurrenti adeò tenaciter adherente, ut respirationem & vocem utcunque interciperet, ne dicam de *Galenî l. 5. de usu part. c. 6.* & aliorum observationibus â læso illo nervo v. g. ob strumarum excisionem mutos fuisse factos docentibus. Ad infimi ventris viscera me convertens omnia secundum naturæ regulas inveni constituta, præter intestinum rectum, cujus extrema pars ad palmæ longitudinem putredine corrupta ac ulcerosa, exterius verò circum jacentes glandulæ strumolæ & induratae erant. Hac ratione inferius guttur imitabatur superius, nec fuit dubium, utriusque glandularum destructionem invicem multum habuisse commercii.

## XVII.

### Historia Pleuritici curati.

**I**Nternarum partium inflammationes â medicis acutorum morborum titulo insigniuntur, ex hoc forsan acumine, quod acutiores sint ipso ense, dum in vitam hominum agunt & quandoque subito stragem nimis funestam edere solent. Intres prælium, non tam magno te expones periculo, nec tam vario Marte pugnabis, quam si tibi res sit cum morbis acutis, utpote quorum prædictiones ipsemet *acutissimus Cour l. 2. aph. 19.* maximè dubiosis adscribere non veretur. Desudarunt quidem per tot secula artis nostræ Heroes in profligando infensissimo hoc humani generis hoste, multum tamen negotii nobis adhuc relictum, ut nullus non Medicorum Palæstram inveniat, in quâ ingenii vicem exercere potest. Dabatur mihi occasio descendendi in arenam



renam cum Pleuritide verâ inter acutas febres nulli secundâ, ut & *Helmontio* pleura furens audiat: aggressus adversarium armis alias consuetis, nihil penitus effeci, usque dum strategemati intentus, velut in arenâ, ut ajunt, consilium cepi. Hujus pugnæ historiam hic recensere, & post triumphum victoriam canere Lectori haud ingratum fore confido.

Vir 30. annorum *Georgius Gell* apud fratres murarios bajulum agens die 1. Octob. an. 1716. attollendo ultra vires suas onus experiebatur in sinistro thoracis latere dolorem punctorium & sequenti die sanguineum sputum, quod nemini mirum videbitur, qui â risu pleuritidem obortam ex *Act. Hassm. vol. 2. obs. 96.* intellexit. Pauperie tamen coactus per quatuor dies labores suos adhuc sustinuit, ab hoc verò tempore horror, æstus continuus, dolor major, tussis, difficilis respiratio, sputum cruentum, deliria ipsi interdixerunt servitia. Cum alio destitueretur auxilio non incongruè confugit ad sanguinis missionem, quam ex triplici fonte, venâ scilicet medianâ, salvatellâ ac raninâ prolicere consultum credidit. Præter lapsis octo diebus finiit quidem sputi cruenti exspuitio, successi autem sputum tenacissimum ac maximè foetidum, reliquis symptomatibus nulla halcyonia concedentibus. Die 13. Octobris in Nosocomium admissus intensissimo æstu, sputo putrido, tussi difficultate spirandi cum frequentia & dolore lateris dextri, deliriis, aspera linguâ, siti, omnimodâ virium prostratione, lotio turbido, pulsu parvo & duro haud occultare poterat veræ ac acutæ Pleuritidis præsentiam. Quapropter ex communi Practicorum penu depromsi, quæ in curandâ Pleuritide primas tenent, applicando externè pectori unguenta & cataplasmata, linguæ mucilagines, internè concedendo potum largiorem tepidum, Decocta pectori dicata cum mixturis ac pulveribus solventibus &c. quali suppellectili medica scripta & armamentaria pasim abundant,



dant. Enimverò æthiopem lavassem unice huic viæ insi-  
stendo. Acutissima certe morbi tela modò lethales insidias  
struxerant, cum recorderer adolescentis Bregensis studio-  
rum causa Vratislaviæ degentis & ante 16. annos desperatâ  
pleuritide laborantis, cui tunc temporis medicinam felici-  
ter faciendo simplici remedio pleuripnevmoniaë incendi-  
um extinxi & sanitati ex voto restitui. Eadem itaque me-  
thodo procedendo exhibere jussi Pleuritico meo pulverem  
ex nitri depur. scrupulo semis ac camphoræ gr. j. fortissimis  
inflammationum atque malignitatis debellatoribus con-  
stantem, qui quolibet trihorio repetitus adstantibus admi-  
rationem & ægro quatuor dierum spatio sanitatem produ-  
xit. Cum postmodum omni periculo vacaret, per aliquot  
adhuc dies circa noctem saltem hoc pulvere fuit usus, & læ-  
tus die 11. Novemb. nobis valedixit, crudeles mortis acule-  
os ab acuto morbo infligendos antea prævidens.

Vererer equidem tam vile epulum delicato nostri seculi  
palato apponere, optimè gnarus ipsi vix aliud arridere,  
quam quod nitido auri ac margaritharum splendore cor-  
ruscat, atque pretiosâ raritate se commendat, etiam si pom-  
posæ hæ solis lunæque atque omnium gazarum Tincturæ  
ex ferro paratis minimè accedant, & uti splendida delubra  
feles simiasque, intellige Medicinæ prostibula foveant. Post-  
positâ tamen hâc agyrtarum fæce ex amore erga egentem  
proximum diffiteri nequeo, me reiteratâ experientiâ in a-  
cutis ac inflammatoriis febribus prælaudatum pulverem di-  
cto modo adhibitum omni auro & panacæâ præstantiorem  
observasse. Non possû non, quin inter plura duo adhuc pro-  
feram experimenta, quæ ineunte 1717. anno, unum in il-  
lustri fœminâ gravidâ ætat. 20. ann. variolis cohærentibus,  
alterum in puero quatuor annorum rubeolis & morbillis  
acutè decumbentibus facere licuit. Illa septimo morbi die  
tantum patiebatur ptyalismum per 11. dies continuatum, ut  
quâlibet horâ ultra libram limpidissimæ nulliusque odoris



salivæ proflueret; sed deliria cum reliquis continuæ seu acutæ signis die morbi undecimo pessimum omen præfagebant, quod tamen D E O assistente decinavimus prædicto pulvere singulis tribus horis dato. Cû enim assûisset aliquot hujus doses, æstus atque deliria cessarunt, & etiamsi die 16. morbi ob enormem procul dubio ptyalismum quinq; mensû embryonem nullatenus variolosum sine præviis abortus indiciis excluderet, nihilominus tamen integræ sanitati restituta fuit. Puer verò Parentibus apprimè charus septimo a primo morbi insultu die æstum atrocissimum, sitim, agrypniam, deliria, jectigationes continuas, linguam mucoviscido tectam, subsultus tendinum, pulsum durum ac frequentem passus & digitis floccos colligens de morbo acuto & internis inflammationibus non dubitandi ansam dabat. Nihil spei amplius superesse videbatur, usque dum ordinavi, ut etiam singulis tribus horis ipsi propinaretur pulvisculus ex nitri depur. granis decem & ras. camphoræ gr. semis, & licet post quamlibet dosin major symptomatum vehementia & quasi lucta intra corpusculum per dimidiam horam notabilis sequeretur, attamen ejus usus per triduum continuatus induxit, sanctè testor, profundissimum somnum verè criticum, felicem exoptatissimæ sanitatis restauratorem.

### XVIII.

## Historia medicamentorum antiquartanorum.

*H*Arveo nemo cordatus in malam partem vertet, quod *ar-*  
*tem curandi per expectationem* exponens sarcasticè traducat medicastros ignorantiaæ asylum in uno eodemque medicamentorum genere quærentes, eosque notâ characteristica â vexillo, sub quo militiam faciunt, lepidè distinguat, producendo *ferreos, aquarios, asino - Lanio - Doctores*. Exprobramus potius eum in tam fertili segete sterilem fecisse mes-



messem, relicto nobis circa horum monstrorum progeniem nimis copioso adhuc spicilegio. Nonne in illorum cohorte sibi jure meritoque locum vindicabunt Doctores vomitorii, qui sine discrimine omnes ægros ipsissimos etiam consumatos phthificos ad emeticorum supplicium condemnant: Mercuriales, qui salivatoriam curam levisimis etiam morbis opponere audent: Avenacei, qui equorum pabulum, famosum illud avenæ Decoctum, absque præviâ morbi cognitione cuivis adventanti propinant: caccatorii (sit venia verbo) qui medicinam universalem se in Decocto purgante invenisse stultè credunt: Aurati, ne dicam auriti, qui omnes morbos auri Tincturis incrustando sibi viam ad Magnatum atria audacter sternere satagunt; & reliqui ejusmodi farinæ homunciones? Offerrent se adhuc astutiores, nescio an doctiores? qui non tam in medicamentorum, quam etiam in morum fraudibus Praxeos emolumentum statuunt. Tales sunt Doctores Thraasonici, qui portentosa audacter loquuntur & vix trivalia præstant; serviles ab *Harveo Praxin medicantes* dicti, qui obstetrices, vetulas, clysmatum applicationem exercentes & infimæ fortis homines pretio precibusque corrumpunt, ut inhianti lupo oves adducantur; calumniantes, quorum studium est clanculum Collegæ suo insidias struere reddendo maledicâ linguâ apud ægro adstantes suspectam alterius curam; & chamæleonteï Doctores, qui omnium horarum homines instar tritonis vago animo omnium favores ac auram popularem captant singulis ad placitum, nulli fideles Æsculapii spurii. Sed quid moror in enumerandis ignominiosissimis hisce Reipublicæ medicæ nominibus ad Garamantes proscribendis? Sufficiat interim ad cognoscendas ejusmodi technas *Machiavelli* Medicus olim a *Jacobo Barnero*, uti ex *Lilienthalii Introductione Machiavellismo litterario præfixa* intelleximus, conscriptus, usque dum Commentarius, quem speramus, clariora edocebit, & forsan illis, quibus imperium est, calcar addet hanc tollere pestem,



pestem, nec tantum tolerare malum. Si nobis, tales nungivendulos meritò nauci pendentibus, calculum addere liceat, optandum esse semper credidimus, ut quivis medicorum non ex medicamentorum abusu, nec morum astutia, sed ex notitia morborum exquisita famam & nomen demereri studeat. Bone DEus! quantum momenti accederet arti nostræ, si seculi genius & hodierna medicinæ fata ita comparata sint, ut quilibet medicorum non nisi unico morbo, hic Ictero, alter Apoplexiæ, alius Passioni hystericæ &c. animum applicaret, & in emendâ unius morbi naturâ se occuparet. Haberemus postmodum glorioso nomine Doctores apoplecticos, Ictericos, hystericos &c. qui rebus instantibus Medicinæ magno decori ac toti humano generi ineffabili emolumento forent. Dantur certè morbi adeò difficilis notitiæ & sonationis, ut tota ætas Medici, si centum viveret annos, ad unius scientiam ritè absolvendam non sufficeret. Exemplo sit vetus nostrum scandalum *Febris quartana*, quam curare ex *Pechlini* sententia *lib. 11. obs. 21. plus est, quam Dæmonum illud genus, quod ὄνείδαις καὶ δεισέει* expellitur. Nonne quilibet medico assurgeret, qui verè antiquarii Medici titulo dignus, quartanas omni anni tempore citò tutoque extirpare possit? Experimur proh dolor! quotannis *Hippocratici aphorismi 25. sect. 2. veritatem: Autumnales quartanae longæ, & maximè quæ ad hiemem pertingunt*: quæ certe nobis crucem adeò figunt, ut immensa medicamentorum dictæ febridicatorum farrago nullius fermè sit usus. Cum in Nosocomio sæpius nobis occurrerit occasio periculum faciendi de intricato hoc morbo ejusque antidotis, eorum historiam texere operæ pretium duco.

Antequam verò medicamentorum mentionem injiciam, è re erit febris hujus genesin ex communi sententiâ repetere, scilicet quod fomes mali consistat in discrasia humorum viscidâ ac pituitosâ, à cujus infarctu mox hepatis, mox lienis, mox pancreatis, mox tenuium intestinorum glan-



glandula obruuntur, & partium solidarum tonus destruitur. Testes allego cadavera quartanis necata, quorum viscera adeò labefactata fuêre, ut observaverint collectore *Bonnetto in sepulchreti sect. 1. obs. 29.* lienem atro turgentem & adusto sanguine & in substantiam piciformem sæpè resolutum, illum cum vena portæ hujusque ramis â glandulis vicinis tumidis compressum, putridum & corruptum, præter solitum triplo majorem, sanguine nigro, viscido infarctum; Pancreas supra infraque ut turgidum & extuberans, sic intus sordido pure ac viscidâ pituitâ impendio nimis infarctû, cujus pondere depressis occlusisque venæ cavæ & arteriæ magnæ tunicis, viscerique huic suppositis corpus emarcuit; *obs. 32.* præter aliorum viscerum vitium pancreas durum & scirrhum, cujus ductus Wirsungianus atro sanguine turgibat; & ex *Harderi relatione in apiario obs. 60.* hepar insolitæ magnitudinis subd durum, cujus naturalem magnitudinem lien molis suæ ratione optimè æquavit, omentum putridum, intestina lumbricis referta, sanguinem fæculentum & tartareum lienis cellulis incisus profilientem, serum quoque acidis salibus prægnans & magnâ copiâ in abdominis cavo stagnans &c.

Ad corrigendam hanc febris causam antecessores nostri lenissimis quondam procedebant, non attendentes morbi diuturnitatem, etiamsi protraheretur ad plures, 9. 13. 22. 24. 33. imò 48. annis, prout videre est in *Ephem. Dec. 2. a. 8. obs. 45.* Methodum eorum satis securam â *Job. Cratone* discere possumus, cujus propria verba ex *Epistolarum â Laurent. Scholzio collectarum Epist. 112.* hic communicare juvabit. Ego, inquit, meis agris (quartanariis) aliquandiu exhibeo singulis mensibus sub noctem Decoctum raparum, cum butyro. Prosunt enim rapæ â manifesta & specifica vi, quia humectant, humorem melancholicum suaviter aperiunt & leniunt. Deinde do succum cardui vel in forma pilularum, vel in syrupo, & cum video materiam probe esse coctam, expurgo primum infuso cum syrupo violaceo, vel de pomis, de-



inde agarico, postea exhibeo extractionem beallebori ad ʒj. vel ʒʒ. in debilioribus, & hoc modo plurimos sanavi. Quid rationi magis consentaneum sit hac methodo, non video, successive enim ab onere liberat obstructas glandulas & extractis postmodum amaris robur, quo ad meliorem lymphæ secretionem indigent, illis reconciliat. Attamen nostra ætas tam longæ moræ impatiens certe respueret curam integros annos requirentem & ex pravâ hujus seculi consuetudine singulis mensibus novos accerferet medicos, usque dum ex multitudine medentium pereundum esset ægro. Quapropter nobis necessitate coactis incubuit omnem movere lapidem, ut nova excogitentur subsidia antiquis efficaciora & ingenio præsentis ævi accommodata. Lubens prætereo illa remedia antiquartanaria, quæ ab autoribus passim collecta quandoque casu auxilium attulisse crediderunt, qualia sunt annotante *Crugero Ephem. Dec. 2. a. 6. obs. 40.* infusum stercoreis anserini in vino fortiter expressi; *Corbenio Dec. 1. in append. ad a. 6. & 7.* Cor leporis ac vinum sulphuratum; *Paulino in append. ad a. 5. Dec. 2.* haleces, ventriculus suillus tostus & stercois caninum masculinū in vino aut spir. vin. dilutum; *Hagendornio Dec. 2. a. 6. obs. 144. & Wedelio in Pharmac. acroamat. l. 3. sect. 2. c. 7.* pediluvium; *Grundelio Eph. Dec. 2. a. 8. obs. 104.* bufo in lacte coctus; *Lanzonio Dec. 2. a. 10. obs. 28.* Coitus veneris & similia. Nec topicis inhærere animus est, quibus patrocinator *Helmontius in opuscul. medic. inaudit. tract. de febribus* asserere non erubescens se per Emplastrum centenas quartanas, licet autumnales tuto absque recidivâ sanasse, postquam quotidianâ Praxi edoctus observavi talibus â ratione longè distantibus remediis ut plurimum adscribi effectum, quem nunquam meruerunt. Itaque hæc mihi suspecta semper seposui, pertæsus voluntariè Sisyphi volvere saxum, cum mihi satis tædii sit, si, quod sæpius accidit, in expertis medicamentis spes me frustretur. Magis certa quærens, periculum circa famosissimum Corticem Peru-

via-



vianum pluries subivi, dando eum præmisfis laxantibus & digestivis salibus, non una tamen formâ nec pari semper energiâ. Potentius, fateor, operatur hic cortex, si in substantiâ, vel ut pulvis, cui pulverem stomachalem Birckmanni, salia & pro gratia saporis elæosacchara admiscere solemus, vel ut morsuli cum aromatibus & saccharo aquis fragrantibus soluto fusi, vel ut pilulæ unâ cum extractis amarioris & floribus salis armoniaci ope mucilaginis tragaoformatae, vel ut Electuarium (inter quæ palmam aliis præripit illud, cujus descriptio quidem in *Archiatri Regii Stablii Observationum chymico-physico-medicarum Mense Novemb. p. m. 243.* exstat, nihilominus tamen à Magni alicujus Principis Archiatro ante aliquot annos Cizam misso caro pretio empta fuit) reiteratâ dosi exhibentur. Verum si hoc modo ad cachexiam dispositum infarcire velimus, lignosæ seu terrestres corticis particulæ nimium constringentes tam circulationi humorum, quam vitali principio inservientes tubulos adeò angustant, ut humorum motus fiat segnior & succedant viscerum obstructions Icteri, Hydropis, Tabis, mali hypochondriaci milleque malorum autores. Præterea nunquam certi erimus de febris emanatione, multoties enim post prædicta febrifuga recidivam vel nullâ datâ occasione, vel ex tempestatum alteratione me observasse recordor. Majori semper fiducia aggressus fui chinata liquida, quæ se præ reliquis commendant gustu atque securitate, eoque nomine primas tenent, & quantum scio, primum etiam sub hoc schemate ab *Anglo Talbotio Parisiis* producebantur. Nunquam quidem Talbotium pro una dosi infusum ex corticis unciis duabus in libra semis vini albi teste *Blengy Zodiac. gall.* exhibentem imitari consultum duxi, cum & sæpius febrim infuso ex duabus drachmis chinæ chinæ aliquot unciis vini malvatici & parum caryophyllorum composito ante paroxysmum propinato feliciter profligare potuerim & ad præcavendam febris recidivam mihi suffecerit vinum medicatum,



tum, cujus libra unica semis memorati corticis erat imprægnata. Hâc viâ incedens & introitu curæ â leniter laxantibus factò rarò aberravi â scopo. Alia tamen mihi excogitanda erant pro ægris Nosocomii, expectantibus adhuc â divinâ providentiâ vini foundationem. Cum nullus hic palati, sed unicus sanitatis respectus valeat, beati antecessoris mei *D. Casp. Pezoldi* experimenta de asaro ex *Observationibus suis medico-chirurgicis obs. 57.* renovare constitui. Ut innotescat gemina procedendi methodus, sciat Benevolus Lector, radicis asari drachmam semis vini Austriaci unciam unius semis infusam & per aliquot horas absque omni calore digestam provocare ut plurimum aliquot vomitus aut secessus; hanc die è febris liberâ mane ebibere jussi: Si eadem radicis quantitas cum prædictâ vini quantitate decoquatur avolat vomendi vis, seu particulæ sulphureo-salinæ, relictâ diaphoresi. Ordinabam itaque, ut calida hæc infusio horâ unâ ante paroxysmi accessû hauriatur, quam potionem statâ horâ ter aut quater repetii, etiam si paroxysmus jam evanuisset. Successus sæpius voto correspondebat, non tamen semper, ut duriori nodo duriores adhuc cuneum quærere deberem. Me minimè fugit, quanta in attenuandâ humorum visciditate mercurius polleat potentia, & quam maxime in deobstruendo fibrasque corroborando excelleat limatura martis, ut exinde singularem spem conceperim ex pulvere, quem ab *Excell. Hoffmanno in diss. de cura quartana* contra quartanas laudatam inveni. Porrigebam illum aliquoties quartanario, sed quales excitaverit anxietates, vomitus & quam vehementer febris insultum auxerit, exprimere nequeo. Oportet igitur accedere *Magni Borrichii* experientiæ, videntis quartanam febrem post diuturnam violentiam sopitam, tandem resuscitatam ab usu mercurii, ut ipsi ex allato hoc exemplo satis illuxerit, quam improbum & penè invictum sit in veris quartanis acidum. *Vide Act. Hassniens. Vol. 5. obs. 66.* Quem tunc præscripsi, pro-

scri-



scriptus impofterum erit pulvis â limitibus Noſodochni cum reliquis martialibus in quartanâ commendatis, utpote etiam horum uſum exſtirpationi febrium inſufficientem, & unicè ſalutarem experior ſublata penitus febre in roborandâ fibroſarum partium atoniâ. Contigit etiam mihi plus una vice quartanam vincere alumine tincto Mynſichti, imprimis ſi hujus ſcrupulo ſemis, idem pondus raſuræ nucis moſchatae combinaverim & appropinquantî paroxyſmo præmiſerim. Sed & hic cauti ſimus, cum fortiora talia adſtringentia in impuris corporibus veneni induant naturam. Omnium maximè nobis caveamus â talibus, quæ humorum motui remoram injiciunt, ſi lotium die intercalari turbidum, febrili autem & quandoque toto febris concurſu limpidiuſ apparet, id enim indicat præſentem ad internos ſpaſmos diſpoſitionem, quæ â præpoſtero conſtringentium uſu in detrimentum ægri majora ſumit incrementa. Merito alumini tincto præponendum habeo regulum antimonii medicinale, cujus virtus antifebrilis ſæpiſſimè in quartanis profuit, nunquam, me judice, nocuit. Moris mihi eſt regulo huic medicinali ad ſcrupulum unum offerendo addere pulverem antifebrilem D. Wedelii & extra paroxyſmum aliquoties de die exhibere, quo & correctioni materiæ & typo febrili proſpexi. Abundo etiam experientia, quam ſæpiſſime confirmatam vidi ab uno ex meïs artis pharmaceuticæ addiſtis, qui vulgo multoties quartanam diſſipavit mixtura ex Eſſentiæ abſynth ſimpl. drachma una & ſpirit. vitriol. gutt. decem aſſumta antequam frigus imminebat. Quod mirandum chinæ purgantibus admixtæ effectum in hoc morbo concernit, provoco ad *obſervationem de medicamento antifebrili empirico Cent. 5. & 6. Ephem.* â me communicatam. Paraſiſi grana piperi æmula mihi multum auxilii aliquando ſuppeditarunt, ſiquidem domeſticū hoc antifebrile, poſtquam omnia irritò conatu eſſent adhibita, â quindecim granis ſucceſſivè ultra triginta aſcenden-



do febres ad incidas redegerunt. Possem adhuc Egrenses acidulas tanquam summum antiquartanarium allegare remedium, haud ignarus, has in maximè desperato casu diluendo, abstergendo, confortando primas vias utramque sæpius fecisse paginam, nisi respectu antea memoratæ veterum methodi cramben bis coctam apponere vereretur. Si tamen dicendum quod res est, haud dissimulare possum, quod his tepidè propinatis quartanæ omnibus remediis reluctantes tandem jugum subiverint, eradicata in simul morbi minerâ. Cum cardo totius curæ consistat in primarum viarum absterfione aut evacuatione, quæ certè virtutes suas ulterius ad ipsa in simul viscera exserit eorû obstructions per motus humanorû acceleratos referando, & in leni adstrictione, cogitatû fuit de remedio, quod unâ quasi fideiâ duas dealbaret parietes: & ecce! innotuit tale, quod Nosocomio hic locum meretur. Reverendi Dom. F. F. Misericord. ex eâ, quâ feruntur in egenorû ægrorum salutem misericordia Panacæam hanc antiquartanariam mox candidè revelandam in Nosocomiis suis publici fecerunt juris, ut & hac ratione à R. D. F. Constantino Pharmacopœo docto meæ concederetur experientiæ multoties hætenus saluberrimè institutæ. Componitur verò efficacissimus pulvis, quem mercurium vitæ cœlestem appellare amant, ex vitri antimonii pulverisati & olei vitrioli partibus æqualibus, oleum hoc ad siccitatem usque à vitro antimonii abstrahitur, iterumque eadem ejusdem olei quantitas affunditur & abstrahendo & affundendo septies proceditur. Hoc modo pulveri præparato addi solet spiritus, qui ex spiritus vini rectificati libra una & spiritus mastich. unica una per quatuor dies digerendo fit, & trium dierû digestionem committitur. Abstracto postmodum vel decantato spiritu pulveri recens iterum. Spiritus effusus ad deflagrandum accenditur, quæ deflagratio bis erit repetenda commovendo interim spatula pulverem, donec flamma cessat. Pulvis, qui



qui restat, bene exsiccat, admirandi sane est effectus, si ejus vel granum unum semis vel grana duo cum amaricante aliquo extracto v. g. centaur. min. in pilulam redacta duabus horis ante paroxysmum quartanario exhibeantur, hac tamen lege, ne per bihorium aliquid superbibatur, utpote quo infringetur medicamenti energia. Vix deglutitâ pilulâ leniter sequuntur & vomitus & secessus, & sudor, & quod omnium optimum est, paroxysmus exulat, si, quod raro accidit, non primâ, altera certe vice, nec memini ulli latentis miasmatis febrilis semina curas fecisse. Habes hic, Lector, euporiston plane divinum tam experientia, quam ratione comprobatum: illius testes provoco ægros famosâ pilulâ restitutos; hanc nemo ambigere poterit, qui vel uno oculo antimonii atque vitrioli mysteria inspexit. Ut cætera silentii peplo involuta relinquam, haud vanam vitriolo inesse virtutem antifebrilem observavi in arcano, sic dicto, vitrioli varii generis febribus obicem ponente, quod *Celsissimus Pol. Princeps Reg. Jacobus* ex Italia accipiens clementissime mihi communicavit, & antimonii crudi Decoctum quartanas curare nos docet *D. J. de Muralto in Ephem. Dec. 2. a. 8. obs. 7.* ut hac ratione vitriolum atque antimonium artificiose invicem combinata non possint non existere efficaciora. Abrumpo interim filum contentus medicamentis, quæ omnium oculis exposui, usque dum lampada tradere poterō meliora offerenti, qui certe mihi erit magnus Apollo & antiquartius Heros.

## XIX.

### Historia Calculo renum laborantis.

SI ad lydium lapidem calculorum in microcosmo latentium diagnosin revocemus, vix scyllam atque charybdim evitare datum est; aditu enim ad evidentem eorum cognitionem ubique fermè præcluso, non possumus non, quin scrupulis obviis haud raro illidamus. Deberent quidem cal-



culorum in vesica urinaria hospitantium signa minus esse obscura, cum vix ad hanc lapicidinam ipsisimis instrumentis exploratoriis existat satis patula; verum quem fugit, etiam in prudenti illorum indagatione sæpius deceptos fuisse medicos pariter atque lithotomos multum exercitatos. Nonne vesica lapide intus obducta, scirrhusa, carnofis tuberculis instructa, vermibus repleta &c. non nunquam mentita fuit calculum? qualia exempla præter alios *Celeberr. Pechlinus* erudite proponit *in obs. 2. & 3. calculus mendax*. insignita. Et vice versa, nonne calculo præsentem ejus existentiam certo statuere hæsitamus, prout sæpius apud ægros, quorum pluribus calculis gravida erat, animadverti, cum alius scrophum, alius vesicæ scabiem, alius crustam lapidosam parietibus adhærentem præsupponeret. Multo magis adhuc cœcutimus in rerum calculis, quoniam multa horum symptomata cū aliis morbis coincidunt. Huic opinioni calculum, suum addet unus ex nostratibus *Georgius Werwas*, Bajulus, cachetici habitus Vir, qui ultra anni spatium feбри quartana vexatus, ea tandem liberatus Mense Novemb. a. 1716. febrilem horrorem & instabile umbilicum experiebatur dolorem punctorium. Cum hæc ipsi acciderent, insimul cum lotio effluxit materia albicans & mucilaginosa satis copiose, quam cohærentem glutinis instar ex matula protrahere poterat. Post talem urinam semper sequebatur floridi sanguinis fluxus impetuosus, ac si vena secaretur. Aderat dolor dorsi, sitis intensissima, inter mingendum stranguria, respirationis difficultas usque ad suffocationem, agrypnia, alvus semper obstructa nisi clysmate aperiretur & summa anxietas. Mox calculum vesicæ, mox hæmorrhoidalia conamina, mox pectoris morbum, mox vesicæ hæmorrhoides, de quibus *Excellentiss. de Helwich Eph. Dec. 3. a. 9. & 10. obs. 119.* legi meretur, mihi imaginatus, diu in cassum laboravi. Ad declinandam modò imminentem suffocationem die 16. Decemb. venæ mediæ



cæ sectionem impero, cum medicamentis inflammationi internæ resistantibus, hisque effeci, ut respiratio esset liberior, æstusque cum siti imminueretur. Nunquam vero ejusmodi spectaculum vidi, quale mihi obtulit sanguis è vena missus. Credidisses patinis inesse ceram flavam, cum ovum ovo non possit esse similius quam prædictus sanguis quoad colorem & consistentiam ceræ, nec sanguinis ordinarii vestigium apparuit, nisi ea parte, qua patinas attingebat, ubi quasi folium tenuissimum sanguinei coloris adhærebat, reliquo contento, quod duos latos digitos altitudine excedebat, gelatinam monstrante. Provenire hanc gelatinosæ partis in sanguine separationem à membranarum inflammationibus jam olim credidi, considerato inprimis Pleuriticorum sanguine ex venarum sectione collecto, faciliusque me modo concipere persuasus sum polypos ejusdem naturæ, quales in cordis thalamis sæpissime hætenus occurrisse recordor; Interim tamen modum, quo natura tam enormes roris vitalis dissolutiones molitur, & quo vita cum hac sanguinis dyscrasia diu persistere valet, optarem ab aliis expiscari. Confer. *Pechlini obs. 13. lib. 2. de sanguine albo ex incisa vena.* Sed revocemus ad calculum sequentia calculosi nostri fata. Pectore melius constituto & dobor & durities & inflatio totum abdomen, maxime vero sinistrum hypochondrium occupabat, ut jam de statu morbi certior, judicarem, calculum ex rene intrasse ureterem. Quapropter Decoctum contra calculum For. Tint. rad. pareiræ bravæ cum Tinctura Tartari paratum, & pulverem ex testis ovorum, nitro depurato cinnab. nat. compositum atque externe cataplasma die 18. adhibere incepti, quibus continuatis die 24. in vado se esse dixit æger, cum comedere, dormire, mingere ex voto valeret. Sequenti nocte lotium excernebat non multum dissimile sanguini, de quo antea sermo fuit, hosque parcius & maximo cum cruciatu. Inunte die innotuit ipsi tuberculum durum infra penis radi-



cem manibus palpabile, ubi etiam de dolore urente conquestus fuit. Postquam & ibidem Cataplasma applicabatur, injecto insuper in urethram lacte tepido die 26. Decemb. excretus calculus â multis arenulis compositus satis porosus una cum imbre quasi sabuloso hac vice miseriis colophonem addidit. Post semestrem spatium mihi retulerunt, recidivam iisdem symptomatibus stipatam passum fuisse hunc virum, quæ eo magis notanda, quod iterum 14. dies ante exclusionem calculi observaverit fluxum materiæ quasi chylosæ, cessantem penitus ejecto calculo.

Gelatinosa hæc saburra, quæ, tametsi ex alio fonte deducenda, nunquam non concomitatur vesicæ calculos, me meritò sollicitum fecit, ne aliquando & hujus genesi occasionem præbeat, quo morbo si permaneat immunis albo notandus erit calculo noster calculosus. Quid enim ad conglutinandum sabulum renale plus contribuere potest tali magmate? quod in renibus calculos formans, probabilius adhuc in vesica ob diuturniorem morâ similia coagula componere videtur. Nec impedit, hoc viscidum separari â sanguine in renibus, cum alterum illud, quod vesicæ calculis commune est, ex ipsa vesicæ tunica glandulosa exsudet; Sufficit consistentia ejus spissior ac glutinosior producendis glandulis apta. Hoc certe gluten albicans toto cœlo distinguit præmemoratum nostrum lapidem ab aliis lapidibus renalibus, de quibus tanquam *mirabile* aliquid prædicat *Pechlinus obs. 15. quod quantumvis magni, plerumque tamen vesicam transeant, & â corpore exeant, cum illi in vesica generati, etiam minores ut plurimum subsistant, crudelemque lithotomi manum expectent.*

## XX.

### Historia Rhevmatismi.


**S**Corbuto atque catarrho tam vastus patet campus, ut eos certis finibus circumscribere multarum difficultatum res censeatur. Parum certe abest, quin tota morborum  
cohors



ad Hist. 20.

Saccus

Saccus









cohors nonnullis sub generalissimo scorbuti conceptu veniat, sub quâcunque mundi plagâ originem ducat infidiosus hospes. Non sufficit distinctio in calidum & frigidum, meridionalem & septentrionalem, sed & Icterus, Hydrops, quartana & centeni alii morbi, in primis qui cutis vitia monstrant, scorbuto parere vulgo dicuntur. Ipsos catarrhos ab amplissimo hoc Dominio excludere vix conceditur, etiam si haud pauciori comitatu stipati sint, & singulis nostri corporis membris quasi jus dicant. Exercent sanè catarrhi imperium in corpus â capite usque ad calcem, invadendo caput ophthalmiâ, coryza, faucium morbis &c. pectus angina, tussi, raucedine &c. & ut alia taceam, artus arthritide, rheumatismo, affectu adeò pertinaci, ut hanc catarrhi speciem peculiari insignire observatione nullus hæream.

Ex communi sententia Rheumatismus provenire creditur ab extravasatione lymphæ seu serii vitiosi in parte qualibet corporis, non solum in articulis, prout in Arthritide, sed & in mediis inter articulos spatiis, musculis eorumque membranis ac ipsis perioostiis ob moram ibidem acescentis, & se coagulantis, & dolorem vel cum, vel sine tumore excitantis. *Diffusissimus Catarrhorum Explicator Conrad. Victor Schneider* ex Hippocrate Catarrhi sanguinis mentionem facit, quem ut serii sanguinei decubitus ex fibrarum aliqua stricturâ & contentorum remora â nostro rheumatismo minus alienum esse demonstrabo, seposita latiori Hippocratis significatione, ipsam apoplexiam, paralyfin, cordis palpitationem, dyspnœam, hæmoptyfin &c. hoc lemma indigitantis. Nec flatuum consortium rheumatismo denegat *Sorbait Med. Pract. tract. 6. c. 1.* expertus, flatum, qui Ipsi furiosus & *Albukasi tr. 2. c. 92.* Nakir audit, in interstitiis musculorum generari, quem notabili casu illustrat *Experientiss. Joh. Michaëlis in Praxeos Clin. specialis casu 19.* Liceat mihi trigam hanc causarû in uno exhibere Rheumatico, cujus memoriâ eo libentiù recolo, quo felicior curæ fuit successus.



Concernit illa studiosum *Johannem Grosmann*. macilenti habitus & 25. annorum Juvenem, die 14. Octobr. anni 1716. apud nostrates advenam, qui

multa tulit fecitque puer - -  
 sequenti ætate & aliarum ærumnarum sostrum, intellige morbum articulare reportavit. Hic morbus pro sede sua primum elegerat os ischiaticum sinistrum, ex quo dolor post varios ibidem exercitos cruciatus migravit in regionem sub dextro poplite sitam. Apparebat dicto in loco dolens durities nucem moschatum magnitudine adæquans Emplastris diaphoreticis & Vigoris cum mercurio pro resolvendi & discutiendi scopo applicatis minime cedens, sed indies augmenta sumens. Impositum tandem cataplasma emolliens nec duritiem, nec dolorem mitigare capax erat; quapropter, irritato pariter conatu, Emplastrum ex pice & sulphure in auxilium vocabatur. Verum exinde loco auxilii torturam ineffabilem experiebatur, ut hoc remoto ad cucurbitulas descendere consultum duxerim. Admotis per quatrimum bis de die cucurbitulis, & repetito cataplasmate innotuit superius altior tumor, non multum mollior, dolores autem eo atrociores, ut multis precibus ipsemet efflagitaret incisionem in affectâ parte. Itaque non satis laudandus chirurgus R. F. Cosmas ægrum voti compotem fecit, incidendo tumorem die 15. Decembris; sed etiam si incitamento satis profunde penetraret, nec sanguis, nec pus profluxit, usque dum vulneris latera digitis premendo procuraret occasionem extrahendi sanguinis coagulum instar farciminis ad duarum palmarum longitudinem exsurgentis. Hunc sanguinem coagulatum excepit flatus, quem furiosum dixisses, tam sonorus cum illo exaudiebatur sibi. Cum demum turundam intrudere vellet chirurgus, ecce! haud minori cum impetu profilire vidimus quatuor circiter libras sanguinis floridi difficillime compescendi, ut & animi pateretur deliquium ac indigeret Potione confortativâ



tativâ æger noster, remittente interim præfata duritie. Ne iterum hæmorrhagiæ ansa daretur, differebamus ad 17. usque Decembris deligationem, qua suscepta ab initio multum sanguinis extra vasa cogulati forcipe protrahebatur, subsequente fœtore putredinoso & libris duabus floridi roris. Die 20. Decembris & sanguis liquidus, & coagulatus, indies hæctenus parcior, penitus substitit, ejusque vices supplebat ichorosum serum ac cinerei coloris filamenta contorta, satis curiose usque ad 2. Januarii excreta. Cessante sanguine putredini obicem ponere nobis curæ fuit. Quapropter herbæ scordii, centaur. min. absynth. plantag. hyperici, sabinae cum aqua calcis vivæ decoquebantur, hocque decocto mundificabamus ulcustam spatiosum, ut octo decocti syringas caperet. Expresso mox iterum laudato Decocto immediate aliud adhuc injecimus, quod cum vino præparatum præter recensitas herbas continebat rad. aristoloch. rotund. oliban. myrrh. aloën, succinum & post horæ spatium compressæ, nunquam non in sinuosis ulceribus perquam necessariæ, debitus assignabatur locus. Hic erat deligandi modus, cui tandem accedebat turunda plumbea excavata ad facilitandum ichorosæ materiæ exitum. Cum die 2. Januar. cavitas ulceris satis angusta esset, ope penicilli applicari è re esse fidebatur unguentum ex melle rosat. Ess. succin. myrrhæ, pulvere aristoloch. rot. Die 13. seposita fuit modo memorata turunda plumbea, quoniam parum effluebat materiæ, quæ ad 17. Januarii maxime tenuis, injecto vero spiritu matricali adeo spissa reddebatur, ut instar glutinis potuerit protrahi, decrescente interim caverna. Die 25. de novo materia apparuit limpida & saniosa sanitatem impediens, etiamsi æger inciperet obambulare. Ad revocandam itaque curæ spem die 5. Febr. turunda ex ungu. ægyptiaco, cui parum croci metall. inerat, conficitur, qua intrusa materia meliorem quidem induit indolem, cavitas vero, quæ ex utroque latere evanuerat, in medio longitudi-

M

nem



nem digiti adhuc conservabat. Hæc ipsa cavitas operam nostram diu illufit, usque dum balsamo vulnerario ex vitello ovorum, spiritui vini, mumiâ, aloë, myrrhâ, olibano, mastiche præparato & injecto, quo tandem imbuebatur turunda, exoptata fieret medela. Colophonem addidimus sarcotico, quod, si sumtus spectes, nullius, si utilitatem, magni est pretii, ut hic ipsi locum assignare nullus hæream. Sumitur nimirum libra una interiorum solearum, a calceis longo usu destructis, tres partes libræ de pomis putrefactis ac exsiccatis, hæc minutim scissa in crucibulo fortiter calcinantur in pulverem glauco-nigricantem, quo caro brevi redintegratur. Tendinum debilitati atque tensioni unguento nervino suppetias tulisse non poenituit, hoc enim antecedentibus auxiliis superadditū integræ sanitati Rheumaticum nostrum restituit. Haud quidem inficias eo, me omnis generis interna adhibuisse medicamenta Rheumatismo singulariter dicata, quæ, tametsi magnæ sint efficaciam, hic parum profecisse, ingenue fateor, cum decubitus feris sanguinei parti affectæ tam tenaciter fuerit incuneatus, ut nulli cedere potuerit remedio, & certo metuenda fuerit anchylosis, seu motus abolitio in poplite ab humoribus infarctis, quorum interventu musculorum tendo non obsequitur, nisi abscessu saluberrime producto prævenissemus scyrrho atque motus privationi in genu.

Interim, ne manca & mutila nostra videatur Historia, alique Rheumatici, quibus magis obiter oberrat peccans faburra, habeant, quod ipsis pro solatio inserviat, operæ pretium erit, paucis indicare, quæ multis aliis sæpius exoptato, nostro autem frustraneo conatu interne propinavimus. In *Ephem. Nat. Curios. Cent. 5. & 6.* invenies specificum effectū in articulorum morbis ab Ess. aristoloch. rot. à me multoties expertâ, quam apud nostrum præmittere placuit. Medicamentis ex lumbricis pariter concedebatur locus, exhibitam in forma pulveris cum cinnabarinis, os-

fibus



fibus microcosmi &c. quam cum Gelatina cornu cervi, cu-  
jus ꝓiiij. succi lumbricor. terrest. ꝓij. & syr. acetosit. citri ꝓj.  
admiscetur commode, nec sine magna utilitate cochleatim  
quolibet trihorio rhevmaticis datur. Juvat hic innuere pe-  
culiarem lumbricos terrestres exhibendi modum, dum scili-  
cet supra lamina ferrea tosti ac pulverisati ad aliquot cultri  
cuspides insperguntur similagineo pani vino malvatico  
imbuto, cujus panis tabulam per decem dies jejuno stoma-  
cho comestam & rhevmaticos & inveterato asthma con-  
vulsivo laborantes sanasse recordor. Non contemnendæ  
energix, quam in Decocto radicis bardanæ *Forestus lib. 9.  
obs. 7. & Simon Pauli in Quadripart. Botan. p. m. 362.* admiratus  
fuit, memor, idem tentare lubuit, uti etiam Decoctum  
saturatissimum ligni & corticis guajaci, quod ad libram se-  
mis mane & vesperi tepide haustum multoties rhevmati-  
mum extirpavit. Maturus morbi per apostema exitus im-  
pedimento erat, quo minus sulphuris aurati Antimonii vir-  
tutes implorarem, quas & in hoc morbi genere magnas ef-  
se me minime latet. Injuria proximo fieret, nisi mentio-  
nem injicerem evporisti à R. D. F. Cœlestino Nosocomii  
apud RR FF. Misericord. Pharmacopœo industrio mihi  
commendati, cujus periculum nuperrime in rhevmatismo  
atque Arthritide non sine animi gaudio feci. Consistit hæc  
Panacea, ipsi mercurialis dicta, cum natales mercurio &  
antimonio debeat, in pulvere nigricantis coloris, nullius-  
que saporis, cujus scrupulus unus inditur libris quatuor vi-  
ni Austriaci, de quo postmodum vino quotidie matutino ac  
vespertino tempore tantum, quantum urceolus potui  
Thée destinatus capit, haustum, excitat diuresin, alvum  
reddit lubricam & hac ratione educendo salia arthritidem,  
rhevmatismum &c. generantia, morbos hujus prosapiæ tu-  
to atque jucunde pellere valet. Nolo tamen prolixus esse  
in extollendo medicamento, quod quotidiana accedente  
experientia, mihi imposterum abundantem scribendi oc-



casionem suggerere poterit. Sufficiat hac vice historia Rheumatismi, qui in poplite ac genu tam altas agens radices, ut ægrum omni hujus membri motu ad mortem usque privasset, per abscessum feliciter fuit sublatus.

## XXI.

### Historia Abscessu Hepatis demortui.

**I**N *Ephemeridum nostrorum Cent. 3. & 4. observatione 145. quæ Hepatitide subito extincti anatomen exhibet, Hepatitidem sub acutæ febris schemate delineavi; hanc, ubi non solvitur (ut acutissimi Jodoci Lommii obs. medicinal. l. 2. p. m. 166. verba mea faciam)* haud raro suppurare, oriri que abscessum prorsus exitialem, modo notabili exemplo demonstrare in animo est.

Introduxerunt ad nos die 31. Martii anni 1717. Aurigam *Christianus Rosenberg* nominatum, ætat. 38. ann. qui jecoris inflammationem manifestabat signis à laudato Lommio l. c. adamussim delineatis. *Adfuit, scilicet, febris ardens & acuta, dextro præcordio tumor inerat, cui dolor jungebatur, qui ad nothas ejus lateris costas pervenit. Itaque levis quoque tussis & crebra & sicca oriebatur, spirandique difficultas: accessit ingens sitis, cibi que fastidium: tum lingua scabrosa reddebatur, & lentore onerabatur primum flavo, dein nigricante: quin etiam frequens movebatur singultus, & nausea & vomitus sinceræ bilis, tum vitellina, tum æruginosa &c.* Præter hæc adhuc annotavi aphthas numerosè linguam atque œsophagum, quousque illum aspicere conceditur, obsidentes, quæ etiam inter bibendum excitabant dolorem. Die 3. Aprilis alvus incepit esse maxime lubrica, indies magis magisque fluxus colliquativi naturam induens, infimulque, ut iterum cum Lommio loquar, *putrida & saniosa, ac si ex cadavere esset facta colliquatio.* Cum hæc fierent, æstus, deliria, dolores, aphthæ disparuerunt, remanente adhuc summâ debilitate, pulsuque parvo ac languido.



guido. Die 6. hujus mensis dictæ Diarrhœa se associabat singultus ac creberrimus vomitus ejusdem foetoris cada-  
verosi & coloris fusci purulentique, prout in alvi excremen-  
tis innotuit. Ob continuos vomitus die 7. omnia respue-  
bat potulenta, animi deliquio detentus usque ad 10. Aprilis,  
quo animam Creatori suo reddidit. Quæ in hoc morbo â  
me acta fuerunt, prolixè recensere haud operæ pretium  
erit, cum æquus Lector, me tacente, judicabit, me hic mi-  
nime seposuisse venæ sect. alexipharmaca, nitrosa, citrata  
& hujus commatis medicamenta internis inflammationi-  
bus obicem ponentia.

Postquam plus arte valuit malum, forsân boni adhuc  
aliquid enasci poterit ex intimiori cadaveris inspectione,  
cui sequenti die horulam impendere placuit. Remotis in-  
fimi ventris integumentis omenti longitudinem admiratus  
fui, utpote quod naturaliter constitutum (si excipias ma-  
culam nigricantem ex ea parte, qua hepar respexit) pro-  
pendebat usque ad inguina, indicio, quod dilatatis proces-  
sibus peritonæi quandoque sine omenti ruptura hernia epi-  
plocele produci possit; cujus exemplum oppido rarum ex-  
hibet *celeberr. Laur. Heister Ephem. Cent. 5. § 6. obs. 85.* Maxi-  
mam merebatur admirationem Corpus delicti, intellige  
Hepar, cujus moles adeò erat stupenda, ut majus hoc un-  
quam inventum fuisse vix credam. Disquirant alii, an præ-  
ternaturalis hæc conformatio morbo lethali occasionem  
suppeditaverit; mearum modo partium est innuere, hoc  
viscus in externa superficie præter stigmata sanguinis nil  
monstri aluisse, dissectum verò tantam dedisse putredino-  
sam saniem excrementis antea per vomitus & secessus eje-  
ctis, ut ovum ovo similem, ut instar utris sanioso pure re-  
pleti appareret, adeo quidem intra breve tempus post in-  
flammationem in putredinem degeneraverat tota tota in-  
terna jecoris substantia. Nullus itaque in dubium vocabit  
hanc ipsam putredine corruptam substantiam per biliosa



vasa ad intestina translātū exitum sibi quævisse *ἀνω καὶ κάτω*,  
de quo, & reliquorum apostematum hepatis propriorum  
differentiis plura notatu digna evolvi merentur in *Celeberr.*  
*Herm. Boerhaaven aphorismis §. 936. seq.*

XXII.

# Historia fistuloso polypo Cor & aor- tam inhabitante demortui.

**O**Mnium rerum vicissitudines si ullus certe L. B. de Z.  
exemplo suo nobis comprobare potest, utpote qui  
perillustre stemma pauperie obfuscente, auctoritatem, qua  
in Exercitu Polonico ut Legionis Præfectus pollebat, hospi-  
tali obsequio & corporis robur gravissimo morbo com-  
mutare in fatis habuit. Seposita fortunæ eclipsi tragicâ cor-  
poris solum phases ex instituto nostro enarrare hujus loci  
erit.

Cum anno 1717. die 12. Martii Nosocomii civibus adscri-  
beretur, observatus fuit œdematosus tumor pedum & fini-  
stræ manus olim vulneratæ, tussis, copiosum sputum, dul-  
corem redolentis albi, viscidum & spumescens phlegmatis,  
asthma ac febrilis æstus noctu in gravescens, pulsus inæqualis  
ac debilis, atque vocis raucedo. Huic hostium turbæ oppo-  
nere consultum duxi anticachectica & asthmatis conducen-  
tia medicamenta: in illorum censum veniebant pilulæ po-  
lychrestæ D. Becheri martialibus maritatæ, vinum medica-  
tum laxans, Essentiæ amaricantes, chalybeatæ, Electuari-  
um ex chalybe &c. inter hæc vero primas tenebat Potio ex  
aquæ hyssop. fœnic. an. ℥iij. asthmatis. R. pectoralis. Nor. ana  
℥ss. oxymell. squil. ℥j. gum. armon. sol. ℥iij. syr. nicot. corr.  
helen. an. ℥iij. composita, quam nunquam non magni fe-  
cit. Tumore leucophlegmatico ulterius ad scrotum, abdo-  
men, ipsamque faciem serpente diureticorum energiam in  
Lixivio benedicto Minf. experiri & balneo laconico serum  
intra



intra musculorum poros habitans elicere volebam. Verum externum hoc remedium suffocationes augendo nocu-  
menti, & internum nullius erat auxilii. Quod externa au-  
xilia concernit, hydropicorum interest, ut ea nigro notem  
carbone, postquam sæpius, & nuperrime adhuc expertus  
fui, Decoctum ligni guajaci & sassafras, quod instar fatus  
applicatum, exsiccando ulcera pessimi moris mire sanat,  
Leucophlegmatici modo reconvalescentis pedibus imposi-  
tum morti ansam suppeditasse, sursum iterum lympham  
repellendo. Lotium toto morbi decursu naturali similli-  
mum strenue profluxit, ut & sputum, quod postmodum  
flavescens ægrius excretum fuit. Scrotum & penis sero ha-  
ctenus maxime tumens appropinquante morte penitus de-  
tumuit. Tot miseriis victus occubuit miles noster & ex gra-  
tia speciali mortuus est in Hospitali die 25. Aprilis.

De causa procatarctica non eram multum sollicitus, post-  
quam enim Baccho ex propria confessione diu litaverat,  
crematum tanquam humores coagulandi ac inspissandi ar-  
tificem accusare non vereor. Operæ magis pretium vide-  
batur proximam malorum scaturiginem cultro anatomi-  
co detegere & inquirere, an in nostra potestate situm fuerit  
ægrum ex fati faucibus eripere?

Itaque extispitio manus adinovimus sequenti post obi-  
tum die, investigando primum abdominis viscera, quibus  
nulla erat deformatio, excepta vesicula fellea à bile nigro-  
viridi in stupendam magnitudinem distenta. Instituto vi-  
scerum, quæ thorax continet, scrutinio hydra Lernæa se  
conspectui dedit, cui enecandæ ne quidem Hercules suffe-  
cisset. Occupaverat nimirum sinistrum cordis ventriculum,  
ejusdem auriculam & aortæ principium polypus membra-  
naceus duarum spithamarum mensuram implens, quem,  
cum arteriæ instar excavatus esset, si fistulosum dixeris,  
non errabis. Fistulosus hic polypus nullibi, si recte me-  
mini, annotatus, ejusmodi purulentam materiam, qua-  
lem



lem tussi tandem expuerat & pulmonum ulcus mox memorandum alebat, in sinu seu cavitate sua abscondit. Nul-  
libi polyporum alias individuus comes, feri scilicet in ven-  
tribus diluvium apparuit, & in pericardio vix ultra 3j. lym-  
phæ aderat. Videbatur itaque ac si rarior hic polypus plu-  
rimam suam sævitiam exercuisset in pulmonibus & remo-  
tissimis artuum musculis, hos onerando lymphæ extrava-  
sata, illos destruendo ulcere insanabili. Totum quidem  
pulmonum parenchyma steatomatibus ipsisque lapidosis  
concretis scatuit, sed sinister lobus pleuræ tenacissime co-  
hærens in superiori ejus parte adhuc ulcere erat corruptus.  
Quæ ex tali ulcere generatur humorum dyscrasia, ne qui-  
dem lippos atque tonsores latere potest, eam vero, vitiatis  
glandulis asperæ arteriæ divisioni adjacentibus, raucedini  
ansam suppeditare non videtur absolum, etiamsi haud pe-  
nitens exclusam velim Raucedinis causam à me *Historia 16. al-*  
legatam. Quomodo tale pulmonum ulcus raucedinem  
inducat, leges erudite enodatum in *J. M. Hoffmanni celeberr.*  
*Altorffens. Professoris Disquisitione corporis humani anatomico-pa-*  
*thologica specim. 15. §. 16. p. 216.* cujus verba hic apponere Le-  
ctori haud erit ingratum. De reliquo, scribit, nullum penes  
nos dubium est, glandulas, quas celeberrimus Phil. Verhegen cor-  
por. human. anat. Tr. 3. c. 8. descripsit & Tab. 18. fig. 6. lit. Ccc. ære  
exprimi curavit, primæ asperæ arteriæ divisioni, primisque ejus ra-  
mulis adjacentes, nonnullas ab illis notabiliter distantes, magni-  
tudine varias, molles, & succulentas communi involucro tectas, co-  
lore subnigras, alias figura ferme ovales, alias irregulares, alias  
magis longas ad instar uvarum Corinthiacarum, alias triangulares  
ob superficiei æqualitatem ad glandulas conglobatas referendas, simi-  
libus cum affinibus glandulis morbis, & si hætenus nondum descri-  
ptis obnoxias esse, hinc consequenter ab intemperata sanguinis &  
lymphæ dyscrasica intemperiei diversæ ab eorundem cohibito motu  
tumoribus & morbis meatuum, ab acrimonia erodente & depascen-  
te, abscessibus ac ulceribus, destillationibus ad hæc catarrhalibus  
suc-



*succumbere, & haud subministrato, uti quidem debebant, ab ipsis pro bronchiorum humectatione humore unctuofo, ad raucedinis genesin symbolum conferre. Pathologiæ hujus veritas elucescit ex Phthificorum anatome, quæ me docuit illis, quibus rauca vox erat, nunquã non exulceratam fuisse superiorem loborum partem, glandulas scilicet modo descriptas; his vero salvis reliqua pulmonum ulcera nulli facile mutasse loquelam. Meretur adhuc considerationem sputum purulenti quodammodo odoris & colore vix alteratum, tametsi provenierit ex sordido pulmonum ulcere. Hoc & reliqua ulceris ejusmodi phænomena nervose explicantem audiamus incomparabilem Wepfferum in Consilio Carolo Friderico Marchioni Badensi dato, quod Bernh. Verzascha observ. medic. 100. insertum est, & uti omnia hujus Viri scripta judicium nulli secundum monstrat. Non plagii reum me faciam, spero, si tanti Viri cogitatis Historiæ meæ bonam, ut loquimur, clausulam imponere studeam, cum aliquem solidiora proferre posse merito dubitem. In ulcere pulmonum, inquit, prout etiam in aliarum partium ulceribus fieri solet, textura parenchymatis pervertitur, vesicularum, ex quibus pulmo componitur, membrana tenuissima, arenarum telis similes, partim crassescunt & vel duplo crassiores fiunt, partim percurruntur, ut ex plurimis vesiculis minutis una vel plures amplæ cavernæ resultent: Capillamenta extrema arteriolarum exeduntur & magis patula redduntur, ut plus succi nutritii in cavernas effundant: extrema venarum capillarium & vasorum lymphaticorum oscula vel obliterantur, vel non coherent amplius cum capillamentis vasorum alimenta afferentium, unde superfluum non resorbetur, sed in cavernis stagnat, & quoniam pars exulcerata semper inflammata & calore præternaturali prædita est, illud, quod stagnat, facile inspissatur & lentorem contrahit, simulque turbidum, subviride & globosum evadit, quin diutius intra pulmones calidiores plurimoque sanguine turgentes in cavernis detinetur, quod etiam fœteret, si longiori mora his in locis subsisteret &c.*



XXIII.

Historia & anatome fluxu, sic dicto,  
hepatico demortui.

**I**Oco-feriam quondem *Ventriculi* defensionem *Bernhardus Swalve*, hujus visceris *querelas* & *opprobria* ventilans, in se suscepit, cum ipsi vicinum *Hepar* à *clarissimo Thoma Bartholino*, ut *defunctum* & *cujus exauctorati causa desperata sit*, solenni funere illuderetur. Scimus, quantum autoritatis perdiderit nobilissimum hoc viscus, postquam coram Reipublicæ Medicæ tribunali in sanguificationis negotio causa cecidit, & quam variis injuriis successu temporis fuerit obnoxium. Cui cordatiori non moveretur bilis? quoties à vulgo *Prætorum Bilis*, succus hepatis proprius, fermè omnium morborum causa innocentissime statuitur, utpote quod præsentibus quibuscunque febribus vel altioris indaginis morbis vix aliud blaterat, quam bilis effusionem in sanguinem. Erroneæ hujus hypotheseos fundamentum credulis ob oculos ponere fatagunt Medici tales stupidissimi, provocando ad vomitus nunquam non ultimo biliosos, nec considerant, bilem, compresso ob vomendi conatum fortiter dextro hypochondrio, effundi necessario ex vesica fellea per ductum choledochum in ventriculum, etiamsi in corpore minime abundet. Eo tandem simplicitatis pervenerunt, ut & in publicando ex sacris Cathedris morborum genere, raro aliud audies, quam accusare bilem, ac si omne id, quod præter naturam accidit, ex bile abundante originem ducat, nobisque biliosi, ne dicam, furiosi morbi sint quasi endemii. Nititur vero hæc Pseudodoxia epidemica non firmiori argumento, quam nostratibus familiaris maximeque incongrua mortis denunciatio, qua omnes indiscriminatim dicuntur extincti aut asthmate suffocativo, aut apoplexia, aut utroque simul, cum tamen tyronibus

artis



artis constare debeat, hos mortis prodromos non semper morbum lethalem, sed ut plurimum ejus esse symptoma. Magna etiam injuria afficitur hepar ab illis, qui unice in eo omnem hydropis fomitem quærunt, hunc verò sæpius alibi, Jecore penitus salvo, latere, in superioribus detexi. Nimis laboriosum esset in his & similibus Advocati partes tue-ri; attamen non possum non, quin hac vice hepar fluxus, sic dicti, hepatici insons declarem & ab hoc morbo per se-quentem historiam absolvam.

Johannes Bell, Sartor, 46. annorum Vir macilenti ha-bitus à longo tempore de difficili alvo, dum deficiente siti parum bibebat, & sæpius doloribus colicis conquestus ante annum propter subluxatam vertebam in dorso, & respirationem non satis liberam Nosocomium intravit. Hac pectoralibus solventibus restitutâ, & illa chirurgicis ad-miniculis ac inunctione cum ungu. carminativo Augustanorum, quod hoc in passu magni æstimo, reposita, brevî valedicebat. Anno 1717. Mense Martii rediit laboriosior respiratio, verum absque tussi, exspuitione & æstu. Sen-sit subinde horrorem ac in extremis partibus frigus, nun-quam vero, quamdiu vixit, dextri hypochondrii dolores, vel hæmorrhagias passus fuit. Cum medio Maji onus por-tasset gravius, sibi cor & os sacrum dolere, omnesque ar-tus debilitatos esse anxie ejulabat. Irruit in simul æstus in-tensissimus, cephalalgia, fluxus alvi per quinque dies, & tribus vicibus eructavit vomitu biliosas cruditates, quas u-xor postmodum exhibito vomitorio radicitus extirpare in-tendebat. His concomitatus miseriis repetiit die 5. Junii asy-lum nostrum, ubi nobis adhuc manifestavit sitim inten-sissimam linguamque valde siccam, quæ una cum æstu & fluxus præfati recidiva die octavo ejusdem Mensis adeo erat exsiccata, ut vix verba valeret proferre. Die 18. primum in deponenda alvo excrementa prodibant sanguinolenta, cir-ca linguam autem, vires atque febrem notavimus vicissi-



tudines mox in deterius, mox in melius vergentes. Interim cruentæ sedes tenuioris consistentiæ sine torminibus indies continuarunt, & auctis supra præfatis symptomatibus die 13. Julii ipso inscio effluxerunt, usque dum die 20. memorati mensis nil vitalis spirit. in corpore amplius remaneret.

Omissis ob febrem adstringentibus, & ob virium prostrationem missione sanguinis revulsoria, refrigerantibus, balsamicis ac incrassantibus morbum fuimus aggressi adhibitis etiam clysteribus conglutinantibus. Nolo tempus terere medicamentorum recensio, inprimis cum incassum laboraverim: Lectori, spero, magis intererit internum cadaveris cognoscere statum.

Hujus enodationi sequentis post obitum diei horula matutina impendebatur, ut majori attentione perscrutaremur tenebris hætenus obvoluta mysteria. Thorax revelavit in pulmonibus ulcus ad asperæ arteriæ ramificationes pertingens; compresso enim pulmonum parenchymate prodibat per dictum canalem pus in ulcere latens. Dexter pulmonum lobus pleuræ versus latus & inferius diaphragmati firmiter erat annexus. Certiorem mortis causam quærentes ad abdomen nos contulimus, ubi primo statim intuitu omentum absque adipe & totum hepar coloris penitus citrini cum satis amplâ fellis vesica oculis nostris se fistebat. Cultro dissectum jecur ex sanguine & ejusdem fuit aspectus, uti vitulinum post coctionem nostratibus consuetam. Lien haud difformis præter fissuram in exteriori superficie conspicuam, quæ ad naturæ lusus referenda quinque filamentis quasi consuta erat. Notari inprimis meretur, quod sanguis toto in cadavere deficiens ad vasa mesaraicæ videretur delatus, ut & à sanguinis copiâ turgidæ essent mesenterii venæ pariter atque arteriæ. Quapropter diligentiori intestinorum examini studens totum eorum seriem disseccare jussi & sollicite inquisivi in interioris tunicæ constitutionem. Ea vero in duodeno & jejunio naturaliter se habebat, sed ubi  
Ileon



Ileon incepit, ibi etiam contenta cruore erant tincta, quæ sanguine permixta excrementa ad anum usque observabantur. Lavatis & absterfis spongia intestinis Ileo, scilicet, cæco, colo a recto in villosa tunica, tot puncta rubra, quot pori apparuerunt, & quoties digitis leniter comprimebatur intestinum, toties exinde transsudarunt sanguinis guttulæ, quales in duodeno & jejunio nulla vi protuisses proliferare. Rariori huic phænomeno non minus curiosum adhærebat intestino colon dicto, nimirum spithama una infra cæcum propendebat intestinulum, prout illud figura exhibet, quod cum reliquis eadem gaudebat substantia & in sinu suo etiam ejusmodi fovebat morbum.

Quis ex præmissis non videt omnem mortis culpam hic in sanguinis Dyscrasiam & in intestina cadere? atque magnam huic fluxui esse analogiam cum hæmorrhoidali? Ex anatomia patet, venam hæmorrhoidalem internam rami mescent. è Porta prodeuntis, & arteriam hæmorrh. intern. arteriæ mesenter. inferioris esse surculos, prout externa vena propago est hypogastricæ, quæ est ramus Iliacæ à trunco venæ cavæ, & externa arteria hypogastricæ, quæ ab Iliaca è ramo arteriæ magnæ infimo ventri dicatæ confligente provenit. Horum surculorum in primis arteriarum ostiola si à sanguine vel ob quantitatem vel qualitatem vitioso, aut ab externis injuriis aperiantur atque dilatentur, hæmorrhagias excitant plus minus enormes. Nec venas exclusas habere vult *Schenckius Exerc. an. 5. l. 1. sect. 2. c. 15.* qui ab earum substantiæ singularitate, pluralitate, situs declivioris pronitate & a venis varicosis prægnantiū in femorib. & cruribus, quæ quandoque sponte sua rumpuntur ac aperiuntur, demonstrat, plus adhuc ad hæmorrhagias contribuere, quam arterias. Cum itaque quotidianæ experientiæ sit, hæmorrhoidalia vasa in intestino recto quandoque aperiri, cur idem fatum data simili occasione non tangeret reliqua vasorum sanguiferorum ostiola pariter ad intestina




sanguinem copiose ducentia. Nec anget me amplius ulla difficultas, quo minus animo concipere possim, cur hepar sanguine orbum fuerit, quoniam scilicet unanimi medicorum consensu sanguificationis principatu destitutum, & evacuato successive per fistulam intestinalem sanguine parum vel nihil ejus recepit, uti etiam reliquæ corporis partibus, quibus ex eadem ratione nos ille laudabilis defecit. Maximum sanè hepaticum, intestinis, quoad sanguinis viam, intercedit commercium, ut non mirum sit, si reclusa in uno ex duobus viscere per Portam porta, sanguinis fiat penuria & succedat Marasmus. Consideratione tamen dignum est, quod intestina duodenum & jejunum ex iisdem fontibus sanguiferis nutrita huic hæmorrhagiæ non fuerint subiecta. Quid si, salvo tamen certiora docentium iudicio, eam in prioribus hisce intestinis succus pancreaticus austerus vasorum orificia constringens ac occludens impediverit? Sed sufficiant hæc de Hepatis innocentia, quod illum fluxum concernit, dicta, utpote ex quibus clarè innotescit, hunc morbum rarum, quem *Dolaus Encyclop. m. l. 3. c. 10. ter*, & *magnus Sylvius Pr. med. l. 1. c. 13.* nunquam vidit, meliori jure appellari Hæmorrhagiam intestinalem, quam fluxum hepaticum.

#### XXIV.

### Historia Steatomatum capitis verticem occupantium.

**I**Nter cysticos tumores steatomata propter contenta solidiora à suppuratione immunia procul dubio primas tenent, quæ si intra corpus in cavitate aliqua progerminent, causam suppeditant lentæ morti, qualia notatu dignissima ex dextro ovario producta, abdomen immensam in molem extendentia, & decem libras ponderantia in puella quindécim annorum, statuarii filia, præsentibus *Nobiliss. D. Rathel Spröttaviensis Circuli Practico celeberr. Gunzelio & Sommero Chirurgis dexterrimis* nuperrime perscrutari licuit. Merebitur forsàn curiosa hæc observatio aliquando in Ephemeridibus nostris







ra in occipite occurrentia. Ab illis itaque R. D. F. Cosmas, sepositis Emplastris resolventibus dolores magis augentibus curam inchoabat, incidendo per crucem cutem obtusam steatoma, quo denudato sponte prorumpere vidimus albissimam quasi fabam, cujus tunica albuminis ovorum cuticulam & contenta albumen coctum exacte referebant. Successive sex hac methodo fuerunt eradicata, eâ tamen differentia, ut minora indigerent separatione, ac si immatura, instar pyrorum, penicillo adhuc tenaciter adhærerent. *Marci Severini Consilium de recondita abscessuum natura l. 3. c. 5. ne excisis hisce tuberibus tunicula vel pauca portio restet, quoniam quasi residuis radicibus exultat rursus germinatio:* fideliter sequuti, prospeximus postmodum vulneri spiritu matricali ac Emplastro de betonica & brevi erat sanatum. Sex adhuc restantia, ut parva & indolentia excisionem nondum indigere videntur; vereor autem, ne hæc cum tempore augmenta pariter sumant, novaque proveniant, quoniam causa morbi, intellige lentorem humorum, corpori adhuc inhæret. Ad hanc feliciter eliminandam Autor quidem sua forque fui, ut se accommodet ad curam mercurialem blande instituendam; sed surdæ narravi fabulam, fiduciam interim ponenti in liquorem mercurialem à famigeratissimo Patre Feliciano una cum aliis haud contemnendis euporistis v. g. Electuario anthydropico, spiritu antapoplectico &c. Parenti quondam communicatum. Apparet ille liquor instar aquæ fontanæ limpidissimus, odore saporeque spiritui nitri dulci simillimus, ut hunc spiritum menstrui loco inservisse mihi valde sit probabile. Dosis ejus se extendit ad 90. guttas, quæ largam excitaret diaphoresin, an vero insimul attenuandi virtute, quali specificè excellit mercurius & ex eo parata, polleat, tempus me docebit.



XXV.

# Historia & Anatome Febre hectica salvis visceribus demortui.

**P**Utridæ Sanguinis corruptioni non solum pathologia animata *Athanasio Kircher*o & *Christiano Longio* quondam exculta, sed & omnis innititur malignitas, quæ turbata sanguinis mixtura præter alia funesta symptomata subitanam & omnimodam virium prostrationem sibi habet conjunctam. Omnium memoriæ adhuc inhæret, quanta sequatur strages febrem malignam epidemice sævientem, nec ullus forsitan inficias ibit fluidas corporis nostri partes fovere mali fomitem. Hunc tandem ad solidas transire, quis dubitaret? postquam ex delirio cerebri ejusque membranarum, ex præcordiorum anxietatibus ac calore cordis, ex vomitu ventriculi &c. pathemata judicare possumus. Dari tamen morbum lethalem, qui salvis partibus solidis unice humoribus inhæret eosque lenta malignitate inficit, sequenti demonstrare historia operæ pretium erit.

Lapicida viginti annorum Juvenis *Matthias Hirschleben* tussi & sputo cruento arti suæ alias non infrequenti anno 1717. die 20. Maj. afficitur.

Præterlapsa hebdomade ob debiles vires lectum petere & 26. Junii nos accedere cogeatur. Tunc temporis liber erat à sputo præternaturali tussiendique molestiis, nec conquestus fuit, nisi de siti summoque corporis languore, ut & surgere non valeret. Cætero satis bene commedebat ac somnum capiebat tranquille. Pulsus vix tactu perceptibilis, lotium tenue & pallidum, alvus nunquam non difficilis. Mense Julii appetitus multum cessavit, & die 22. Febris cum alvi fluxu, quo primum excrementa fusca, foetentia ac postmodum mucosa instar spermatis ranarum observantur, magno impetu irruit, qui calor hecticus post patum genas roseo colore tingens volasque manum urente



æstu afficiens, atque frequens alvi dejectio ægrum non nisi cum vita die 3. Augusti deseruere.

Ex hætenus nota hecticæ febris indole visceris alicujus antecedentem obstructionem & hanc excipientem abscessum præsupponens, juxta methodum causæ morbificæ ejusque symptomatibus per chalybeata aperitiva, passulata, gelatinosa, lacticinia aliaque demulcentia, & tandem cydoniata frenum injicere tentavi. Etiam si nec sanguinis, nec humorum dyscrasiæ medicamenta adhibita obstant, quo minus sæpius ab his corrigi possit, tantæ tamen corruptioni minime satisfacisse dolemus, & eo magis postquam extispicium eodem adhuc die institutū viscera penitus salva nobis exhibuit.


Adstabat, cum aperiebatur cadaver tabe consumptum, amicissimus D. Rethel experientissimus Sprottaviensis circuli Nobilissimi Medicus, qui mecum inspexit pulmones floccidos cæruleis punctis ob stagnantem sanguinem exterius conspicuos ab omni scirrho vel abscessu immunes. Cordis quidem uterque ventriculus polypum abscondebat, sed adeo tenuem, ut sanguinis circulo obicem posuisse non fuerit credibile. Diaphragma, hepar cum bile, lien, pancreas, omentum pinguedine saltem destitutum, renes carebant omni labe, ex intestinis autem ileon lumbricum continuit album, teretem & satis longum, cum reliqua intestinorum contenta intense flava, nec foetentia essent. Interna intestini recti tunica quodammodo nodosa & durior nescio an in causa fuerit, quod ani sphincter & in vita & post mortem semper hiaverit.

Hic viscerum status quemlibet facile convincet, unice sanguini & humoribus, quorum naturalis mistio fuit adeo destructa, ut colliquatio per alvi fluxum se terminans sequeretur, jure meritoque imputari mortem. Accessit verminosa putredo, quam *immortalis fama Bartholinus Ephemerid. d. 1. a. 1. obs. 50.* in sanguine ex sectâ venâ, alii ab *Excellen-*



*cellentiss. Sachſio à Lewenheimb in Scholio ad laudatam obſervatio-  
nem collecti in omnibus noſtri corporis humoribus anno-  
tarunt, in noſtro pariter viſa. Cum enim, (quod ſuperius  
fuiſſet memorandum,) extincto ante aliquot horas  
homine, cadaver ſectioni anatomicæ exponeretur,  
eius peripherium ubique circumdabant vermes tarmo-  
rum ſpeciem habentes, turmatim per nares, os anumque  
prodeuntēs & de humorum putredine evidentiffimum  
perhibentes testimoniū. Citius, quam communiter fieri ſo-  
let, cadaver hoc vermibus ceſſit in prædam; nos, & ſi paulo  
tardius, idem certè ex-ſpectat irrevocabile fatum, quod ſe-  
rio meditari intereſt, & ut maneat altâ mente repoſtum :*

*Post hominem vermis, poſt vermem fætor & horror;  
Sic hanc in ſpeciem vertitur omnis homo.*





THE [illegible]

[Faint, illegible text block]





